


# GOMARI I BABATASIT

**GJERGJ FISHTA**

Vepra mundeso het nga

VeriuPortal

[www.veriu.com](http://www.veriu.com)



AT GJERGJ FISHTA O.F.M.

"GOMARI I BABATASIT"

POEM DRAMATIKE

“Populli falë ata që e mundojnë,  
por nuk ka me falë kurr ata që e rrëjnë.”  
Montalembert

Botue nga “Hylli i Dritës”  
Tiranë 1994

## PJESA E PARË

### GOMARI I BABATASIT

1

#### PROLOG

Pra, një herë e pikë ma s'parit  
Po i diftoj rodit t'Shqiptarit  
Se un ktu s'kndoj burrnin'e t'Parit,  
As trimnit e ndo'i luftarit,  
Veç një gaç, një zog gomarit,  
Qi, qyqari, për send tjetër  
-N'dashtë i ri t'jet, n'dashtë i vjetër-  
S'duhet gja, veç se me bártë  
E me ngrânë, t'thuesh, si Shqiptarët....  
M'thotë, por, mëndja se ndokujë  
Ka m'iu dukë se un mifi nd'ujë  
Me këtë kangë, e se më gjásë  
Sod për mue do t'kishte pásë  
Ndo'i send tjetër po t'kish' zgjedhë  
Tortë me vjerrsha ktu me drêdhë.  
Po, por shka, se ata e dijnë vetë  
Qi ka cofë mikrobi i shkretë  
I burrnis' e i trimnis,  
E qi sod në Shqiptarí  
Besa ka një t'madhe zí  
Jo aq për bukë e miredi  
Sa për burra-burra t'dheut,  
Qi për komb e nderë t'Atdheut  
Me jetue t'dijnë e me deké.  
Jo, por asht kot, besa, me u rrékë  
Se po gjen fatos ndër né,  
Se po gjen burra n'ketë dhé –  
Burra fjalet e atdhetarë:  
Kta veç, Zot! Kjoshin për farë;  
Se, për tjetër, mbyti n'ujë:  
Gja-ha' i keq – s'i duhen kujë.  
E vërtetë qi njadisa  
Ndër né flasin fjalë të mdha,  
E na mbahen se ata kjenë  
Qi shpëtue na kânë Atdhenë:  
Sado qi, kur ishte puna  
Me u shpëtue Shqipni kërcûna  
E, për té n'lutfë me qindrue,  
Ata rrijshin tue guksue  
N'për Stambollë e np'r Anadoll,  
A se villshin kund n'ndo'i stjoll  
T'ndo'i hoteli npër Evropë  
Alkool'n, me t'cillin ngopë  
E ki'n barkun si bagtija,

2.

Der sa n'gjak lahej Shqipnija....  
Por, kujtoj, s'ka kund nevojë  
Qi un t'i zâ kta ndopak n'gojë;  
Pse për ta "Dielli" i Bostonit  
Nji epopé ka shkruar tash s'vonit,  
Nji epopé me kaq do krypë,  
Qi mâ mirë s'ké aspak pse e lypë.  
Prandej mue nuk m'jite tjetër,  
Veç me këndue ndo'i fatos t'vjetër:  
Ndo'i Berdyl a ndo'i Kastrjot.  
Po, por shka, se sot me sot  
Edhe ktyne u ka dalë fryma,  
E si t'ishin do gjygyma  
Të pa fund, janë lanë m'njan' ânë  
E askush n'gojë ma s'don me i xânë,  
Kujë për tá ndër mënd s'i bjen.  
Der tash vonë, qi, fjala vjen,  
Posta e jonë pat përdorue  
Nji lloj pullash, m't'cillat shkruar  
Ishte ftyra e Skanderbeut,  
Námi e ndera e parë e Atdheut.  
Tash, kto pulla mbi sergji  
Na i kanë hjedhë një palë zotni,  
Qi ktu marrë kanë Postën n' dorë,  
Kin' për organizatorë,  
E t'kanë qitë do tjera pulla,  
Me kambë urash e me kulla,  
E me plepa e rrëma shkjope,  
T'gjana e t' gjata si gjuhë lope.  
Ani pra Shqiptarët e sotit  
S'çajnë fort kryet për punë t'Kastriotit,  
As për njat trimnin'e t'Parit,  
Kë janë dhanë mbas rrogash arit.  
Prandej thashë un se për s'mârit  
Do t' tingllojë për veshë t'Shqiptarit  
Nji poem mbi'i zog gomarit.  
Edhe kshtu, si fola s'parit,  
Vetë me vedi kam mendue,  
Mbas ngaeshëm paçë qillúe-  
Mbi 'i gomar një kangë me shkruar,  
Herë tue qeshë, herë tue vajtue,  
"Simbas" rregllave t'Poezisë,  
E nevojve t'Shqiptarisë.  
Eja, Zanë, pra, prej Parnasit,  
E kaluer ti m'shpinë t'Pegasit,  
Mëndes s'eme shkundja blozën,  
E m' difto metamorfozën  
E njatij gomarit t'ri ,

Qi një'i vlershmi zotëni  
 Babatasi bleu sivjet  
 Në Tiranë, n'atë kryeqytet,  
 Ku Ministra e Deputetën  
 -Ktyne Zoti jau rritët jetën!  
 -Qesin xhixha atdhédashtnije  
 Për lulzim të ksaj Shqipnije  
 E për ...kambë t'ndo'i sandalije,  
 Sado qi, mâ e shumta sish,  
 -Si thanë m'ka mue nji dervish-  
 Der dje kjenë... nuk dij se shka....  
 Kush n' "kopicë" kush në "qylah",  
 Por qi sod, npër rroga arit,  
 Na janë bâ t'gjith frotë Shqiptarit,  
 Edhe pshtetun mbi kolltukë,  
 Kalamuq e si terrçukë,  
 Fâ mirë barkun me "mastikë",  
 Pa logjikë – pa gramatikë,  
 Na pshtyjnë dije e politikë,  
 E, me "gisht" ngordhun përpjetë  
 I pijnë gjakun Kombit t'shkrete  
 Jo me hingzë, por me sahâna.  
 Veç se shka, mori lum Zâna,  
 Kah të dirgjesh m'shpinë t'Pegasit,  
 Xiere 'i vishkull n'pyllë t'Parnasit –  
 Vishkull t'hollë e t'gjatë zarânet,  
 Pse ksaj herë, besa, po m'kândet  
 Me ja hjekun qafës dikuj,  
 Për m'e bâ qi zâ'n t'a shuej,  
 Se t'jet' gjallë. Due t'a marrë vesht,  
 Se me buej s'kapet nji plesht.

## AKT' I PARË

## ARKEOLOGU

Oda e Ministrit t'Arsimit në Tiranë

## MINISTRI

(Tuj këndue "Rivistën Pedagogjike", thotë me vedi:)

Mirë...mirë fort...ma mirë nuk ka....  
 Punë e madhe!...(Drejtorit A) Kem' me pa  
 Shka do t'thotë, tash, "Hylli i Dritës"  
 Edh' aj Frati i dheut t'Mirditës,  
 Qi botue ka njat broshuer  
 Mbi programin t'onë shkolluer,  
 Tuj e prû për t'patenzonë.  
 Kem' me pá, po, shka do t' thonë  
 Kur ky artiklli i Nebil Çikës,  
 Shkrue mbas rregllave t'kritikës,  
 T'u bjerë n'dorë. Me shum mjeshtri  
 Ktu auktori vën n'qesti  
 Papë e Kishë e meshtari,  
 E difton, me arsye në dorë,  
 Se janë hasëm e trathtorë  
 T'gjith njata, qi n' tokë shqiptare  
 Duen qi shkolla elementare  
 T'jetë e lirë. Sod afetare  
 Qeverija ktu asht dishmue:  
 S'ka prá ndryshej n'shkollë me msue,  
 Veç se mbas programit t'onë;  
 Edh'un, po, herët a vonë,  
 Kam me i mbyllë shkollat private.

## DREJTORI A

Ju ngjatët jeta zotnis s'ate:  
 Mirë ketë punë mendue e ké.  
 Veç se shka, zotni, n'ketë dhé  
 Po kam shum njerz fanatikë –  
 Elë Priftënt katolikë....

## MINISTRI

Priftënt, jo, por Fretënt, thuej;  
 Pse kta janë qi, posë gjithkuj,  
 Po na jesin m'qafë.

## DREJTORI A

Zotni,  
 Ashtu punën si un e di,  
 Jezuit, Priftën e Fretën  
 T'gjith një mëndje p'rherë u gjetën  
 Ndër punë féjet e moralit:  
 Posë ndonjaj fatziut, batallit,  
 Qi t'ketë mangut n'krye ndo'i hatull  
 E, qi vorr mos t'ketë kund m'shpatull.  
 Tash ti pra, zotni, tue kënë,  
 Se morali i fés s'krishtënë,  
 S'njet gjithkund e s'njet gjithmonë  
 Me moral t'besimit t'onë,  
 Meshtarija kurdoherë  
 Ka me bâ zhurmë e poterë  
 Për punë t'shkollave fillore,  
 Edhe kurr në shkollë shtetnore  
 Fmin e kshtënë s'ka me i dërgue.  
 Për ketë punë – si m'duket mue –  
 Thom do t'ishte fort mâ mirë  
 N'Shqipni msimin m'e lânë t'lrë.  
 Qi seicilli Shqipëtar,  
 A komunitet fetar  
 Mund t'çilë shkolla për komb t'vet  
 N' dashtë n' katund, n' dashtë në qytet.  
 Por gjithmonë – si rrjedhë prej vedit –  
 Tuj u mbajtë n'çark t' ligjve t' shtetit,  
 Si n'Angli e n'Amerikë,  
 E, atje n'Francë e në Belgjikë.  
 Pse, zotni, me thënë t'vërtetën,  
 Sod me sod Jezuit e Fretën  
 E kanë shkollën me zanat'  
 Si e kem' na. Sa për inat'  
 Gjithshka t'duem për ta mund t'thomi,  
 Por e drejta âsht, se kombi  
 Shum prej sish ka pasë dobi:  
 Si ajo Shkodra e bân dishmi,  
 Ku ka shkolla e strehë foshnjore,  
 Ka gymnaze e qytetnore  
 Me programe prendimore  
 E, me msim e me punë dore,  
 Fort mâ mirë se shkollat t'ona,  
 Për të cillat dy miljona  
 Franga ar na vjetë për vjetë  
 Kulihum i mbysim n'dët;  
 Pse, zotni, shkolla për né  
 Politikë asht ase fé.

Mûjm m'e strukë punën me prralla,  
 Porse n'thes, bësa, s'hin pälla....

#### MINISTRI

Jo, pra, jo! Shkollën n'Shqipni  
 Nuk e baj Kishë as Xhami.  
 Prandej shkollat fillestare,  
 Qi mos t'jenë qeveritare,  
 Do t'i mbylli varg e vistër,  
 Mbasi ndodhë kam un Ministër:  
 S'due qi mosha e ré e Shqipnisë  
 T'rritet n'dorë të Meshtarisë –  
 Sidomos t'Fretn'e shqiptarë.  
 Kta, po, janë antikombtarë,  
 Njerz t'rrezikshëm, fanatikë,  
 Marrë gjithmonë me politikë,  
 E qi munden me na i prishë  
 Fmin me shkollë edhe me Kishë,  
 Tue na i rritë djelmt t'onë trathtarë,  
 Ma fort t'huej se Shqiptarë:  
 Si fort bukur Nebil Çika  
 E ka shkruë ndër kto kritika,  
 Qi aj bâ i paska "Hyllit t'Dritës".  
 Jo, po, vetë në "rend të ditës"  
 Do t'a vë emnin e kti,  
 Për m' e pru ktu n' Ministri  
 Inspektuer ase drejtuer,  
 Edhe kta, po, sa mâ parë,  
 Shi p'r inat t'Fret'n Shqiptarë,  
 Qi "Programin syntetik" –  
 Syntetik e analytik –  
 Keqas fort ná kânë poshtnue.

#### DREJTORI A

Po, zotni, si urdhnon e thue  
 Veç, ashtu si m'dukët mue,  
 Thom Nebili ka gabue  
 Me qitë n'dritë ketë lloj kritike,  
 Në "Revistë Pedagogjike".  
 Qi â' i përkohshme fjesht zyrtare,  
 Mbajtë me mjete t'Kashës kombtare.  
 Qeverija âsht afetare:  
 Prandej thom se zyrtarisht  
 Edhe kshtu llapazânisht  
 Nuk âsht mirë qi n'polemikë  
 T'hijmë na sod me katolikë



E t'u shajm Papë e Meshtarë,  
 T'u shajmë Fënë e Kishën mbarë,  
 Thue se Arsimi i jonë kombtar  
 Asht një lozhë e masonisë.  
 Katolikët e Shqiptarisë  
 Na i kem' vllazën, edhe vetë  
 Kish' me thanë, se s'â' e vërtetë,  
 Qi atje n'Shkodër Françeskâjt  
 T'huej na i rrisin kalamajt,  
 E qi ata tue kenë shqiptarë,  
 T'jenë, si thue ti, antikombtarë.  
 E po 'imênd – t'ngjatët Zoti jetën! –  
 Esad Pasha a thue ndër Fretën  
 Ka xanë shkollë?... Arif Hiqmeti  
 A ndër Fretën apo n'jeti  
 Ai kjé rritë?... Haxhi Qamili  
 - T' thotë shka t'thotë, po, qaj Nebili –  
 Osman Bali, Halit Lleshi  
 E, sa tjerë, qi fati deshti  
 Armët t'i sjellin kundra Atdheut,  
 Kundra Flamrit t'Skanderbeut,  
 As kta, besa – t'u ngjatët jeta! –  
 S'i kanë bâ kndimet e veta  
 N'shkollë fretnore. A e din, zotni,  
 Kush ka xanun n'ketë "skoli"?  
 Qaj Preng Jaku, si harusha,  
 Qaj Luc Nishi e qaj Prengë Tusha,  
 Dy djelmoça, dy skyferë,  
 Si edhe ata oficjerat tjerë,  
 - Gjetun gati kurdoherë  
 Për Shqini me ra m'poterë –  
 Qi mbas msimit t'Françeskanve,  
 M'shpinë u lshuen kta esadjanve  
 Edhe i shtypën. Kta, po, janë  
 Qi ndër Fretën shkollë kanë xanë.  
 Prandej tham se Nebil Çika,  
 Para se me shkruë kritika  
 Kundra Fretn'e e kundra Fësë,  
 T'i a vëjë gishtin një herë kresë  
 E t'mendojë se "uhaja n'Lesh –  
 Si tha i moçmi – merret shpesh"

#### MINISTRI

Pse po thue për Nebil Çikën?  
 Po ti kndojë 'i herë kritikën,  
 Qi për t'madhe bukuri  
 U bân Fretënve n'"Vllazni"

Nji (e)S. (e)S. – kush është s'e di:  
 (Me gisht i difton do vjerrsha, botue  
 prej "Vllaznitet", nr.9, nën titullin:  
 "Vallja Popullore").

A kë ç'ndien?... Ktu kish' me thanë  
 Se njat Fratin n'gojëka xanë,  
 Qi dikur shkrou njat broshuer  
 Mbi programin t'onë shkolluer.  
 E ktu poshtë, si nëpër tërthuer,  
 Fjalët e ashpra t'ktij vjershtorit,  
 Kish' me thanë, si shi drejtorit  
 T"Hyllit t'Dritës" i janë kushtue.

#### DREJTORI A

Ashtu m'duket edhe mue,  
 Por, zotni, t'ngjatët Zoti jetën!  
 Mos t'a xamë në gojë gazetën  
 "Vllazënija"; pse randsi  
 Kjo nuk ka kurrkund n'Shqipni.  
 Veç ban mirë me i shkruet vjershtarit,  
 Qi ktu n'gojë xen punë gomarit,  
 Se aj gabon poetët me i ngâ;  
 Pse kta uhá – nuk lânë pa lá  
 E, t'a bâjnë, besà, me kjá,  
 Porsi viç djerrë nëpër plish,  
 Ka' e salvojnë m'konop tre fish.  
 (Hin Babatasi. Drejtori A del).

#### BABATASI

T'u ngjatët jeta! –

#### MINISTRI

T'u ngjatët jeta!,  
 Si po shkoni?

#### BABATASI

Si do' zoti....  
 Gjene mirë.

#### MINISTRI

Asht edhe moti,  
 Qi na kalbi. Kujtoj ka  
 Mâ se' i muej qi shiu s'ka dá.

Me t' mërzitë!

BABATASI

Shka t'i bajmë prá.  
Vetë ju fajin, thom, e kini,  
Qi bje shi.

MINISTRI

Na, pse?

BABATASI

Pse jini  
Ju njata, qi sod n'Shqipni  
Vrâni e kthîeni....

MINISTRI

Nuk e di....  
Nejse mâ...veç fjalë t'kam çue,  
Ktu me ardhë me u pjekun m'mue,  
Pse nji punë kam pasë me ty.

BABATASI

Qé, tèk m'ké – me kâmbë me krye,  
Urdhno e fol. Ku ti me sy,  
Aty "praf" un kambë e krye,  
Npër stomije e npër "hêndeqe".

MINISTRI

Babatas, mjaft punë e keqe  
Për nji shtet "okcidental".  
Si ky i joni, as n'fushë as n'mal  
Mos me pasun nji Muzé;  
Jo, po asht turp, besa, për né,  
Për njiket Shqipninë e ré,  
Pa Muzé vendin m'e lânë.  
Tham, âsht mirë, qi ktu n'Tiranë  
T'a ndërtojmë nji far' Muzeut.  
Për lulzim e nderë t'Atdheut,  
-Vjet në Shndré pata fillue  
Nji Muzé vetë me ndërtue,  
Edhe krejt e pata mblue;  
Por nji ditë – si do t'keshë ndie –

Ra do shi e u kaperdi  
 U shëmb mbrendë, e e marroi Zoti.  
 Shka me bâ: e prishi moti.

### BABATASI

Mirë zotni, veç se po drue  
 Se endë dita nuk ka ague  
 T'ndertojm na Muzej n'Shqipni,  
 Me kuletë t'shpume në gji.  
 Ti e di mirë se as n'tokë shqiptarë  
 Muzejt s'ngrifen n'kambë pa paré;  
 Jo, po, ktu edhe, n'tokë t'Kastriotit  
 Hécë një fjalë qi kje thanë motit:  
 "Xhep e lèp – mori Rexhep!"  
 Prandej vetë kishe me thanë  
 Se, për tash, Muzeu do lanë:  
 Na s'po kemi bukë me ngrânë,  
 Jo me ngrefë Muzej n'Tiranë!...  
 Po a njimend, more lum beu,  
 Se, tu' u ngrefë n'Tiranë Muzeu,  
 T'a há mendja ty qi Atdheu –  
 Qi Shqipnia, fush' e djërr,  
 Tash na bahet Ingiltërr,  
 E, pjekë vedit pulat n'furrë,  
 Fluturim kanë me na u turrë  
 Me na hî përdhuni n'gojë?...  
 Jo, zotni: S'është gjâ ajo lojë.  
 Edhe tham se mirë do t'ishte  
 Për një shtet endë ferishte,  
 Si Shqipnia, një Spital  
 Me ngrefë kund n'ndo 'i fushë a mal,  
 Për me shndoshun "pelivromin"  
 Ase "dergjen" qi sot kombin  
 Janë tue lshue shakull për dhé,  
 E, mu shpòrr Muzeut, Për né,  
 Qi nuk kemi bukë me u ngî  
 Sot Muzeu â 'i "kabuni",  
 Qi nuk është, jo, për dhambë t'onë;  
 Pse Financa, si po thonë,  
 Sod ka ardhë e është bâ teneqe

### MINISTRI

S'â e vërtetë. Asht punë e keqe  
 Kshtu me folun, lum zotnija.  
 Ti sî e din, por sod Shqipnija  
 La mjaft pare n'kashë të vet:

Si me pá mundet n' "budget",  
 Qi Kolë Thaçi e ka përmbledhë  
 Edhe bukur aj e ka dredhë,  
 "Simbas urdhnit" qi ka pasë.  
 A din ti, se sivjet n'kasë,  
 (Si ky Kola e ka shpjegue)  
 N'Financë t'onë kanë me u grumbullue,  
 -Tanë fyshekë, ndry ndër kashuj –  
 Rrash njizetedy miljuj  
 Franga ar. Prandej kuleta....

#### BABATASI

S'di gjâ Kola – t'u ngjatët jeta! –  
 Po t'tham un , po, Babatasi.  
 Po a drò m'pare kund aj hasi,  
 Qi kështu, n'hamende t'vet,  
 Shton miljona në "budget"?...  
 Fjala e tij nuk çon kandâr:  
 Se atij kasha i ka qitë bâr,  
 Edhe âsht bâ me dalë me lypë,  
 Qysh se rrogat i ka krypë.  
 Jo qi ka edhe 'i tjetër punë:  
 Parja n'kashë kurr nuk i bûnë;  
 Pse, ke vetë s'âsht veç se 'i kukull,  
 Até shokët e bâjnë krejt sukull,  
 E ia shijnë paret përdhuni,  
 Si n'Shqipni qi hecë kanuni...  
 Posë qi vedit s'i shef hall,  
 Edhe krejt ka ra batall  
 Me "budget" t'Pandel Vangjelit,  
 Qi n'dugâjë t'Ali Kacelit  
 S'la kund karta as envelopën,  
 Kë po merr e ep me Evropën,  
 Tue çue Korsuj e Sefira  
 Për gjith skuta e për gjith bira,  
 Për m'ia u shtí evropjanve n'kokë,  
 Se na mënd kemi me okë:  
 Se Shqipnija, fush'e male,  
 Asht bâ sod "aksidentale"....  
 Desha t'thom "oksidentale":  
 Si ajo Itajla, si ajo Franca,  
 Me aeroplana, orkestra e danca,  
 Me "mocjone" e "interpelanca":  
 "Ferku" âsht vetëm ndër "pjatanca":  
 Kë atje ruejnë, po, shepka e fllânxa,  
 Na me mzì ktu bukë e plânca,  
 Kur t'i kemi; pse Financa

Endè ktu, si kje dishrue,  
 S'mujt me u "oksidentalizue"  
 Veç se shka, se do tregtarë  
 Mue m'kanë thanë se punët fort mbârë  
 Nuk po i ki'n kta korcollarë,  
 Kta sefira t'onë shqiptarë,  
 Kë qyqarve muej për muej  
 Po u mbijnë fjalë me gjënd të huej,  
 Sidomos për qirá t'shpisë,  
 Posë kasapit e furrxhisë;  
 Pse "xhaxhaj" Pandel Vangjeli,  
 Tash qi kasha pa gjâ ngeli,  
 Nuk ka pare me u dërgue.  
 Prandej t'mjerët sod janë ngushtue  
 Pa një dysh, me thanë, n'kuletë,  
 Me i shkue Evropës poshtë e përpjetë,  
 Si kual pleq qi lshohen n'knetë,  
 Pa tagji – pa kashagi  
 Përse askund nuk del me i blé:  
 Si mo' Zot! Ma keq për né,  
 Qi gjithmonë e kém' mâtë vrapin  
 Mâ të madh se kém' pàsë hapin.  
 E vërtetë se ky Kolë Thaçi  
 Vjet der m'gjû kërrçikët i zgaqi  
 Edhe i rá detit përtej,  
 Me do tjerë financjer t'mdhej:  
 E, ndër Romë e ...shishe t'Kjantit  
 Na ka vojtë në bankë t'Brabantit,  
 Diku larg atje n'Belgjikë,  
 Për me lypun metelikë.  
 Veç se rruga i vojt bihude,  
 Edhe i shkuen paret zollude,  
 Pse "Brabanti", si un kam ndie,  
 Po kish kenë një bastanxhi  
 Qi epte vetë, po, kastraveca  
 Për sherqij, edh' epte specia  
 Për tomate e patlixhana,  
 Kshtu qi Kola – at'e pastë nana! –  
 Tanë korrname e punë të mdhaja,  
 Kthej n'Tiranë me i kalë mushkaja,  
 E të mjerës moj Shqipni,  
 Qi ministra e tevabi  
 Do t'i lajë me ar flori,  
 Prap ndër kambë iu vuer jullari,  
 Edhe i mbet nën bark samâri.  
 Tash qi kasha mbet filuzë  
 E, besë kush s'na xën p'r'i rruzë,  
 Po na thonë se ky Kolë Thaçi

Ka çue kashën té kovaçi,  
 Thatë ngarkue mbi dy shilurtha,  
 Për me ndreqë me té do kurtha,  
 Qi me i ngrefë mandej n'Shqipni,  
 Do n'Gegni – e do n'Toskni,  
 Ku mâ fort t'ket gjâsë e ishkile,  
 Se bjen mbrenda ndonji skile –  
 Ndonji skile britanike,  
 A ndo'i shqarth prej Amerike,  
 T'cillve shtrëjt po u bânthe lkura.  
 Veç ka thanë Ali Klisura,  
 N'Palament kur e kanë pvetë,  
 Se kjo punë âsht “peshk në dét”,  
 E prej saj kurrgjâ n'kuletë  
 Nuk i hînë s'mjerës Shqipni  
 Por, po e zamë, zotni, se Kola  
 Po ka pare e po ka t'holla,  
 Për me mkambun ketë Muzé:  
 Arkeologun, por, ku e ké?  
 Pse un e dij, more bablok,  
 Se Muzeu pa Arkeolog –  
 Arkeolog i dâmë me gisht,  
 Asht si spata e ré pa “bisht”.

#### MINISTRI

Un ketë punë e kam mendue,  
 Edhe fjalë prandej t'kam çue  
 Për me ardhë me u pjekë me mue,  
 Pse Arkeolog un t'kam emnue –  
 Arkeolog edhe antikvar,  
 Për me mkambë Muzeun Kombtar.

#### BABATASI

Aman jarebi....Zotni,  
 E ké gabim, pse un s'e di  
 Se ku shpin' ka Arkeologjia  
 Me shka m'duket, lum zotnija,  
 Ti me mue po don me u tállë.

#### MINISTRI

Jo, pra, jo, s'po due me u prrallë.  
 A di' shka, more bablok,  
 Me u bâ nieri Arkeolog  
 Punë e vshtirë nuk âsht ndër né.  
 Si Arkeolog, ti tjetër s'ké

Veç me rmue, ndo'i herë në dhé,  
 Me gjetë vorba a palaré,  
 Me mbledhë shtamba e karratyqe  
 Hekuraqe e belezyqe:  
 Me bartë gur e shtylla t'thyeme,  
 Me gjetë kund ndo'i xhybe t'shkyeme,  
 Qi pat veshë motit ndo'i plakë,  
 Ndo'i stravecë me gjetë t'pa thákë.  
 Me grumblue brisq e biqakë,  
 Ndo'i topanxhë t'veshne n'teneqe,  
 A ndo'i "ltinë" të pa ngaskeqe  
 E njikso partallesh tjera.  
 Qi edhe n'pleh gjinden herhera.  
 A se n'dorë t'ndonji tellallit  
 Kur ndokush, ngushtue prej hallit,  
 Qet me shitë rraqet e t'et,  
 A ndo'i tjetër mallimet.  
 Sa për kaq, kishem me thanë,  
 Mjaftë qi nieri të ketë zanë  
 Ndo'i rrushdije – a iptadije,  
 E ndo'i fjalë edhe t'a dije  
 A latin ase greqisht,  
 -Por mjafton edhe turqisht –  
 Se Arkeolog aj del me nám.  
 Pra kto fjalë për tesh poi lámë.  
 Ti n'Shqipni Arkeolog sod jé:  
 Qé dekretin tëk e ké,  
 Me nënshkrim të zyrës s'naltë  
 Botë Tirana ka, edhe baltë,  
 Ka dibranë, jevk e ustallarë:  
 Pre' qerpiq, e sa mâ parë  
 Hînia punës s'këtij Muzeut  
 Për lulzim e nderë t'Atdheut.  
 T'u ngjatët jeta! Mâ s'mund t'rri,  
 Pse do t'shkoj n'Kryeministri,  
 Ku Ministrat janë bashkue  
 Për do çashtje me u kshellue.  
 (çohën e dalin të dy)

Rrugë

BABATASI  
 (tue folë me vedi)

Se, për Zotin – kjoftë lëvdue! –  
 Me shka vetë po jam tue pá,  
 Gjâ Shqipnia n'dorë nuk ká  
 E, as përpara kjo s'do t'vetë,



Q'se Ministrat ndajnë dekrete,  
 Pa peshue nji herë ma s'pari  
 Se ç'zotsi mund t'ketë zyrtari,  
 E q'se fati i Atdheut të shkretë  
 MÛjtka aj sod edhe me mbetë  
 N'dorë t'do njerzve, për t'cillt vetë  
 E as kurrkush, kujtoj, s'di gjâ  
 Se ç'shirok a se ç'murrâ  
 Na i ka hjedhë e prû n'ketë dhé  
 E po kush di gjâ ndër né  
 Për nji palë, qi ktu n'Shqipni  
 Po rruejn petlla e "kabuni",  
 E rrmejn rroga n'ar flori,  
 Kush di gjâ, po tham, zotni,  
 Se ku i kanë gjak e gjini,  
 Se ku i kanë kta plâng e shpi,  
 Stane, pleme, vathë e gji?  
 Pasaportat kush ua pav ,  
 Për me thënë se kta s'janë Slav.  
 Nuk janë Slav, Turq, as Bulgarë,  
 Por janë fjesht burra Shqiptarë?...  
 Shka punuen kta për Atdhé?...  
 Ku janë krenat qi kanë pré?...  
 Librat shqip qi kanë botue?...  
 Edhe ndihmët qi kanë kushtue  
 Për triumf të liris s'onë?  
 Për posë emnit se si u thonë,  
 Kurrkush gjâ nuk di, për tà:  
 Nuk di gjâ, por megjithktâ,  
 Megjithse edhe t'pa zotsi,  
 Na po e shofim kè n'Shqipni  
 -Qeni t'zo'n mâ ku s'po e njeh –  
 Na janë ngrefë si gjelat m'pleh,  
 E pedanta e "Don Kishjote",  
 Me nji hije krejt kokote,  
 Tuj u mbajtë për liberala,  
 Për modern e oksidentala.  
 -Sidomos n'kto kohët e mbrame –  
 Pjellin ligjë, vjellin programe,  
 Apin urdhna edhe dekreta,  
 Sjellin gjinden poshtë-për pjeta,  
 E n'ketë mnyrë çdo përparim  
 Kanë pengue, e mbrendë n'sundim  
 Njerz e punë kaq kanë pshtjellue,  
 Kaq përzie e kaq ngatrrue,  
 Porsi flokët e atij harapit,  
 Sa qi mbrendë në krye t'nji krapit  
 Ka mâ shum, thom, harmoni

E tendencë për qytetni,  
 Se n'shtet t'onë. – Eh, moj Shqipni!  
 Fort po drue se një ditë ngusht  
 Kë me ra, e kryet në grusht  
 Kë m'e kapë, pa pasë pi musht,  
 Q'se do njerz, qi kush me i xanë  
 S'kisht' për pëng as për dorzânë,  
 M'kurriz t'and po sjellin patën,  
 Edhe m'mjaltë po e mbajn sod spatën:  
 T'cillt ngërdheshë m'nipa t'Kastriotit,  
 Kndojnë at kangën, si 'i herë motit:  
 "T'shkojmë e t'hamë na voe t'fergueme  
 Kë ajo ndrikulla e hutueme."  
 E, kjo ndrikulla e pamënd  
 Ti Shqipni jé, t'tham p'r'imënd:  
 Pse, po mëndt t'i kish' ti tok,  
 Sod s'do t'ishe un Arkeolog,  
 E as do njerz, besa, për t'gjallë,  
 Kurr Ministra s'do t'ki'n dalë,  
 Po pse mëndt ti m'vend s'i ké.  
 Prandej kot rrërmoj un dhé,  
 E batallat, varg e vistër,  
 Bâhen "Pashë", bahen "Ministër",  
 E i biejn shtjelm sahânit t'shllinës,  
 Kah ty t'hjekin dredha shpinës,  
 E pa i qitë zavall kaptinës,  
 Pa prek pëndë – pa prek parmëndë,  
 Tuj u tállë – tuj u gërvállë.  
 Po t'i hjekin spik ksaj jeté,  
 Qi ma mirë nuk ka ku veté.  
 Xhepin plot e barkun kodër  
 S'ka si u vè' mâ mirë kjo lodër.

## AKT' I DYTË

## GOMARI

Rruga e Kavajës. Ditë pazarit.  
Babatasi e Drejtori B tue shetitë.

## BABATASI

Besà, pra, Arkeologu i shkretë  
Fort asht lodhë e krejt ka mbetë  
Kah do t'endet poshtë – përpjetë,  
Për me gjetë jevkë e ustallarë,  
Për me blé drrasa e binarë,  
Qepra, trenat e pullazina,  
Me gërshanza, hûj e trîna,  
-Ku për dyer e ku për kthîna –  
Edhe tjegulla për me pré,  
Qi do t'duhet për Muzé;  
Pse nuk asht, jo, besà, urti,  
Njaj ndërtesë me ja hî  
Për pa afrue landen përpara.

## DREJTORI B

T'a zâ besë, po, lum kumbara,  
Se jé lodhë; por mue m'kanë thânë,  
Se një shoq, me gjasë, t'kanë dhânë,  
Për m'e pasë ti si ndihmtar  
Në ndërtesë t'Muzeut kombtar.

## BABATASI

Jo, po, dhanë m'a kanë një shoq –  
“Dordolec” për kollomoq;  
E qi un s'due m'e pasë për brî,  
Jo për rësë e për zili,  
Por pse gjâ s'asht hajri i tij.  
Për me dijtë si asht puna e ktij,  
Mjaft 'asht ktu ty me t'kallxue  
Se ç'rrezik i pat tokue  
Nëpër të Financës s'Atdhéut.  
-Vjet qi shkoi në muej të Shndréut  
-Rexhep beu, Ministri i Arsimit,  
Shty prej zëllit t'përparimit  
E mbas planit t'ktij mendizit,  
(Qi aj e mban p'r 'i farë telbizit,  
Si t'isht'shkputë prej dhéut t'Inglizit...)

Qiti argat, llaca e ustallárë,  
 Për me mkâmbë Muzeun kombtár.  
 Bësa, i thojshë, shporru s'i  
 Pse me ç'm'duket, gjâ nuk di.  
 Por Ministri vesht nuk muer,  
 Edhe kshtu (me gjásë n'kallnduer  
 A pak para, nuk e di),  
 Si ajo kpurdha kur bjen shi,  
 A si m'pleh një madërgonë,  
 Befi m'kambë Muzeu i jonë;  
 Ashtu, hân, pa kurrnji kthinë,  
 Tanë qerpiq njeshë me deltinë,  
 Mbrendë e jashta me baltë lye,  
 Hukubet me u pa me sy:  
 Thue se isht' furrë me pjekun tulla,  
 A kaçorr ngrefun për pula.  
 Kur, qé, 'i nade, tue rá dielli,  
 Brî Muzeut po kalon filli  
 Nji grue plakë, pështjellë n'binish",  
 Garravaxh e bâ dyfish  
 -Ashtu lamsh, si shtupë buliret-  
 Me 'i shkop n'dorë e shmërtisë ftyret,  
 Jo pse ndie kisht' gja njimënt  
 Se isht çilë fjala n'Parlament  
 Qi, për t'dajtë na liberala,  
 Njerz taman "oksidental",  
 Do t'a bâjshim sod zanat  
 Me na u siellë pa perde grat';  
 Por pse isht' plakë e bâ gjytrym,  
 Si dêll ujkut thá mbi tym,  
 Nieri i shkretë e lé në skam  
 E qi n'gojë s'kish' veç se 'i dhamb,  
 Edhe até, po, me ixhiam.  
 Mbasi prá na mbrini plaka  
 Brî Muzeut – i u preftë nafaka!  
 Hè! Até Zana m'a shitoftë! –  
 Kè isht' tue fry një erë e ftoftë  
 E, ajo lehtë fort ishte veshë.  
 Po ja nisë një herë me u teshë,  
 "Tshjef" e "tshjef" tuj u ngërdheshë,  
 Mandej kolli i çohet peshë,  
 "Rruf" e "gjuf" një disa hera,  
 Sa as me hecë mâ s'mujt e mjera.  
 Ashtu, n'kambë, tu' u teshë, tu' u kuell,  
 Bâ prej lotësh...e, nejse, quell,  
 Edhe krejt irnue ajo bojet,  
 Kur, qé.... dhambi i shkulet gojet,  
 Edhe shkon – morë ku jé! –

Shkon e ndëshèt për Muzé,  
 Qi, si rá t'i kisht' një rrfé,  
 Vjen e shâmbet krejt për dhé  
 Edhe kshtu djalli i rumbullon  
 Rrâsh pesqind e 'i napoljon.

#### DREJTORI B

Shka po flet, brè burrë? Kam ndie  
 Si ndër dhámë punën e tij,  
 Por, kush asht, endè s'e dij.

#### BABATASI

Kush asht ky? Ky asht një mendiz,  
 Qi xânë ka, po thonë, n'Paris....  
 N' Paris jo, por në Stambollë,  
 Ku, po thonë edhe, se n'shköllë  
 Xânë nuk paska tepër hollë,  
 Pse, si thânë m'kanë do puntorë,  
 Me mbajtë s'din as shesten n'dorë.  
 Veç, tue kenë se ky asht sebet  
 Me dikë ndër deputet,  
 Fjala e t'cillit aso hère,  
 Mbrijtë nalt ndër Ministère:  
 Mbasi ky "gishtin e shllinës",  
 -Me një thue si 'i gjeraçinës –  
 Qeverisë ja kishte dhânë,  
 Për m'e njëjtë ajo m'gerhânë,  
 N'rend me "gishta" tjerë t'"Partisë",  
 E me té mandej Shqipnisë  
 Pa dhimbë shpinën me ja Inuer  
 E, m'ja xjerrë ndo'i dredhë m'likurë:  
 Për këtë punë, mbas fjalve t'tija,  
 Këtë mendiz thrret Qeverija,  
 Edhe e qét në "Punë Botore",  
 Tue i caktue për rrogë muejore  
 Gjashtqind Frank të njehun n'ar.  
 Por pse ky s'ishte shqiptar,  
 Veç, me gjasë, një anadollak,  
 E pse shqip nuk dihte aspak.  
 Për me i vû ksaj punë kapak:  
 Mbasi ktu, si kurrkund njeti,  
 Nuk mund t'bâhej zyrtar shteti:  
 Qeverija e quen "ekspert",  
 -Njatë qi i dëjë s'isht për shegert –  
 Edhe kshtu, po, me këte rrênë,  
 Ky mendiz, halldup tue kenë,

E, qi s'dijte inzhenjerí,  
 Me sa di un arkeologji,  
 Në Tiranë na u bâ zotni;  
 Edhe, ngrefë porsi kokot,  
 Me kaloshë e redingot,  
 Lavjerrë hundën si gjel deti;  
 "Teodolitten" për mbas veti:  
 Qitë "sarvietën" për nën sjetull  
 E vrâ ballë e ngërthye vetull,  
 Për mendiz edhe arkitekt,  
 Kalangerrçet npër qytet  
 Si t'isht' Gjoti – a Bonarroti.

#### DREJTORI B

Çudë, njimend, me bâ! Shqiptari  
 Për një krrabë, p'r'i rreth kulari,  
 P'r'i krye lakne a 'i bisht purrîni  
 Pushkë shi m't'vllan ndo'isherë aj shtîni,  
 Edhe bartë nuk ka qi nieri  
 T'a damtojë hiri e pa hiri  
 N'tokë a n'gjâ sado qi vetë,  
 Q'se n'mënd mbahet në ketë jetë,  
 Kjë gjithmonë zemërbujar,  
 Si për shokë si për shtegtarë,  
 Si për miq, për nevojtarë,  
 Edhe dalë u ka aj vllá  
 N'daç me bukë, në daçme uhá  
 Por, qé sod, qi disa piça,  
 -Qi po mbahen për ogiça:  
 Kush mehmur e kush Ministër –  
 Si ata orlat, varg e vistër  
 Na i kanë rá Financës kombtare  
 E me kthetra guximtare  
 Tue përpushë npër gjak t'Shqiptarit.  
 Po ndajnë zyre e rroga arit  
 Npër krushq e kushrini,  
 Npër miq e kumbari,  
 Për me ngrefë me tá parti –  
 Parti barkut e karrigash,  
 -Klika t'mshefta, çerdhe intrigash.-  
 Jo, veç gjyq Shqiptari s'lypë,  
 Pse aj do t'hajë veç bukë e krypë,  
 Ndërsa ata npunsat e shtetit  
 Rrijnë t'u mâjë si gjela detit  
 Me gjak t'tij, por ndêjë harrû  
 Si gur vorri e mënden hû.  
 Piqet n'diell e kalbet n'shí,

Për me mbushë me ar flori  
Kanavetat e Financës....

### BABATASI

Ah Shqiptarët... këta i ndjeftë Zoti!  
Se s'i regjë as halli as moti,  
Edhe vetë, po, me sy m'ballë,  
N' vorr me hî duen për të gjallë.  
Për pa mbâjtë kush për tá zi,  
E po ku, posë se n'Shqipni.  
Njikjo punë mundet me u ndi  
Se, pa u mbushun gjyma e vjetit  
Firo shkon gjith parja e shtetit  
Nëpër xhepa t' "atdhetarve".  
Qi p'r Atdhé e nderë të t'Parve  
Der mëson një marimângë  
Prej birucet s'e kanë shmângë;  
E as ndër mënd kurr s'u pat rá  
Se Shqipni kund m'shekull ká,  
Veç dishmue janë për Shqiptarë,  
Q'se Financat n'dorë kanë marrë?  
Jo! Shqipninë na s'e kem' bâ  
Veç për t'ngopë edhe për t'fâ  
Me bukë t'bardhë e rroga arit  
Ndonji kalangerrç zyrtarit,  
T'cillit barku i pat ndejë fyell,  
Edhe shtatit ardhë kercyell  
Kjë si hûni n'kapërcyell,  
E as pse dhet' a pesmbdhetë vetë,  
-Pa gjâ n'bark, pa gjâ n'kuletë –  
Me u njitë t'mujshin thik përpyetë  
E me xânë "kulltukët" e parë,  
Edhe ngrefë për sundimtarë,  
Me mehmur e me zyrtarë,  
Me inzhenjera – e me shofera,  
Me nëpunsa e sherbtorë  
Me përta Financën n'dorë:  
E grish miq e semahorë,  
Ngref Kongrese e Parlamente,  
Kshille t'Nalta e Konstituente,  
Herë tue qeshë, herë tu'u gërmushë,  
Tash tu'u tállë, tash tu'u përpushë,  
M'shpinë t'Shqipnisë me lujtë harushë,  
Mirë me ngrânë e mirë me pi,  
Me mbushë xhepat me ar flori,  
Me ja u pasë një Mbret lakmi:  
Por Shqipninë na bâ e kína.

Qi t'gjith na, po, t'gjith si jina,  
 Gegë e Toskë, fushë e malcina,  
 Qytetarë – edhe fshatarë,  
 Nëpër rreze të lirisë  
 T'vëhna m'rrugë të qytetnisë,  
 E t'kem bukë edhe qetsi,  
 Përparim n'Shtet edhe n'shpi,  
 E mos t'vuejm gjith' atë siklet,  
 Qi vuetë kem' për pesqind vjet,  
 Sa pa'm ndëjë nën thembër t'huej,  
 T'shámë e t'shtypun prej gjithkujë.

#### DREJTORI B

Me gjith kta populli i ngratë  
 Prap ka ngelun me bukë thatë.  
 E me crule e zhele m'shtat,  
 E me krye aj për nën bàt,  
 Tuj u vrá gjindja n'ditë t'sotit  
 Si kjenë vrá kta dikur motit:  
 Pse ata dhet' a pesmbdhetë vetë,  
 Qi "kulltukun" e atdheut t'shkretë  
 E kanë bâ sod monopol  
 Edhe dajnë rrogat me spol,  
 Ata 'i t'mirë vendit s'i a réshën,  
 Veç shka kombin t'ngratë e zhveshën,  
 Me "tarifa", "taksa" e "oktrova",  
 Me "xhelepa" e tjera prova,  
 Si me thânë, me "t'dheta" specash,  
 Kungujsh, poçash, kastravecash:  
 Me "vergji" mbi stane e ksolla,  
 Edhe vendin rreth e okolla,  
 Kshtu tue repë si njeti askund,  
 E kanë lshue sod n'ujë t'pa fund.

#### BABATASI

Jo, po, mirë, besà, po thue,  
 Pse kurrkush s'din me kallxue,  
 Kta zotni shka kanë veprue,  
 Q'se kanë nisë ktu me sundue:  
 Ku janë rrugat qi kanë shtrue?  
 Ku janë urat qi kanë lshue?..  
 Sa janë knetat qi kanë thá?  
 Kund ndo 'i prrue a lùm a ká,  
 Qi kta prû t'a kenë n'âmë t'vet?..  
 Qué , tash mbush' janë plot dhetë vjet  
 Q'se Shqipnija ka dalë m'veti



E, q'se kombi nisë ka i shkreti  
 Me lá taksa, pagë e t'dheta,  
 E q'sè prè si kacabeta  
 Kta kanë rá m'Financa t'ona  
 Dhe me lira e napoljona  
 Lajnë nëpunsat - akraba  
 E atdhetarët e "fjalve t'mdha",  
 N' kto dhetë vjetë, po pyes un, prá,  
 A thue u vû ndo 'i punë për fije?  
 A u çil kund ndo 'i shteg tregtije,  
 A 'i burim ekonomije,  
 Për me t'mbajt sado pak shpresa,  
 Se për né dikur rrrésa  
 Ka me u sjellë ajo për s'mârit,  
 Mbasi shtetit grumbuj arit  
 Asht tue i lá rodi i shqiptarit?

#### DREJTORI B

Jo, qé bésà, kurrnji sënd  
 Der sod bâ s'asht për ketë vënd –  
 Per ketë t'mjerën moj Shqipni,  
 Edhe tham se kta zotni  
 Kot thajnë dokrra e thajnë kopalla,  
 Çajné makllada e qesin prralla,  
 Kur na thonë, me 'i qind inshalla!  
 Se me u orvatë kanë për Atdhé,  
 E, se s'shpejti 'i kohë e ré  
 Do t'zânë fill n'Shqipni për né:  
 Se, manà, me ç'm'duket mue,  
 Fort ma zí punët kanë me shkue,  
 Po kjé imënd se na harrû  
 Kem' me ndejë, e porsi viça  
 Syt me i ngulun kem' m'kta piça,  
 Kinse kta t'na çilin shteg  
 Edhe Atdhënë t'na qesin m'breg  
 Nulla, po, cupido ignoti,  
 Ka pasë thanun Aristoti,  
 Për me u orvatë, pra, për Atdhé,  
 Duhet pasë ma para i'idé,  
 E me dijtë se shka asht Atdhéu,  
 Shka asht Shqipnija e Skanderbeu.  
 Po, por kta, kishe me thanë,  
 Se endè mirë nuk e kanë xanë  
 Se shk'à Atdheu e shk'asht Shqipnija.  
 Venju shêj, po, fjalve t'mija:  
 Kta Shqipnin' me gjásë, s'e duen  
 Për gjâ tjetër, veç pse druen

Se i mbytë Slavi a se i shtypë Greku,  
 E, se u hupë rroga a qiflleku:  
 E jo, pse kta kanë dashtni  
 Për Atdhé e për liri,  
 A pse duen me pasë vllazní  
 Shoq me shoq, e parasí  
 Ndër detyrë e në drejtsí.  
 Prandej fjalët “demokraci”,  
 “Shqypni e lirë” e “qytetní”  
 “msim”, “Arsim” – e “përparim”,  
 “Orjental” – “Oksidental”,  
 “Parlament” e “Punë Botore”,  
 E, sa tjera fjalë kso dore  
 Nuk janë tjetër veç se dokrra,  
 “Thasha” e “thana” të pakokrra  
 E krejt fjalë à la zhon – tûrka,  
 Qi më sa shpata ndër furka,  
 Aq n’gojë t’tyne kto kanë hije:  
 Fjeshtë makllada komedije.  
 Edhe kshtu né asht tue na rá  
 Me pa sod shka jem’ tue pá:  
 Me pa popullin t’ngrâtë tue kjá,  
 Me pa popullin t’mjerë pa bukë  
 E, me pa pështetë m’kulltukë  
 Muhaxhirë edhe spathokë,  
 Matrahula e njerz t’pa kokë:  
 T’cillt, kërtylë, si t’mbajtun n’tark  
 E me ‘i zemër leprit n’bark,  
 Na janë ngrefun për “dëshmorë”,  
 Edhe marrë Financën n’dorë  
 E marrë n’dorë edhe fuqinë,  
 Qifllek t’vetin bâ Shqipninë,  
 Po rruejn petlla e makerona,  
 Po dajnë lira e napoljona:  
 E si orrla e si kojrrila,  
 Tuj u endë m’automobila.  
 Poshtë-përpetë nëpër Shqipni,  
 Si ‘i herë Mbretënt koçi:  
 Kta qi – ‘i palë – s’kanë pasë me u ngî  
 As bukë thatë t’pjekun në hî  
 E, der djé, mos tjetër gjâ,  
 Pásë i kanë vithet n’shullâ  
 Edhe, bésa, n’nâde e n’mbrâme  
 Kanë nje n’shllinë e kanë zie bâme  
 E t’kanë repë morrin për kâme,  
 Si çdo tjetër matrapaz.

## BABATASI

E prandej un do t'pëlsas  
 Poshtë – përpjetë nëpër Tiranë  
 Se për shoq mue më kanë dhanë:  
 Nji mendiz qi s'asht mendiz,  
 As me çilë kund ndo'i gjeriz,  
 Jo mâ m'kamë me ngrefë Muzej  
 N'dashtë të vogjël, n'dashtë të mdhej,  
 Ky asht mendiz veç syretá!  
 Pse, tue kenë se asht akrabá  
 Me ata t'Ndershëmit zotëni,  
 Qi luejn shtregull me Shqipni,  
 edhe kshtu "tagër" tue pásë  
 N'budget t'onë mbrenda me u rrásë  
 E me hangër – sado i huej –  
 Gjashtqind frangat muej për muej,  
 Duhej t'kishte 'i titull m'vedi:  
 Qeverija edhe ia gjeti  
 Titllin ktij, tue quejt ekspert;  
 Si nuk pat as turp as dert  
 Me quejt' n'rrênë "bibliotekar",  
 (me nji rrogë treqind frangsh ar)  
 Dike tjetër m'Kshill Kombtar,  
 Ku, jo veç s'ka bibliotekë,  
 Por, me pasë ti për t'u rrékë  
 Nji javë ditë n'atë Kshill, nuk ké,  
 Për t'hasëm'libër kûnd për bé;  
 Pse, mjerisht, doke asht ndër né,  
 -Si ndër pupuj gjymsë – barbarë –  
 Me u çilë zyret për zyrtarë,  
 Jo zyrtarët me u zgjedhë për zyre  
 E prandej sod ketë linjyre –  
 Ketë mendiz – ekspert e kam  
 Nepër kamë sabah e aksham,  
 Der sa vetë – nga poshtë – përpjetë,  
 Kaq jam lodhë e kputë e lmekë,  
 Sa qi n'mënd e kam me hjekë  
 Dorë prej punet t'ktij Muzéut,  
 Dalë ku t' dalë "lulzimi i Atdhéut";  
 Pse edhe kshtu s'po mújë m'e qitë.

## DREJTORI B

Jo, zotni, asht mirë me pritë  
 Kush e di si puna sillet:  
 Sod asht vrântë e neser kthielllet.

## BABATASI

S'ka shka kthiellet: Pse edhe vetë  
Arkeolog s'jam.

## DREJTORI B

E vërtetë;  
Me gjith kta kishe me thanë,  
Se s'ban mirë punën m'e lânë:  
Mbasi zjarmi shpisë 'i asht dhânë,  
Pse mos t'ndezësh m'té cingaren?...  
A din shka? Ndigjo kumbaren,  
Se mârë puna ka me t'dalë.  
Del n'pazar e blejë një kalë,  
Tuj e qitë n'kredit t'Muzéut,  
"Për lulzim e nderë t'Atdhéut".

## BABATASI

Po, ketë punë e kam mendue  
Edhe un vetë. Veç se nuk due  
Me blé kalë: Tham, ma për s'marit  
M'del me blé një zog gomarit;  
Pse gomari bjen mâ lirë.  
E din vetë, se n'ketë kohë t'vshtirë  
Nuk asht, besà, kurrkund ngâja  
Me bâ kot shpenzime t'mdhaja.  
Por gomarin, lum zotnija,  
Due m'e blé me pare t'mija,  
E jo me kredit t'Muzeut:  
Me u përzie s'due n'gjak t'Atdhéut;  
Pse edhe mjaft rodi i Shqiptarit  
Sod me sod aj pare arit  
Asht tue lá për shpirt t'gomarit.

Kalon aty pari një katundar me gomar për dore, tue çue me e  
shitë.

## DREJTORI B

Që, zotni, 'i gomar për ty....  
Bukuri me u pá me sy,  
Kurrkund sho'jn un s'ia kam pá.  
Kqyrja veshët një herë sa i ká:  
Me të dy, po, (tham), del s'pakut  
Për Ministër një bisht "frakut",  
Ndoshta, ndoshta, edhe 'i "kravatë".  
Syni i keq oh! Mos e pát'të.

Parsmja gjanë e bishti gjatë;  
 Sho'jn kurrkund ti pá s'ia ké  
 N'Barbullush as n'Myzeqé.  
 Nji gomar – tamand gomár,  
 N'daç për shálë, n'daç për samár;  
 Marshallah edhe kenka i ri,  
 Turru e bleje, brè fatzi;  
 Pse nuk hasë má m'sho'jn e tij.

BABATASI  
 (katundarit)

Héj, ti burrë! Sa po m'a shet  
 Njat gomar?

KATUNDARI

Asht alamet  
 Gomarit, t'ngjatët Zoti jetën!  
 E, me dashtë me thanë t'vërtetën ,  
 Shoqin pá s'i a ké kujë n'derë:  
 Thue ásht mushk ndër gomarë tjerë.

BABATASI

Nejse mâ: Sa napoljona  
 M'lypë për té?

KATUNDARI

Pesqind korona  
 Pak kishin me kënë,vallahi;  
 Veç tash s'voni u ka hupë pahi  
 -S'dij se pse – kualve e gomarve,  
 E s'po shiten n'dorë t'tregtarve  
 M'ep m'té katërqind korona.

BABATASI

Jo; janë shumë. Gjashtë napoljona  
 Mjaft ké.

KATUNDARI

Jo, janë pak, zotni.

## BABATASI

Nuk janë pak, besà, or dai:  
Gjashtë napoljona a e din ku vrasin?

## KATUNDARI

Po, po, e dij; veç nuk ia gjasin  
Kurrkund, besa, t'u ngjatët jeta!  
Me gjith kta, mbasi kuleta  
Thatë m'ka ngelë mue t'mjerit n'gji  
E, me lá kam do "vergî",  
S'kam shka bâj: M'ep shka t'duesh vetë:  
Drue bles tjerë se s'mujë me gjetë.  
Pse, t'mos isht'se tregu asht ndalë,  
Me Itali, e as mushk as kalë  
E as gomar ma atje s'mund t'dalë,  
Tetë napolona un t'kish kputë  
M'kambë e m'dorë e pa t'u lutë.  
Veç, mbasi un nuk kam, i shkreti,  
Si me pritë der t'çilet deti,  
Për me i nisë gomarët përjashta,  
E, tuj m'lanë asht edhe kashta,  
I pash' hajrin! Tùk e ké,  
Se gjâ t'mirë, manà, ké blé:  
M'ksi gomarit nuk hasë mâ.

## BABATASI

Ç'rodit asht? A thue din gjâ?

## KATUNDARI

Nuk e dij – besa, zotni;  
Se ky n'vâthë mue nuk m'ka lé.  
Un për qár këte e kam blé  
M'rrugë të Prezës, s'ka nji muej,  
E kam blé prej s'dij se kuj.  
Veç aj burri m'tha se n'arë  
Gjetë e paska ketë gomar,  
Lshue pa zot, tue kullotë bår,  
Edhe e marrka e e çueka n'shpi,  
Ku e leçitka nëpër fqj.  
Por i zoti kund s'i duel  
Me té, atëherë, aj kënka ulë  
Për me dalë me rá n'Tiranë  
Pse dikush i paska thanë  
Se Tirana lypë gomarë

Sa ma t'mdhej: Si për samar,  
 Si për shalë: E, se me ár  
 I pagueka mirë gomarët –  
 Me një të ar qi lajn' shqiptarët....

#### BABATASI

(mbasi i ka pague 6 napoljonat)

N'qoftë se punë tepër nuk ké,  
 A po vjen ti bashkë me né  
 Për m'e çue der té hanxhija  
 Ketë gomar?

#### KATUNDARI

Po, lum zotnija;  
 Der ku t'm'thuesh po vi me jue,  
 Pse për ngut nuk kam qillue.

Nisen me shkue. Babatasi e Drejtori B para,  
 katundari mbrapa, me gomar për dore.

#### DREJTORI B

(Babatasit)

Váll, traktatit të tregtisë  
 N'mjes Shqipnisë e Italisë,  
 Qi tash mâ se nji motmot  
 Kjë bâ gati, pse der m'sot  
 Qeverija s'i vû dorë,  
 Por là fushë edhe malcorë  
 Me u thá ûjet t'ngratët té shpija,  
 Kë s'u ban pare bagtija?

#### BABATASI

Dorë traktatit nuk i vue,  
 -Ashtu mëndja si m'thotë mue –  
 Pse Italiya e Shqipnija  
 Me "hânë pisk" po thonë, janë pá  
 -S'dij p'r 'imend a syretá –  
 Edhe kshtu Qevrija e jonë  
 Shtyn traktatin sa mâ vonë,  
 Për me u dukë Qevri kombtare:  
 Sado qi Qevri pa paré,  
 Si me thanë: Tamand shqiptare.  
 Veç, si 'i ditë un kam ndigjue,  
 Qeverija ka vendue

Njat Kolë Thaçin n’Romë me e çue,  
 Kola, po, nieri me kokë,  
 Kokë tamand – peshue me okë  
 Oka katërqind derhem:  
 Krejt njashtu si ban lazem  
 Qi t’jët koka e Delekatit,  
 Për me i vumun dorë traktatit.  
 Pra, kur dita e bardhë t’agojë,  
 Qi Kolë Thaçi n’Romë të shkojë,  
 Kanë me u sjellun punët për s’marit,  
 Pse një herë – e pikë ma s’parit,  
 Ka me i hecë ktij djeta arit.  
 Me “shpërblime” e “përfaqsimë”  
 “Të pandehne” e “t’pandehne”,  
 “Simbas ligjit”, s’dij me ç’datë,  
 Sado qi arka ka mbetë m’t’thatë,  
 Masandej kah pak kah pak  
 Ka me u vû punve kapak,  
 Edhe Itale e Shqiptari  
 Kanë me u ndezun flakë n’dashni  
 -Merret vesht, njana edhe tjetra –  
 E, tu’ u dashtun mirë me kthetra,  
 Kryet shò – shoqes kanë m’i a Imue,  
 Krah e m’krah, edhe tuj kndue  
 Mårë e mårë si’i parë zamåre,  
 Kanë me marrë njat kangë shqyptare:  
 “Hajde hajde, Ali Dervëlla:  
 Po kush t’qiti n’kto punë t’ kthëlla!”  
 Edhe atëherë Ministri i jonë  
 Ka me u çue ‘i sahat mâ vonë –  
 Kah mjesdita a njatypari:  
 Kur m’e çue t’shkojë Sekretari,  
 Për me i thånë se i zoti i shpisë  
 S’Legacjonit t’Shqiptarisë  
 Nëpër mjet të Policisë,  
 I kënohet për qirå  
 Qi shtatë muej ka mbetë pa lå;  
 Pse as n’Evropë, besà, qiraja  
 Nuk po u latë me mushkaja  
 Qi Kolë Thaçi suell n’Tiranë,  
 Kur prej Belgjit kthej n’ketë anë....  
 Prå, si thashë, kur n’Kvirinal  
 T’shkojë Ministri “okcidental” –  
 Ky Ministri i Shqiptarisë,  
 T’shkojë me “çantë” t’diplomacisë,  
 Gjatë dy pllambë “cilindrin” m’ krye,  
 Ngrí manshetat n’dorë mbërthye,  
 Si aj Bismarku hapa – hapa,



Un shpresoj se atë – herë e mbrapa  
 Do t'na siellen punët për s'marit  
 E, n'Shqipni nji zog gomarit  
 S'ka me u gjetë as n'Barbullush  
 Persë i lirë do t'jetë gjithkush  
 -Si traktati t'jetë nënshkrue –  
 Në dhé t'huej gomarët me i çue....

DREJTORI B

(tue qeshë nën mustak, katundarit)

Si po e çoni n'atë katund?

KATUNDARI

Besà, keq, si n'ujë t'pafund,  
 tu'u përpjekë si peshku n'zall;  
 Me t'u bâ mos me kenë gjáll.  
 Eja rreth e gjithmonë zhàrg,  
 Zdathë e zdeshtë e pa bukë n'bark,  
 Mbytnun n'borxh e me 'i tubë fmí,  
 Na shkon jeta si â mâ zí:  
 Gjymssa n'burg, gjymssa angâri;  
 Bájë zyrtarë, e bájë shkatrrina,  
 Bájë dajakun sá t'hà shpina:  
 Si "mo', Zot! Ma keq për né",  
 Qi bâjm hije për mbi dhé!

BABATASI

Shka? Shka?...Nierzt e Qeverisë  
 Rrahin burrat e Shqipnisë?

KATUNDARI

Besà, po, zotni: M'dajak!  
 Edhe ktu, mor samadak,  
 Shkon dajaku për mustak;  
 Sa mâ i madh qi t'jet mustaku,  
 Aq ma i trëshë gërset dajaku,  
 Aq ma tepër gurgllon gjaku.  
 Na nën Turk, zotni kem' kênë,  
 E un po t'tham po, un qi 'am i kshtênë  
 -Lé n'Dervënd, mbi Urë të Gjolës –  
 Se, t'thuesh, kurr Turku i Stambollës  
 S'i a ka bâ Shqipnisë ketë dhunë;  
 Me rrahë njerzit punë e pa punë,  
 Si po i rreh sot Qeverija.

Sod po e dijm, po, shka asht robnija,  
 Q'se spathokët e Qeverisë,  
 -Faqja e ngrihtë e gjith Shqipnisë –  
 Qi der djé as arrën n'dorë  
 Ngranë s'ua kishe, drun' m'malcorë  
 E, m'fshatarë tue sjellun janë,  
 "Simbas urdhnash marrë n'Tiranë".  
 E, prá ná me gjak e pare  
 M'kamë e mbajmë Qevrinë shqiptare!

#### BABATASI (Drejtorit B)

S'ka ku shkon puna ma zi.  
 Se, për Zotin, Qeveri  
 Kjo nuk asht: Asht kjo një çetë  
 Njertzsh t'pa njoftun, t'cillt as vetë  
 S'din shka duen; e, t'mos isht' fillanxa –  
 Të mos isht', due t'tham, Financa  
 Qi me i mbajtun lidhë n'mjes vedit,  
 Kta Shqipninë shi atij t'shkorretit,  
 Do t'ia falshin. I njof mirë  
 Gjinden un. Prandej asht vshtirë  
 Me i luejt vëndit.  
 (mbrijn té hani; katundarit)  
 Tash, lum djali  
 T'falem nderës; se mâ s'po t'ndali.  
 Udha e mbarë!

#### KATUNDARI

T'mbarë paç! Zotni,  
 N'kjé se t'vjen ty n'terezi,  
 Thueje 'i fjalë n'atë Qeveri:  
 Se, për Zotin, kjoftë lëvdue! –  
 Po shkoi puna si ka shkue,  
 Mârë Shqipnija ka mbarue.

AKT' I TRETË  
METAMORFOZA

Drejtorija e Muzeut

BABATASI  
(vetëm)

Ju rrugaça e sallahâna,  
Vagabonda shakllabâna,  
Rriqna t'ndyet, mikrobë të kqi,  
Qi të mjerës moj Shqipni  
Kthelltë hî i keni në mushkni,  
Pa dhimbë gjakun tuj ia pi,  
Po der kur, brè batakçi!  
Brè coftina, kalbë mbi dhé! –  
Der kur ju, tu' u tallë npër né,  
Do t'na qelbni fis e Atdhé?  
Ah! Brè ju....nuk dij shka u kjoftë,  
Se tash mâ jemi tue u njoftë,  
Se kush jini e se shka jîni,  
Se kah shkoni e se kah vîni,  
Plang e shpi se kah i kîni  
E sa pare u ban ju gjaku:  
Se për ju, po, duhet laku,  
Për me u vjêrrë – o kund m'do 'i shpàt!  
Deri dje, pa kmishë mbi shtat,  
Me 'i gjysmë setre t'pa astar,  
Lshuemun krahve kalavar  
E me 'i komçë t'njitne nën grykë:  
Pantallonat me "gjyslykë"  
Kto edhe lidhun me një spagë:  
Shtatit rreshkë e bâ saragë,  
T'tanë gordec – e berdalec,  
Pa ndo 'i msim, pa ndonji dije,  
Me 'i "fillore" a një iptadije,  
Erz e shpirt qitun nën themër:  
Turq a Slavë a Grek me zemër,  
Falun barkun veç Shqipnisë,  
Si ajo marrja e t'gjith njerzisë....  
Tuj u shitë ju për gjithë treg,  
Sod na mbahi "Skanderbeg",  
E ngërdhucë, goditë, lëmue,  
Rrue e qethë, pipirique,  
Tash n' "smoking" tash në "bon-jour"  
Ju, qi djé s'kishi as ushkuer  
Me lidhë brekët – me nderë me thânë –

(HinëDrejtori A)

DREJTORI A

T'u ngjatët jeta!

BABATASI

T'u ngjatët jeta!

DREJTORI A

Zotëni, ktu m'ka dërgue  
 Vetë Ministri, me t'diftue  
 Se, për t'ndreqë Muzén kombtár  
 Ka me ardhë nji dijetár,  
 Doktor universitetit,  
 Sjellë n'Shqipni me pare t'shtetit,  
 Arkeolog ky n'nám e n'zâ:  
 Si rrfen puna qi ka bâ,  
 Edhe veprat qi ka qitë.  
 Na për sânde jem tue pritë;  
 Edhe, t'ardhmen në Tiranë,  
 Në dorë t'tij na kem' m'e lânë  
 Të gjith punën e Muzéut,  
 Si e lypë puna e e mâra e Atdhéut.  
 Prandaj, tash, ti, lum zotnija  
 Ké për t'lshuemun ndër duer t'tija  
 T'tana punët e Arkeologjisë  
 Me gjith zyre t'drejtorisë.

BABATASI

Po, zotni; me gjith gëzim.  
 Ky për mue, po, asht nji vendim  
 Pjekë me krye, jo njëshë me kambë,  
 Njëshë me kambë – e pré me dhâmbë  
 Si zanat qi e ká pasë bâmë,  
 (sidomos njitash t'é vona)  
 Qeverija e naltë e jona  
 Qi me urdhna e me dekreta,  
 E me ato programa t'veta,  
 Ka bâ zyret lâmbë besimit  
 Edhe bâ i ka mjet ushqimit  
 Për do npunsa – farke s'vjetër,  
 T'cillt mund t'jenë, po, gjithshka tjetër,  
 Veç se npunsa jo. Prandej,  
 (T'thonë shka t'thonë do njerz të mdhej)

Për me i sjellë punët t'ona mbârë  
 Ktu duen sjellë njerëz dijetarë  
 Prej Evropet: Profesorë  
 Edhe eksperta: E ktyne n'dorë  
 Me ja u lshue administratën,  
 Me do sharte: Ashtu si patën  
 Bâ n'Japan, kur kjo mbretni  
 Nisi s'parit me u përtrî;  
 Pse na, besa, sot me sot  
 S'kemi njerz njimend të zott  
 Qi m'ia sjellë të mbârën vendit  
 Kot me i bâ na læk kuvendit;  
 Se manà, mirë fort e dijm,  
 Se sa duhna e se shka vijm.  
 Se na krûnde jem' n'ketë dhé:  
 S'njeshet bukë, besà, me né,  
 S'mkambet shtet, s'mbahet Atdhé.  
 E po 'imend – t'drejtën m'a thuej –  
 P'r Arkeolog shka i viej un kuj?....  
 Si edhe ti – m'ndiej se po t'tham –  
 Rrogën t'ânde e han haram  
 Pse, me e ndjekë punën hollë – hollë,  
 Ti s'mund t'jesh bedel n'nji shkollë,  
 -Së për shkollë nuk ké kuptim –  
 Jo me t'vû Drejtuer n'Arsim,  
 Anì ku? Në Ministri!  
 E, po 'i palë ndër do zotni,  
 Quejt.....  
 Për sa i blén, m'kallxo t'vërtetën?....  
 Un për vedi t'thom nji fjalë  
 Nuk i marr as me mi falë,  
 Pse nuk dij se shka me i bâ.  
 Kta me mifë, nuk duhen gjâ;  
 Me bajtë dênga, edhe ma pak;  
 Treg me kapë t'qesin n'sakak,  
 N'mal a n'fushë me i çue me lopë,  
 Jé i sugurt se i djerrin n'shkjopë,  
 Me msue n'shkollë, nuk janë të zott;  
 Për auktorë i lypë ti kot;  
 Me i vû n'zyre, jé n'gazep  
 Se t'zhyejn kartat n'mereqep;  
 As i ké ti për kulturë,  
 P'r industri, agrikulturë,  
 Se kta 'i hajr kurr s'e kanë bâ  
 As s'janë dashtë për tjetër gjâ  
 Posë me ngrânë e posë me pi  
 Posë me u tallë npër dugajxhi,  
 Npër mejhane e nëpër kafe,

Me thá dokrra e me qitë llafe,  
 Herë mbi stol, herë mbi “sofá”  
 Tash n’”kapelë”, tash në “qylah”,  
 Kryet n’ajrí e menden trângull,  
 Prej “mastiket” syt mbajtë gângull:  
 Veç, po, dijn, po, me êndë intriga,  
 Me pshtjellë lamsha për karriga  
 E, me u bâ n’Shqipni....ministra,  
 Kur t’kenë pshtue pa u vjerrë m’kapistra.  
 Prandej tham, lùm ti Drejtori,  
 Se – ashtu mu m’difton shpóri –  
 Po s’u vùnë n’administratë  
 Njerz qi dijn me pré e me mâtë,  
 Shqiptarija s’e ka t’gjâtë.  
 Nji kjo faqe qi asht sod gjállë  
 -Posë ndonjâj ndonjâj fort rrállë,  
 T’cillt prandej kanë mbetë në záll –  
 Nuk ka sý me ngrefë Shqipni.  
 Na kem’ prishun nji Turki:  
 T’cilen, ndoshta, edhe e kem’dashtë,  
 Por sugure se e kem ‘drashtë:  
 Jo po t’ngrefim Shqipni t’ré,  
 Për të cillën po bâj bé,  
 Se as s’e duem – as nuk e druem.

#### DREJTORI A

Mirë, zotni, por tham nuk bân  
 N’nji shtet t’lirë e superan  
 Me sjellë t’huej me na sundûe.  
 Kurr ketë punë s’kem m’e durue.

#### BABATASI

Un s’po thom me i prû për Mbretën,  
 Për Ministra e Deputetën:  
 Thom me i prû për “eksperta”  
 -Shka nuk do’ me thânë “shegerta” –  
 Qi ata ‘i herë ktu tash ma s’parit  
 Lè t’na sjellin punët për s’mbârit;  
 Perse né, si thashë ma para;  
 -Mbasi ndodhë kém lara-lara –  
 Nuk na hecë aq fort e mâra:  
 Kë edhe dija na mungon,  
 E vullneti na shkjepon,  
 Ndër kto punët e qytetnisë....  
 -Me t’u smue ty kush i shpisë,  
 Për me e kthye prap n’jet’e n’shndet,

Me 'i herë mjekun çon e thrret;  
 E, sado qi nieri i huej,  
 E sjellë mbrëndë me javë e muej,  
 Edhe ti e gjith shtëpija,  
 Der ku t'mundni, fjalët e tija  
 M'vend i çoni, për shka shndetes  
 I përket. Po a 'imënd ti vetes  
 Rob i thue, pse aj nieri i huej  
 Të vjen mbrendë me javë e muej  
 E, t'ep urdhna e t'ep reçeta  
 Për m'iu ruejtun t'smundit jeta,  
 Npër do mjete e npër do bâre,  
 Qi ti vetë s'i di kurrfare?  
 Jo, prá, jo; pse ti me pare  
 E ké marrë, e n'atë shërbim,  
 Me gjithse aj ka dijé e msim,  
 Nuk asht tjetër veç rrogat.  
 Kshtu, pra, shteti ynë shqiptar  
 Mundet sod me sjellë doktora,  
 Zejetarë e profesora,  
 Për m'e vû n'rregull Shqipninë,  
 Pa cenue kurrkund lirinë,  
 As lirinë – as sypraninë,  
 Për të cillën ti po m'thue  
 Se nuk mundesh me durue  
 T'huejt në zyre me t'sundue.  
 Prandej vetë, të pamen ftyrën  
 E Arkeologut, ia lshoj zyrën,  
 Me gëzim, si t'thashë përpara:  
 Kshtu pse e dij se e lypë e mbara  
 E Muzéut – e e mbara e Atdhéut.  
 E ma tepër due me shitë  
 Njat gomar, qi tash nji ditë  
 N'rrugë t'Kavajës e pata blé.  
 Mbasi tash un në Muzé  
 Dorë as gisht s'kam me pasë mâ,  
 Mue gomari s'm'duhet gjâ.

Hinë nji postjer me nji tubë letra e fletore në dorë:  
 I ep Babatasit fletoren e Shkodrës "Vllaznija" edhe  
 del. Babatasi, tue zhvillue fletoren këndon nën zâ:

"Mori Shkoder, moj mizore,  
 Pak na u duke e shum' na dole".

(Drejtorit A:)

Me shka m'duket lum zotnija,

Po na merr t'keqen "Vllaznija".  
Ndiej ktu 'i herë se shka ka shkruer:

Z.Z. Pajtimtarve t'onë – I vlerti e i palodhshmi bashpuntori  
ynë, zotni S.S. pa pritë pa kujtue asht zhdukë prej këtij  
qyteti. Ia kemi lëshue sogjet për gjith anë por der sod s'kemi  
mujtë me e hetue kurrkund. Prandej, tue na mungue, si me  
thanë: krahi djathtë i yni, kemi me kenë të ngushtuem me  
ndalue për do kohë botimin e fletores.  
Drejtimi

#### DREJTORI A

Ani shka se nuk del mâ  
Kjo fletore. S'duhet gjâ  
Me sa tjerat, qi n'Shqipni  
Janë tue bëjtë si kpurdhat n'shi.  
Besà 'imënd – si thue, zotni? –  
As se tepër garramët  
Janë fletoret për një shtet,  
Kë s'e lânë me përparue,  
Qeverinë tue kritikue  
Mârë e mbrapshtë? Me m'ndigjue mue  
Njajo "Kshilla Ministrore".  
Besà, t'tana kto fletore,  
-Qi s'e viejn, me thanë, një astër –  
Kisht' me i mbyllë, e n'Gjinokatër  
Kisht' me nisë, me hekra n'dorë,  
Redaktorë e bashkuntorë;  
Pse kta janë qi na ngatruojnë  
Shoq me shoq, e na pshtjellojnë  
T'tana punët e Qeverisë  
E, ato planet e "Partisë".  
T'gjith rreziku i Shqiptarisë,  
Tham un, janë këto fletore,  
Kto t'përkohshme përmujore,  
Edhe ajo liria e shtypit –  
Njajo shpata "n'dorë t'magjypit",  
Qi pret t'a' n mshirë aspak.

#### BABATASI

(tue lëshue n'tryezë fletoren)

Ah, jo, jo, mor'samadák:  
Nuk asht gja, besà, ajo fjalë.  
Se un po dij ku don me dalë:  
Don me ruejtë "kulltuk" e "gisht"!  
Por e ké ti krejt anglisht;  
Pse fletoret për një shtet  
Jo veç s'janë një garramet,



Si ti mue po do' me m'thanë,  
 Por ma tepër atojanë  
 Për té 'i armë e fortë. Zotni,  
 Shtypi asht sot nji artiljeri,  
 Qi, si puna e ban dishmi,  
 Rreh ma larg e ushton ma thekshëm,  
 Edhe rrposë fort ma termegshëm  
 Se çdo top e çdo gopedër.  
 Po, po, shtypi asht nji kulshedër  
 Vetëm për Qevri autokrate  
 Për do "klika" e "komitate"  
 T'mshefta e t'ndyta, qi me lák,  
 Qi tuj lá Kombin në gjak,  
 E me rrëna e kaçarrëna  
 Tuj punue pa besë e fé,  
 Gjithmonë tinzi e për nën dhé,  
 Nierz të poshtër e tradhtorë,  
 Duen me mbajtë fuqinë në dorë,  
 Për me shtypë me té lirinë.  
 Për me ndrydhun qytetninë  
 Edhe m'shpinë të popullit t'ngrâtë  
 Me mbajt vedin e akrobatë.  
 Për kta, po, shtypi asht rrezik,  
 Si thue ti e ndo 'i tjetër mik;  
 Se për tjerët shtypi asht nji mjet,  
 Për të cillin sod çdo shtet  
 Ka nevojë. Njëpër gazeta  
 Kombi njef t'drejttat e veta,  
 Njef detyrët, e ato janë sod  
 Qi këtij i dalin zot  
 Kundra dhunës e padrejtsisë,  
 Qi edhe n'mënd ia shtijn Qevrisë  
 Kur do punë janë për t'u bamë  
 E, kur jo. Kështu po e zamë,  
 Se n'nji cillëndo Qevri,  
 -S'jam tue folë për ktu n'Shqipni –  
 Ka ministra batakçi,  
 Njertz kopukë t'pa farë kulture,  
 Zemrën lepër, mendët kobure;  
 Thonin krrabë e kryet matare,  
 Të cillt mbetë si t'kën pa pare  
 Edhe "kashën" t'a kenë thá,  
 Dërgojnë vllazën e akrabá  
 Me leçitun npër Evropë  
 Ktu nji breshtë, atje nji shkjobë,  
 Kndej qymyr, andej vojguri  
 A se edhe ndo 'i rrënojë muri  
 T'kohve t'vjetra, e bajnë kontratë,

Dykuptimçe e me kamatë,  
 Edhe kta po, lùm kumbara,  
 Për xhep t'vet nji herë ma para,  
 Masandej, n'teproftë ndo 'i sënd,  
 Për Atdhé: Thue se njimënd  
 Trashigim shtetin kanë pasë  
 Me gjith tokë, e landë e rrasë.  
 Ndiejn fletorsit për ketë dhunë,  
 Edhe atbotë, besà, me 'iherë  
 T'çohen peshë e bajn poterë  
 E diftojn me shum urti  
 Se Ministrat batakçi  
 S'do t'kenë tagër m'iu përzie  
 Kombit t'mjerë në pasuni  
 E, as s'do t'apin konçesjone  
 Përmbi xehe a përmbi pronë,  
 Edhe kshtu me pëndë thumáte  
 Shkyejn projekte e shkyejn kontráte,  
 Qi kto pyka, mbijtë prej llomit,  
 T'i kënë bâ për dâm të kombit.  
 E, kur n'kohë elektorale  
 Ndonji Qeveri batalle  
 Shpërdoron auktoritetin  
 E me forcë ngushton të shkretin  
 Morë popull, qi s'di gjâ,  
 Me përdhuni me dhanë zâ  
 Qi ndo i cull a kalama,  
 Ndo'i bastardh a ndo'i kopuk,  
 Krye-babune e mullë-terrçuk  
 T'kalangerrçet mbi "kulltuk",  
 Kush ma fort se'i "Orë ndër vallé"-  
 Se 'i gazetë Qebris batalle  
 Ia shtypë hundët e e bjen n'hullí,  
 Si ajo Shkodra e ban dishmí?....  
 Po e shef vetë, pra, tash, zotni,  
 Se fletoret për nji shtet  
 S'janë rrezik as garramet,  
 E se ajo lirija e shtypit  
 S'asht nji shpatë në dorë t'magjypit,  
 Por â mjet, pa t'cillin shteti  
 S'përparon as ktu as n'jeti.

#### DREJTORI A

E, prá s'dij shka do me thânë  
 Qi mue kurr s'asht tue m'u dhânë  
 Me lexue fletoret t'ona –  
 Elë do, qi tash n'e vona

Na kanë nisë me u shkarravitë....  
Deshta t'tham, me dalë në dritë.

### BABATASI

A din pse, mor't'u ngjatët jeta,  
S't'bâhet me lexue gazeta?  
Pse m'gazeta, njitash vonë,  
-Sidomos n'ketë vendin t'onë –  
Asht tue shkruë çdo matrahúl,  
Çdo surrat-qerep krye-túl:  
Njerz rrugaça e krejt batâlla,  
Me dy faqe porsi msâlla,  
Qi, dbue jashtë prej shkollës fillore,  
Bânë kinse me kapë punë dore,  
Tash tue qepun n'ndo 'i prestore,  
Tash tue fshi kafe e hotela,  
Tash n'kujxhi tue ngrefun m'tela,  
E, tue fry me rrshiq n'do farkë,  
A se muça kund n'ndo'i barkë,  
Hamaj dengash n'ndo'i fabrikë,  
Prej ka'ata mandej kanë hikë,  
A se ndoshta janë përzânë,  
Pse me u rritë thonin ki'n lânë...  
Edhe zhël e kundrash shkye,  
Si ato mizat të pa krye,  
"Kanë marrë detin-o me sye"  
E kanë dalë në dhé të huej:  
Ktu nji javë, atje nji muej:  
Ha e pi e mos paguej:  
Shitu princa e profesora,  
Shitu béj, shitu doktora:  
Shkoje ditën ndër sokaqe  
Kalo natën ndër handraqe:  
Gënje shok e trdhto mik  
Për nji llastër "metelik",  
E kur, mbetë me miza n'grusht,  
Me gjallnim kta kanë rá ngusht,  
Vú qeleshen m'njanin sye,  
Kanë marrë rrugën e kanë kthye,  
E kùk vetllat m'ball ngërthye,  
Ngrefë tureçkat për "dëshmorë"  
Përly kanë pëndën në dorë  
E t'kanë nisë kinsë me shkruë:  
Jo kshtu shteti dò sundue,  
Jo na jémi demokrat:  
Nuk duem Prift as nuk duem Frat:  
Jezuitt duen ndrydhë nën bàt;

Se kta janë “obskurantista”  
 “Kantonista” e “monarkista”,  
 Qi veç barkun duen me fâ.  
 Jo, po, kleri s’duhet gjâ;  
 Edhe shkolla fillestare  
 Ktu do t’jët fjesht afetare.  
 “Sepse” jemi “oksidentala”;  
 S’rrêhna mâ, jo, me kopalla.  
 N’Parlament kleri s’do t’shkojë,  
 Se ata janë si qymja n’gojë  
 Qi s’del jashtë as nuk përdihet:  
 “Sepse” klerit bésë s’i zíhet!  
 Kshtu Voltaire e kshtu Mazzini,  
 Kështu Bûena e kështu Drini,  
 Jo po knetat, jo po plisat:  
 Jo çarçafat, jo binishat....  
 Na Shqipninë e kemi bâmë:  
 Për té desim e s’e lâmë  
 Me ná e prishun “tradhëtorët”.  
 Se un për vedi kam Malcorët:  
 Jo, un Toskninë e kam në xhep:  
 Me mue Dibra merr e ep. –  
 Edhe kshtu, po, qep e shkëp,  
 Me një shqipe për gazep  
 E, si t’ishin në kllápi,  
 Pa kqyrë çák, pa mbajtë hulli,  
 Pa pasë shkrimi as kâmë as krye,  
 N’mereqep kartat kanë zhye,  
 E t’kanë pjëllë – me nderë me thanë –  
 Njata artikuj, qi ty dhânë  
 S’t’asht der sod me u vû me i kndue.  
 Se ata, besà – m’ndigjo mue –  
 Nuk i kanë shkrimet zanát:  
 S’janë për pëndë, por janë për shát.  
 Jo po, kshtu asht, mor’t’u ngjatët jeta!  
 Për me shkruë, zotni, m’gazeta  
 Duhet shkruesi t’jet mâ páre  
 Nieri i ndershëm e atdhetár.  
 T’jetë fisnik, zemër-bujár,  
 Jo intrigant e ngatrestár,  
 Edhe kënë mos t’két afije.  
 Mandej duhet qi t’ket dijé –  
 Dijé t’hapët n’ekonomi,  
 N’histori e në tregti,  
 N’politikë e në drejtsi;  
 Edhe t’dijë shk’asht shkolla e msimi,  
 Shka asht lirija e qytetnimi,  
 T’jetë Shqiptar në shkrim e n’gojë

Fjala n'pëndë mos t'i ngúrrojë:  
 Mârë e mârë punët t'i kallxojë,  
 Me t'ngushtue me kndue përdhûni  
 Shka ndër shtylla rresht aj vûni,  
 Tashti, pra, nji sallahàn,  
 Vagabond e shakllabàn,  
 Nieri idjótë e laramàn,  
 Qi mendon se për tamàn  
 Të tanë bota rri n' "sahàn",  
 Shka mund t'shkruiej, po t'pves un ty,  
 Ky qi as byk nuk ka në krye,  
 Jo mâ trû?

#### DREJTORI A

Si urdhnon e thue –  
 M'a nep lejen, zot, me shkue,  
 Pse pak tepër jam vonue.  
 Mirë u pashim! – T'u ngjatët jeta! (del).

#### BABATASI

Udha e mbarë, e t'u ngjatët jeta! –  
 Mbasi sod asht ditë pazarit,  
 Po e qes n'treg atë zog gomarit  
 Qi paçë blé për punë t'Muzeut,  
 "Për Lulzim e nderë t'Atdheut"  
 Pàle i'herë a e blén ndokush.  
 Mana, drue se s'do t'dalë kush  
 Myshteri; pse Barbullush  
 Asht bâ sod edhe Tirana.

Oborri i Muzeut. – Dita e të çilunit t'Asamblesë Kushtetuese.  
 (Gomari lidhë m'kûj. Babatasi e zgjidhë e niset me dalë  
 me gomar për dore. Porsa kanë mbrijtë të portarja, gomari  
 ndrron formë e prej hijes s'tij del S. S., korrispondenti i  
 fletores  
 "Vllaznija". Frëni i lavjerrët m'qafë e shala i bjen té kambët.)

S.S.

Zotëni!

#### BABATASI

(Sjellë kryet, e, tue mos pa gomarin, thotë në habí:)

Palè!....Ç' m'u bâ,

Tash qomari?

45

S.S.

Mos bân zâ,  
Zotëni, se un jam....

BABATASI

Gomari  
Ti?...

S.S.

Si urdhnon, po; vetë. Veç s'pari,  
T'lutem, fol kadalë.

BABATASI

Çudi!  
Si tash, ti gomar?

S.S.

Zotni,  
Po vetë jam gomari i yt:  
A s'm'â shef ti frënin m'fyt,  
Edhe shala si m'ka rá  
Poshtë té kambët?....

BABATASI

Po, jam tue i pá.  
Veç si mundet, tash, me kënë  
Njikjo punë, s'e di. A mos m'rrënë,  
More i patenzonë?

S.S.

Jo, besà,  
Jo: S'ka rrënë, as s'ka ngatresa;  
Veç të drejtën ktu po t'tham,  
Se gomari i yt un jam:  
Po, a thue veshët ti pa s'mi ké?

BABATASI

Po a gomar ti paske lé,  
A veç bâ jé masandej!

S.S.

Jo zotni; q'n'vjeshtë e tëktej  
 Qi un jam bâ gomar. Përpara  
 Kam kenë njeri....

BABATASI

Lara-lara  
 Mjaft, kujtoj, e stramastik....  
 Kámë-kujrril e krye-lladik....  
 Por kallxo si kênke bâ  
 Ti gomar!...

S.S.

Mos kjosha mâ! –  
 Kur u bânë zgjedhjet në Shkodër  
 E "Opozita" luejti atë lodër,  
 Si e din vetë, një zotëni,  
 Qi e kish mirë me Qeveri  
 E, qi vû aj kishte dhámb  
 M"Opozitë", për me i bâ dâm  
 M'lutë me i qitë një Dityramb'  
 Kundra "Orës s'Maleve". Edhe vetë,  
 Qi kurr kenë nuk jam poetë,  
 Por, si ngjeshëm kish'qillue,  
 N' fjalë t'ti u vuna, atëherë, me shkruë,  
 E me krraba e me çengela,  
 Mbasi zhvjeva do kartela,  
 edhe 'i javë bana haram,  
 N'dritë e qita atë Dityramb,  
 Tue e quejtë: "Vallja Popullore".

BABATASI

Mbasi vjershat s't'vijm për dore,  
 Përse ti m'i a hi asaj kangë?  
 Po a nuk ké ti tjetër rangë,  
 Qi ia nisë vjersha me shkruë?...  
 Mbasandej: Ku ké mbarue  
 -N'kjoftë se n'krye ké mënd ndo'i fije –  
 Se, me atë buzë, porsì opângë dhije,  
 E me atë gjuhë – motrë e çangalleve  
 Ti po qet me 'i "Orë të Maleve",  
 Qi shitue ka tjerë kaprrëça,  
 Jo mâ ty e do kakarëça  
 Tjerë, shokë t'ue.

S.S.

E dij, zotni.  
 Oh! Po, mirë, mirë fort e di.  
 Se sa i rrebtë asht pezmi i sáj:  
 S'lën anmik pa bâ me váj;  
 Si sivjet kém' mujtë me pá,  
 Kë Shqipninë mbarë trândë e ká;  
 Por un deshta me t'kallxue  
 Se mue shnjalli m'pat germue  
 Mbrendë n'atë Dityramb me shtî  
 Disa fjalë, mjaft pa njerzi,  
 Kundra Fretënve shqiptarë.

BABATASI

T'a kish dijtë ketë fjalë ma parë,  
 Un ty m'shpinë t'kish vû samar  
 E, jo shalë. Ç'ké me Fretën,  
 Qi shnjerzue e ké ti veten,  
 Për tá n'shkrim tue folë pa lá?

S.S.

Un? Kurrnja, besà, e tue pá  
 Jam gabimin t'em me sy,  
 Se s'asht mirë kënd n'shkrim me fye.  
 Por, zotni, shnjerzue un kam veten;  
 Jo veç folë se kam për Fretën,  
 Por mâ tepër, tue vû gojë.  
 -Për pa pasë kurrkund nevojë –  
 Mbi drejtuer të "Hyllit t'Dritës",  
 Qi as Qevrisë as "Opozitës"  
 E, as Shqipnisë s'i ka sjellë dâm.

BABATASI

E ti shtî e ké n'Dityramb?

S.S.

Po, zotni; por npër terthuer.

BABATASI

Hangké bar, e? – e po qysh kur? –  
 Qi s'po mujtka aj me u kujtue  
 Se për ké n'vjeshtë ké guksue....



S.S.

Jo, po pra, si kjeçë tue thânë,  
 Un me kaq t'a kishe lânë,  
 Ndoshta s'kjé tue m'gjetë shka m'gjet:  
 Për gomar me u shitë n'pazar,  
 Por mue sorra m'i piu mëndt,  
 Edhe kapa do krení,  
 Kinse kshtu shkruiej Dityramba  
 E ja lâ gjithkujë në zhel,  
 Kur t'më kapet mendja tel,  
 E medje – ty t'u ngjatët jeta! –  
 Njikaq mendja mue m'u rrit,  
 Qi un nji ditë dola prej Shkodret  
 Edhe u nisa për Parnas,  
 Ku lodrojnë Orë edhe Zana,  
 Kin me marrë un kezen larit.

BABATASI

A se veshët e nji magjarit....

S.S.

Jo, po, ashtu mandej duel puna –  
 Kur u kapa n'vrrí t'Parnasit,  
 Lâgë e ndrâgë e kputun rruget,  
 Qé po shof se, Ishue pa zot,  
 Po kullotte i hjëdhtë Pagasi  
 Npër ato rudina t'blera,  
 Ku lulzon gjithmonë prendvera  
 E s'ka dimën as rreh era  
 Lodhë e kputë si un kish' qillue,  
 Tèk e pava, i kceva m'shpinë,  
 Edhe e Ishova brijs s'Parnasit,  
 Mos m'e e pa dy herë me sy.  
 Ashtu m't katrat Ishue Pegasin  
 Gjatë asaj termales s'rryeshme,  
 Kam nisë kangën me kendue  
 Dityrambin, qi kish' shkruie,  
 Kin' mërzin' un me kalue.  
 Veç, zotni, shka me t'kallxue!  
 Porsa mora atë kangë me kndue,  
 Nisë Pegasi me turfillue,  
 Nisë me hjedhë, nisë me u tërbue,  
 Porsi thërë t'a kish m'mamuza.  
 Iu kukzova, atëherë, mbi shpinë,  
 Me t'dy duert qafën ia rroka

E mbërthye kamët nën bark t'tij,  
 U mundova me të qindrue.  
 Por se kot, besà, zotni,  
 Pse t'u çue shàh m'kamë t'para,  
 Edhe t'm' hòdh, si planc, n'nji prroskë.  
 Gjysa e s'keq'; por se m'i vuni  
 Shtjelma brish' njadisa hera,  
 Qi edhe sod, besà, m'dhëm shtati.

#### BABATASI

Brè qi, kur fryte shirok,  
 Edhe t'lshojshe ndo 'i herë tròk,  
 Shkojshe rrugës ti tue marrë m'thue.

S.S.

Po, zotni; si urdhnon e thue! –  
 Ndìç, atëherë, qita bërtita,  
 Porsi shpirt i keq n'gajúsh.  
 Rrânë n'atë brîmë Orë edhe Zana,  
 Edhe muerën me m'pëvetë  
 Se shka sjellë m'kishte m'atë bjeshkë  
 E pse ashtu gërthitë un kishë.  
 Edhe un punën ua kumtova  
 Gjithsesi fill' e për pê.  
 Kur ka ndie Zana Kajlopè'  
 Për guxim qi un kishë pasun,  
 Gur me gur m'hukati e Mira,  
 Njiketë námë tue Ishue mâ t'mbramen:  
 "Ti m'u bâsh gomar me veshë,  
 Der m'atë ditë qi n'Shqipni  
 Asambleja t'çilet s'parit"....

#### BABATASI

Edhe ti u bane gomar?

S.S.

Po, zotni. Shì n'herë të parë  
 Qi m'Parnas m'hukáti Zâna,  
 Fill gomar me veshë u bâna:  
 Krejt njashtu si pá ti m'ké  
 M'rrugë t'Kavajës kur m'pate blé.

## BABATASI

Çúdë me bâ!

S.S.

Po, pra, zotni;  
 Se me rrëjtë, besà, nuk di:  
 Nuk t'a tham një fjalë p'r'i tjetër.  
 Ti edhe këndue do t'keshë në letër  
 Si njëj Aelius'. Shkrues i vjetër,  
 Na kallxon për s'dij se ç'nieri,  
 Qi këtë bâ gomar pa hiri  
 Tue u lye me do bar shtrigash,  
 Nuk e dij se n'ç'rasë intrigash.  
 Jo qi vetë mujë me t'diftue  
 Se n'Parnas un kam ndigjue  
 Orë e Zana tue ligjrue  
 Për një tjetër djalë shkrimtar,  
 Qi edhe ky, shtatë muej ma parë,  
 Paskà kë në térnue n'gomar.  
 A e njëf ti 'i farë Nebil Çike,  
 -Turk a s'dij se i cillës fabrike –  
 Qi m'nji lvere masonike  
 Quejt "Revistë Pedagogjike"  
 Ia pàt nisë kinse me u kapë  
 Me "Hyll t'Dritës", e klér e Papë?  
 Këtë tésh prá Pallas Athina  
 Për arsye qi poshtërsina  
 Ky kisht' shkruet për "Hyll të Dritës",  
 Námë e paska një "dishditës"  
 Edhe ky shkrimtar çyçek  
 Kenka bâ me 'iherë "Eshék",  
 A se shqyp m'e thanë mâ mârë:  
 Kenka bâ me 'iherë gomar;  
 E jo veç për dy a tre muej  
 Si un këtë bâ, por (posë gjithkujë)  
 Ky këtë bâ gomar për ymër;  
 N'mos e njëfsh, e ké n'Tiranë  
 Tuj bajtë m' "karro" pleh e ranë,  
 Per "Reformë" t'nji "burgu" t'gjanë  
 Mbrenda Ministrisë s'Arsimit.

## BABATASI

Mirë ia paska bâ kulimit!  
 Por as ty keq bâ s't'a ká,  
 Pse, po n'mënd tash asht tue m'rá

Se kto fjalë, si në kllapí,  
 Shkrue i ka pasun në “Vllazní”,  
 Kur stërklatshe ti gazetën,  
 Tue bâ fjalë për Deputetën:  
 “Se do t’kthejm në Shkodër-o,  
 Për me lidhë gomarin-o  
 Si e pat lidhë até dikur  
 Nji poetë, me ‘i copë ushkur.  
 Lassen Sie nur  
 Edhe tash mirë tue pá.  
 Se ké paske dashtë me vrá  
 Me kto fjalë e dokrra t’shkreta.  
 Po a s’din se kur poeta  
 Bân me lidhun nji gomar,  
 Besà, e lidhë ai me litar  
 Edhe ‘i nye ma t’fortë i’a bân,  
 Se pàt kënë neni gordjân,  
 E se vetë, po, shpata e Lekës  
 Nuk e zgjidhë e, mè sa dekës,  
 Pezmit t’tij s’mundesh me ‘i pshtue?  
 Tash, kah t’duesh mundesh me shkue.  
 Edhe i lirë prej mejét jé;  
 Veç, t’a dijshe se borxh m’i ké  
 Gjashtë naplonat qi páçë dhanë  
 Kur gomar t’bleva n’Tiranë;  
 Por, jo sod; palë se kur....

S.S.

Un?... Pse?...

BABATASI  
 (tue i rá qafës me kamxhik)

“Lassen Sie nur!”

S.S. Vehet m’t’hikun tue krue qafën.  
 Babatasi merr rrugën kah Parlamenti,  
 edhe për tash mbaron veprimi.

PJESA E DYTË

VISKU I BABATASIT

## AKT' I PARË

## KONSTITUCIONALËT

## Ana e Asamblesë

Kaherë kafazi i Parlamentit, veshë me çohë të kuqe, ka dalë në Parlament e asht ndëjë qiri n'kambë ndërmjet ziles e anës s'Asamblesë. Shërbtorët e Parlamentit mbushin katrovat me ujë për Deputetët, ndërsa "tellalli" njëherë, e mbasandej xhendarët, me bajoneta ngrefë, urdhnojnë qi të mbyllet pazari. Tiranasi kush shkon në shtëpi, kush rri mbas "tarabave" të dugajës, tue u xé në zjarm e tue pritë qi duhija e së kremtes kombtare të kalojë. Rrugat e banimet janë stolisun me flamurë kombtar. Mbi portare t'oborrit të Parlamentit mvaret një zhel i kuq, me ketë nënshkrim: "Rroftë Parlamentua". Ana e Asamblesë vjen e mbushet pilë e përmaje me zyrtarë, do terzi e "marangona" shkodranë, do tregtarë kontrabandaxhi korçarë, miq Deputetësh. Mbrendë shifën një tri a katër zoja e zojusha, e disa oficera veshë civil. Dy tribunat, ato edhe janë mbushë, si dy kutija sardelesh. Në njanën anë ka xanë vend Këshilli i Naltë, bashkë me do zotni të tjerë të zgjedhun e me një dy skrraje cucash të motnueme të "Kryqit Kuq Amerikan" – të gjata e të thata si dy parë krezhme ortodoksësh. Në tjetrën asht Trupi Diplomatik' Ministri i Anglisë, një levantin "dora vetë", çubardh e balosh në ftyrë; Ministri i Italisë, burrë i njeshun, çufrok, por jo krejt antipatik e i pakrypë, si shumica e Diplomatëve të tjerë, ngulë sytë m'anë prej Pekingut; Ministri i Jugosllavisë, një tesh me t'ngja dishka me me një hû dullije, por synin kokërr. Në një skaj t'anës e kermez në ftyrë, asht ndejë Mihajl Grameno, i cili, tash e ma vonë, ndihet kè thotë, si nëpër dhambë: rezilat, surrat-qerepat, maskarenjt. Ka hi edhe Vinjau qi s'duel i zgjedhun për Deputet në prefekturën e Gjirokastrës.

Hin një çetë Deputetësh. Ma vonë hinë edhe disa të tjerë. Ia mbrrin Kryetari i Parlamentit në "redingot", tanë hundë, tanë veshë e tanë gojë. Ia behin Deputetët e Shkodrës. Një Deputet i Korçës, Tosku, xen vend në kolltuk të vet e hin me folë me një Deputet të Tiranës, të cillit tue i mbarue fjalën, ndihet se i thotë për gaz: "Eh!...Baba!..." Kafazi i bjen ziles. Hinë prap do Deputetë të tjerë. Së mbrami ia bëhë Qeverija. Mbas Qeverijet hin edhe Babatasi, da mjekrren dysh si dy lvore pjepni dhe xën vend diku atje ndër zyrtarë, krej hupë ndër mendime. Atëherë, mbas urdhnit të Kryetarit, shërbëtori mbyll derën e sekretari kndon emnat rresht e rresht mbas rendit alfabetik der në ma të mbramin:

Z. Zija Toptanin.

## KRYETARI

Më kambë tue u mbajtë për tryezë, purë shtatin prej Deputetësh,  
si samâr pështetë për mur.

Shumica asht; mbledhja hapet  
Zotni, n'ketë anë llapet,  
Jem' pështjellë e grumbullue  
Ktu, pse kombi na ka çue...

## BABATASI

(me vedi)

Besà, pra, me ç' m' duket mue,  
 Ktu kurrkush ju s'ju ka çue,  
 Veçse vetë, po, keni rrâ  
 Zhaben t'uej mirë për me fâ.  
 Kombi i ngratë aj nuk din gjâ  
 Se shka keni n'mend me bâ.  
 Ah! Po, mirë ju njoh un ju.

## KRYETARI

Shtetit t'onë themel me i vue,  
 Nji Statut na tue i ndërtue:  
 Nji Statut "oksidental"  
 Si për fushë ashtu për mal.

## TERRTABUCLECI

Nji burrë dishka si jevg: Me nji ftyrë të rreshktë e të zyrtë, si  
 nji mushkni kali, e me do mustakë njeshë faqeve, a thue se  
 ngjitë me tutkall. Çohet e flet, pa lypë fjalën:

E pra vetë kishe me thanë,  
 Se për tash do lanë m'njan'anë  
 Puna e ktij Statuti. Shteti  
 -Si n'Shqipni ashtu edhe njeti –  
 Ka lazëm për Qeveri,  
 Qi me mbajtë kombin n'hullí;  
 Pse, sa për Statut, s'e di  
 Ç'na duhet Statuti né?  
 Qeverija për ketë dhé,  
 Tham, asht mjaft. Statuti asht kot.

## KRYETARI

E vertetë, por, sot për sot,  
 Pa Statut nuk bahet dot:  
 Pa 'i Statut, sado edhe çal,  
 Por qi t'dajë si "oksidental";  
 Pse, po s'pat Statut Shqipnija,  
 Atë e Kombevet Shoqnija  
 Kisht' m'e dbue, besà, prej vetit  
 Si nji rriqën. Prandej Shtetit  
 I do dhanë Statuti.

PALOK CUCA  
(pa lyp fjalën)

E pra,  
Un thom jo. Asht kot me thá  
Dokrra ktu për punë t'Statutit,  
Mbasi endè ligjët e "harbutit"  
Janë n'fuqi ndër né. Nuk bân.  
"Redingoti" me fistan....

Deputetët e partisë qeveritare përplasin kambët;  
ata t'opozitë nji palë qeshin nën mustak, nji palë ulin sytë.

KRYETARI  
(tue i rá ziles)

Lyp fjalën nji herë, zot'rote,  
Mandej fol. Kjo asht krejt fjalë kotë  
E, n' "rend t'ditës" nuk hin aspak –  
Por ksaj fjalë po i vemë kapak;  
Pse, tash, ktu, ju zotëni,  
Këm' nji fjalë me shumë randsi.  
Për me mbajtë Financat n'rregull....

BABATASI  
(me vedi)

Qi me luejtë mandej ju shtregull....

KRYETARI

Do t'isht' mirë qi Asamblastat  
T'merrshin rrogat edhe kistat  
Për tre muej, si "paradhane"....

BABATASI  
(me vedi)

Për me luejtë bixhoz n'mejhane...

KRYETARI

Pra, kush asht i ktij mendimi,  
Që t'na epet sod shpërblimi  
I tre muejvet, t'çohet në kamë.

Të gjithë Asamblistat, pa ndërlirim partish e intrigash, çohen m'kambë, posë P. Ambroz Marlaskajt O.F.M. Kryetari vetë ngrihet si hû telegrafe para tryezës së kryesisë. Edhe Ministrat çohen, posë Kryeministrit, i cilli ban se asht tue këndue deklaratën që do t'ia bajë Asamblesë. Zyrtarët zanë e çyçyrisin njani me tjetrin.

Mihajl Grameno nunuron me dikë që ka përbri, e tue folë me té për kushedi për çka, ndihet kè i thotë: Pizavengat! Halldupat! Surrat-qerepat!...Ministri i luftës, me kamë edhe ai, mban sytë n'ajri: Ndoshta aty për aty i bjen m'mend puna e xhendarëvet, të cilët me gjithë se prej sish mvaret qetësia e vendit e përparimi i kombit prandej, kanë nandë muezj rrogë pa marrë. Ministri i Financavet grisë buzën me dhamë, kah mendon se kashën e ka thatë e si padashtë i shkojnë sytë më Vinjaun, i cilli, përzie me popull, e shikjon si ai nën elter....Sherbtori i Parlamentit, qi edhe ai ka tri rroga pa nxjerrë, rrumbullon thonjt e gishtavet me dhambë. Kryetari, tue mos pasë nevojë me njëhë votuesit, thotë:

Punët do t'shkojnë, shpresoj, me namë:  
Kem' votue të gjithë një zani.

## DIKUSH PREJ DEPUTETËSH

Për posë Kryeministrit....

### KRYETARI

Njani

Çon e s'çon kandar. (Me vedi) Ç'nevojë  
Kryeministri ka t'votojë,  
Kur Ministrin e Financës,  
Si njat zogun e fëllanxës,  
E mban n'grusht. (Në za) Tash ktu ma para  
Se t'fillojmë na tara-tara,  
Do këndue një telegrafë  
Që ktij Kshilli ia ka rrafë  
Prej tëj detit, nga Bostoni,  
Një zotni kolegj i joni.

### SEKRETARI I PARLAMENTIT (këndon telegrafën)

Duke venë ré ilegalitetin e zgjedhjeve (nervozizëm i madh n'Asamble), duke patur parasysht inkompetencën e shumicës së madhe të zgjedhur (përplasje kamësh prej anës së Deputetvet qeveritarë) e, se prandaj "Asamble" e "Parlament" në Shqipëri nuk janë tjetër veçse një komedi e turpëshme, që lozin avantyrjerët e palaçuat analfabetë, sharlatana slavo-turko-greko-shqipëtarë mbi kurrizin e kombit të gjorë e kafshë, e dyke qënë i sigurtë se këta zotërinj kurrin e kurrit s'i dëlirin dot veshët nga "hallva", jam i shtrënguar të jap dorëheqjen nga mandati që më që ngarkuar nga popullsia e Prefekturës sime. Sygjeraqina.



## DEPUTETËT QEVERITARË

Po, pranohet.

## DEPUTETËT OPOZITARË

Jo, s'pranohet.

## KRYETARI

U pranue. Ka fjalën “zoti”  
Kryeministër.

Me njëherë zhduket zani e potera n'Asamblé. Kryeministri me një hije të randë e njëheri edhe buzqeshun, ngjitet m'pult të kryesisë, tue rrotullue sytë mbi Asamblé. Disa ndër Deputetn hapin gojën e préfin veshët. Një ndër ta – s'dihet se kush – gukson të madhe.

## KRYEMINISTRI

Deshti Zoti  
Dhe ia mrrimë kësaj ditë,  
Aq me d'shir qi e kemi pritë,  
Përse sod, po, me Asamblé  
Nisë për komb një kohë e ré.  
Kohë lulzimi e përparimi....

## TOSKU

(tue i rá ndër fjalë)

Eh po, inshalla! Lulzim specash,  
Kungujsh, laknash, kastravecash;  
Përparim misrash të lashta  
N'kopshtë t'Ministrit t'Punvet t'Jashta....  
Se për tjetër përparim,  
Përparim – a lulëzim,  
Besà, asht kot me u folë ndër né  
N'daç n'kohë t'lashta n'daç n'kohë t'ré.

## KRYETARI

(tue i rá zilës)

Lutem, fjalën mos m'ia pré.

## TOSKU

Pàj, një herë e pikë ma parë,  
Për shumë kënd, po, ndër Shqiptarë

Përparimi asht vetë një armik,  
(Kryetari i bjé zilës ma fort.)  
Msimi e dija një rrezik.

KRYEMINISTRI

Jo, kjo fjalë s'asht e vërtetë.  
Shqiptaria vjetë për vjetë  
Asht tue shkue gjithnji përpara  
Ditë për ditë t'iu dhanë e mbara.  
Sod me sod gjithkund qetsija  
Ktu mbretnon, ç'se Qeverija  
Çarmatisë popllin e ká  
E, as me vjedhë s'lën, as me vrá.

HUNDLESHI

(Sjellë prej Kryetarit e tue trakllue me gisht m'tryezë)

Lypi fjalën.

KRYEMINISTRI

Masandej  
Shteti bâ ká hapa t'mdhej  
Edhe n'lâmë t'kulturës e t'msimit:  
Si difton budgeti i Arsimit,  
Që ka çilë – në krye t'pesë vjet'e –  
Pesqind shkolla....

BOSKU

Mehmurjete,  
Thuej ma mirë – n'daç me ia gjá –  
Sa për t'majtë miq e akraba:  
Apo vegla politike,  
Vegla fejë n'dorë t'njâjë "klike",  
Që me mndyra masonike  
E pa turp tue shkelë ndërgjegjet  
E njatyne qi bajnë zhegjet  
E acarimin e stinës e t'motit,  
T'mund nipnija e Gjergj Kastriotit  
T'përforcohet n'dije e n'msim,  
Duen t'pengojnë çdo përparim,  
Çdo kulturë oksidentale....

KRYEMINISTRI

Nuk asht gjâ, zotni, aso fjale

Përse vetë, po, Qeverija  
 Deklarue ka npër fjalë t'mija,  
 Se ajo don që Shqiptarija  
 T'jetë nji Shtet oksidental....

BOSKU

Me tanuz.

KRYEMINISTRI

Jo, zotni, m'fal.  
 Por si t'gjitha shtetet tjera.  
 T'Evropës.

BOSKU

Mos e thuej dy hera  
 Zotni, at fjalë, pse t'qeshë Tirana –  
 Po, a për njata tre aeroplana  
 Të shkatrruem e nji "Markoni",  
 Ndëjë batall n'Durrës, Ju thoni,  
 Se jem' shtet oksidental?  
 (tue kqyrë kahë "klikarët")  
 Me mehmurë endë orjental,  
 Që zbutue nuk i ka shkolla  
 E qi sytë mbajnë kah Stambolla;  
 (Kryetari shkundë ma fort zilën)  
 Që nuk dijnë se shka asht Atdheu  
 E, për t'cillt vetë Skanderbeu  
 Asht hajdut, mor lum zotnija,  
 S'qytetnohet, jo, Shqipnija.

(Zhurmë n'Asamblé).

TERTABUCLECI

Protestoj "rrebtësisht", zotni  
 Kryetar.... Ktu s'po ka qetsi.  
 Duket, po, se jem' n'Shqipni.

(Kryetari shkund "rrebtësisht" zilen)

BABATASI  
 (me vedi)

Pse nuk kthen n'Jugosllavi?

## TERRTABUCLECI

Kto janë fjalë, për me përçá  
Turq e t'kshtënë.

## BOSKU

Ktu turq nuk ká....

## BABATASI

(me vedi e tue kqyrë kahë “klikarët”)

Var, efendêm, var!

## KRYETARI

(tue i ra ziles e tue luejt kryet Terrtabuclecit, thotë në zâ)  
Belá!...

(Boskut) Zotni, jeni jashta rendit  
T'ditës.

## BOSKU

Làk s'do bâ kuvendit,  
Por do folë e drejta rrumbull.  
A din ku na bahna grumbull  
-Na qi quh'mi “intelektual”,  
Edhe mah'mi “okcidentalë”? –  
Në shfrytzim t'Financës s'Shtetit.  
Ktu, po, t'damë na s'jém n'mjet t'vetit,  
Edhe gjindmi gjithmonë bashkë:  
Nuk na ndajnë Bajram as Pashkë;  
Se për ndryshe – posë gjithkuj –  
Për sho-shojn na jemi t'huej,  
Sa që sod fjala “bashkim”  
Ndër shqiptarë s'ka ndo'i kuptim.  
Pse jo veç që t'dám na jina,  
Por as n'mënd kurrkund s'e kîna  
Me u bâ bashkë. M'besoni mue.  
Prandaj kot rrin tue turfillue  
Zotëni Terrtabucleci,  
Mbasi n'thes nuk hin koteci,  
Edhe bota nuk há bar;  
Por há bukë.

## TERRTABUCLECI

Zotni Kryetar....

## BOSKU

E, prandej janë t'gjitha rrëna,  
 T'gjitha rrëna – e kaçarrëna  
 Fjalët e mdha qi na trillojmë  
 E pa turp qi ktu llapzojmë  
 Për bashkim. Por megjith kta,  
 Kombi i ngratë, t'mos ishim na  
 Qi me dokrra politike  
 E me fjalë kabalistike  
 Me e marrë mëndç, der m'sod aj vetë  
 Mnyrën, thom, do t'a kish gjetë,  
 Si, tue ndëjë secili m'veti.  
 -Kshtu si ndá na ká kysmeti –  
 Do t'ki'n mujtë bashkë me gjallnue,  
 Shoqishojnë për pa trazue.  
 Pse e vërteta asht kjo, zotni,  
 Qi ndër né sod ktu n'Shqipni  
 Si kristjan – si muhamedan,  
 T'cillt sado qi bashkë s'jetojnë,  
 Me gjith kta me shoqi-shojnë  
 Nuk kan t'keqe ndër punë feje  
 -Për posë shka â i ksajë Asambleje –  
 Ata s'kan ndo'i kundërshtim  
 Edhe kan, po, shum nderim  
 Ndërmjet vedit. Qé, po e xâmë,  
 -Ktu po e flasim, ktu po e lâinë,  
 Pse s'po flas, jo, për me shá,  
 Por ma fort un hàll me kjá –  
 Na shqiptarët jem' mjaft belá,  
 Mjaft barbarë e.... me shát n'ujë,  
 Me gjith kta, ndër mënd kurrkujë  
 Sod me sod s'i vè' me prishë  
 As xhami, as teqë, as kishë,  
 As kujë trûtë m'ia nxjerrun kréje  
 Për punë dini a për punë féje.  
 Prandej, tham, ndër kta gjashtë vjet  
 Qi Shqipnija mkambë asht shtet.  
 Ata rá do t'ki'n'ujdi,  
 Do t'ki'n rá n'udhë e m'hulli  
 Ç'ligjë e ç'trájtë me i dhanun shtetit,  
 Si me marrë e dhânë n'mjet vedit.

## KRYETARI

Un nuk dij ku don me dalë  
 Zotni Bosku me kto fjalë.

## KRYEKORTOLLA

N' "kantoniz'm", zotni Kryetar....

## TERRTABUCLECI

Në parim antikombtar.  
Poshtë! Poshtë "kantonizma"!

## DISA DEPUTETËN

Rrnoftë  
Bashkimi kombtar!

## KRYEMINISTRI

Shka qoftë  
Kantonizmi në Shqipni....  
A drò jemi n'Helveti,  
Ku tri kombe shteti ka,  
Ndër kantone na me u nda?  
Na, shyqyr! Jem t'gjith nji vlla;  
Jem' Shqiptarë me gjuhë e gjak,  
S'duem kanton as s'duem bajrak:  
Duem Shqipni t'pamvarshme e t'libër!  
(Duetrokitje....)

## DEPUTETET QEVERITARË

Kryeministri rroftë!

## BOSKU

Fort mirë.  
Rrnoftë e kjoftë. Veç shka, zotni,  
E vërtetë që na n'Shqipni  
Vllazën jem' nga gjuha e gjaku,  
Por hallbu – si turkoshaku  
Thotë – si vllazën s'po jetojmë,  
As vllaznisht Shqipnin s'po gzojmë;  
Kush me túl kush me koc n'gojë.  
Qé, për shembull t'na tregojë  
Kryeministri ktu njisherë,  
Sa zyrtarë ka "kardashllerë"  
Të krishtë në n'Kryeministri?  
Nji, me thënë, jo, kè un e di.  
E po mbrendë në Ministri  
T'Punvet t'Mbrendshme sa, thue ká

Ksì zyrtarësh, me t'cillt aj vlla  
Po e mban vedin?

#### TARAVOLI

Asnji besà.

#### BOSKU

Na, mandej, këm' pesë Shkëlqesa –  
Pesë Sefira, a shkaf u thonë,  
Mirë a keq t'cillt vendin t'onë  
-Ku s'po e njef mâ qéni t'zo'n  
Në dhé t'huej sod përfaqsojnë  
Qeverinë, edhe lajmojnë  
Për shka bluen bota për né:  
Mirë, po, 'i t' kshtënë ndër tá s'e ké.

Ktu Terrtabucleci lypë ujë. Vjen shërbtori me gotë e me kungull ujit në dorë e i jep me pi. Pìn edhe Kryekortolla me atë gotë, mandej Veshllapota, mbas tij Kryetuli, Kalangërrçi e nja dhetë Deputetën të tjerë.

Prap n'tri mi, a mâ pak, ushtarë  
Këm', po, ràsh tetë komandarë  
Kolonela, e pak me thanë  
Nja tridhjetë Majora, t'tanë  
Veshë e mbâthë porsi Alemanë:  
Por ndër tá, s'di, a e ké 'i kristjan.

#### MINISTRI I LUFTËS

Zotëni s'kanë mbarue shkollën....

BABATASI  
(si npër dhamë)

E as m'e pá s'kan pá Stambollën....

#### BOSKU

Janë pallavra, t'u ngjatët jeta!  
T'gjitha dokrra e fjalë të shkreta,  
Shka me thânë po don për shkolla:  
Se mâ e dijmë se ç'msime t'holla  
Po mund merren ndër do shkolla....  
Por asht tjetra, besà, n'thes,  
Që un për fushë ktu s'mund e qes.  
Kryeministrit veç po i thâm

Se Shqipnija do t'shkoj dâm,  
 Q'se dikush – se kush s'e di:  
 Nieri, a “klikë”, a se “Parti” –  
 Po don zot me u bâ n'Shqipni,  
 Për me lânë Shqipninë Turki.  
 Ktu, Terrabucleci çohet e del prej anës s'Asamblesë  
 Kjo asht arsyeja, zotëni,  
 Per të cillen shka asht kristjan  
 Lêhêt ujë me rrah n'havan  
 Ndër Financa e Punë Botore  
 Edhe lêhên krejt mbas dore  
 Ku t'jetë çashtje administrate,  
 Punë komande a punë legate  
 Jashtë Shqipnisë ndër tjera shtate.

#### KRYEMINISTRI

Ky â 'i mendim i zotnis s'ate.

#### BOSKU

E nji punë e zotnis s'uej,  
 Që n'ketë çashtje, posë gjithkujë,  
 Tue e mbajtë jeni shatin' ujë.

Zhurme e madhe n'Asamblé – Kryetari shkundë pa prâ  
 zilen.

#### KRYEMATARJA

Po a për t'bâmë na çashtje féje  
 Jëm' ktu mbrendë ksajë Asambléje,  
 A për çashtje “kombëtare”?....

#### BOSKU

Për asnjanën, Kryematare.  
 Jém' për rroga e kurrnga tjetër;  
 Rroga n'ar, por jo në letër.  
 T'kallxoj vetë qi jam i vjetër  
 E, jam regjë me ksò kopallash  
 Por asht mirë që t'shpormi prrallash  
 E, ta thomë nji herë t'vërtetën:  
 T'mos ta rrëjmë kombin e veten  
 Tuj u shitë për “liberala”,  
 Për “modern” e “oksidental”,  
 E se mbrendë ksaj Asambléje  
 S'duem me u marrë na me punë féje.  
 Se na fënë e kem' krye-kreje,



Qeverija, edhe, zotni,  
 Besà, mirë po e bân dishmi  
 Se ç'frotë liberalash jemi  
 E ç'liberalizm na kemi....  
 Jo, po, kot na çajmë kopalla  
 Për bashkim e tjera prralla;  
 Se na t'dám jemi n'mjet veti,  
 Si mos t'ishim njerz t'nji shteti,  
 Fisit t'ndryshëm si t'kî'm lé.  
 Paj na bashkë s'kém' besë as fé,  
 As moral – as ideal,  
 As kulturë e as histori:  
 Né kem' bashkë gjak e gjini,  
 Né krushqí – né kumarí,  
 Né miqsí – né ortakí,  
 Lagjet m'vedi – e fshatet m'vedi,  
 T' dâm me oxhaqé – e me sokaqé,  
 E me petk – e me djalekt,  
 Me gojdhana – edhe me tbâna,  
 Thue se 'imënd s'jém t'gjith shqiptarë.  
 Prandej, tham, se asht punë e mbarë,  
 Masi t'dám de facto jena  
 E, as kurrkund ndër mënd s'e kena,  
 Me u bâ bashkë, që ndër kantona  
 T'a ndajmë shtetin sado vona,  
 Por tue ruejt njisinë shtetnore  
 Edhe t'drejtat qytetnore  
 Për secill'n minoritet  
 Që kantoni t'ndryjë n'çark t'vet:  
 Ma mirë dá zotni, se çá.  
 A se, ndryshe, t'zgjedhim Mbretin  
 Edhe n'dorë t'ia lshojmë na shtetin.  
 N'dorë t'ia lshojm na fatin t'onë,  
 Që ky t'jetë, dér vonë e vonë,  
 Autokrat përmbi Shqipni:  
 Vetë me zí – vetë me përzí,  
 Pa çá kryet për Qeverí  
 E ma pak për Parlament,  
 Që për né asht një element  
 Krejt damtues – edhe shkatrrues.  
 Me tetdhetë përqind "klikarë"  
 N'Parlament s'hecë puna mârë.  
 Fort ma mirë, t'kém një tiràn,  
 Se 'iqind vetë me dorë n'sahàn.

Zhurmë e poterë e përplasje kambësh prej anës së  
 Deputetëve "klikarë".

BABATASI  
(me vedi)

Ky po folka pravo, zdravo....

Kryeministri i ban me sy Kryetarit, që t'a kpusë bisedën.

KRYETARI

Pesë minuta pushim....  
(çohet e del)

NJI DEPUTET

Bravo!  
Se kjëçë thá krejt për duhan.

MIHAJL GRAMENO  
(tue qeshë)

“Redingoti” me fistan....

Deputetët dalin prej anës s'Asamblesë, shumica e madhe e tyre tue u zgërdhi njani me tjetrin. Kush ndezë cingarën: Kush shkon me pi ujë n'odë të katrovavet; kush rrethon aty njanin a tjetrin Ministër, për me i porosinë për ndo'i zyre vllanë, akrabanë, mikun, bashkbesimtarin e vet, analfabeta, semi-analfabeta, delinkventa atëherë dalë prej burgut – sido kjoshin. – Nji palë flasin vesh m'vesh me kondrabandaxhi, ortakë të vet; tjerët futen në zyre të Kryetarit, ku, bashkë me të intrigojnë për punë të moratoriumit të Korçës, për punë të “misrit” të beglervet të Tosknisë, për konop e jullarë beglerësh, për portogala nipash e stërnipash, për hekura e materjal tjetër lufte t'ushtrivet të hueja, për plane qytetesh e kryeqytetesh, për nandëmijë napoljona t'udhës së Durrësit etj. etj. etj. Ka asish, mandej, që, hû m'kamë para njanës a tjetrës tribunë, xânë kuvend me njanin a tjetrin Ministrash dragomanash të huej. Mbrenda odës së katrovavet e m'prak të dritarës së saj, thye xhamash, që ep m'odë të shkallës, nji sheqerxhi Tirane, ortak me nji deputet shkodran, ka qitë me shitë hallvë, sheqera të kuq me “gjela” m'krânde, limontoz, xhixhi-birrë, mastikë, voe të zijme etj., si me thanë se ka çilë nji “bufet” për parlamentarë. Nji malsuer i Mbishkodrës i kshtënë, qi, tue u ndodhë në Tiranë, kishte pasë shkue me ndie bisedimet e Asamblesë, pvetë nji muhamedan malok prej Skraparit: A turqe kanë folë apo arumçe? – Jo, kanë folë rumunçe, ia kthen 'iskraparasi. Odat e komijonevet vlojnë me deputetën, si verës kjori me miza. Dikush, vesh m'vesh me ndo'i mik të vetin, flet turçe, kush grekisht, e të gjith nji shqipe mushke, të bastardhueme, me terme e trajta djalektale të ndryshme. Tash a ma vonë, aty – ktu ndër ta ndihen fjalët “demokrat”, “aristokrat”, “diktator”, “feudal”, “vagabond”, “vagabondazh”, “analfabet”, “pasha Shqipninë”, “për flamur”, “i poshtërm”, “të poshtërm”, e këso fjalësh të tjera bihude. Dikur del Kryetari prej zyrës së vet. Kafazi i bjë ziles e Deputetët, kokrra – kokrra e pritueshëm – si me kenë tue shkue me ruejtë ndonji të dekun – hinë n'anë t'Asamblesë. Si bahet numri legal, mbyllet dera e kuvendi zen fill.

## KRYETARI

Kryeministri fjalën ká.  
Veç, zotni, u baj rixhá  
Fjalës sho-shojt ndësh mos me i rá.

## KRYEMINISTRI

Ndiç, zotni, si kjeshtë tuj thanë,  
-Se për gjysë fjalën paçë lanë, -  
Qeverija ka ndër mënd,  
Me punue shumë për ketë vënd –  
Për ketë shtet....

## NJI DEPUTET OPOZITAR

Oksidental....  
(si me gaz)Uh! Po, “zoti” Kryetar; m’fal.

## KRYEMINISTRI

Kjo njiherë, si thashë ma parë,  
Çarmatisë ka popllin mârë;  
Ë prandej, pa mûnd aspak,  
Sod mund t’çohet ligja m’cak,  
E, “xhelëp”, “pagë” e “vergi”  
Mund do t’mirren edhe n’malci.

## DISA DEPUTETËN QEVERTARË

Mirë, mirë fort.

## KRYEMINISTRI

Mandej, zotni,  
Tham asht mirë që edhe ndër né  
-Si kudo njeti mbi dhé –  
Veç nji ligjë t’hijë n’punë gjithkund:  
Në qytet, n’malci e n’katund,  
E, kanúja t’zhduket fare,  
Që asht nji ligjë kryekput barbare.

## TARAVOLI

Mirë, po thue do t’kesh mendue,  
Cillat ligjë mandej me u vue  
Në zbatim ndër male t’ona,  
-Ç’ mer prej Matit té Valbona –

T'cillave vetë Turku i Azisë,  
 Që aq t'madh dàm na i suell lirisë  
 Për pesë shekuj rresht e rresht,  
 Kurr kanë me u prekë nuk desht.

KRYEMINISTRI

Ligja e shtetit, merret vesht.

TARAVOLI

Por kjo ligjë â 'i ligjë e hueja –  
 E Turkisë; ndërsa kanë  
 Asht një ligjë, po, fjesht shqiptare  
 E, prandë një ligjë kombtare,  
 Pse ngjallitë prej shpirtit t'kombit.  
 Pra nuk bân që prej avromit  
 T'Asamblesë të shuhet fare.

KRYEMINISTRI

Po, por ligjë asht kjo barbare.

TARAVOLI

Si e Turkisë.

KRYEMINISTRI

S'asht një për një,  
 Kujtoj un. Por, me gjith kta,  
 Për n'pastë t'meta mexheleja,  
 Sod, qi mbledhë asht Asambleja,  
 Ajo mundet me u qortue,  
 Shka ka t'tepërm tue e krekcue,  
 E shka t'mangtë tuj e plotsue.

TARAVOLI

Mirë, po pse, thue, t'mifim n'ujë  
 Tue qortue na i'ligjë të huej  
 As ma mirë t'qortojmë ligjë t'ona?  
 Të qortojmë, po, sado vona,  
 Kanun t'onë? Pse edhe, zotni,  
 Mexheleja s'hin n'hullí.

69

KRYEMINISTRI

Jo po; hinë. Pse s'hinë?

TARAVOLI

S'hinë, prá.

KRYEMINISTRI

Hinë.

TARAVOLI

S'hinë, laholevela!  
Veç për n'daçim që Shqipnija  
T'turqizohet.

KRYETARI

Lum zotnija,  
Jeni jashta rendit t'ditës.

TARAVOLI

Si urdhnon.

KRYETARI

Mbi kanún t'Mirditës  
S'mund t'ia vëmë na bazën shtetit....

TARAVOLI

Por as m'Mexhele t'Dauletit  
Jo.

KRYETARI

Néjse.

KRYEMINISTRI

Mandej, zotni,  
Tash qi n'vend po ka qetsi,  
Na e kem' bâ me mënd pleqni  
Me çilë rruga sa mâ shum....

BABATASI

(me vedi)

Shkulmit t'Drinit kulihum.  
Mbani ato, që janë, njihera,  
Mandej çilni rruga tjera.

KRYEMINISTRI

Kshtu ndër mënd, edhe, na e kém',  
Nji urë m'Mat me Ishue, e nji m'Cém,  
Dy m'Shkumbin e tri m'Devóllë.

BABATASI

(me vedi)

Edhe nji Tiranë – Stambóllë....

KRYEMINISTRI

Atëherë na kemi bâ  
N'skelé t'Durrsit nji limâ....

NJI DEPUTET OPOZITAR

(me ironi)

Mos harroni me vû fnerin.

KRYEMINISTRI

Kem'me nisë edhe inzhenjerin  
Për me mâtë Drinin e Bunën,  
E mandej me xanë fill punën  
Sa mâ parë. Por prap pleqni  
Na e kem' bâ, me nji shoqni  
Me u marrë vesht – me 'i shoqni t'huej –  
Për me thá....

BABATASI

(me vedi)

Me mifun n'ujë....

KRYEMINISTRI

T'tana knetat e bregut t'detit;  
Edhe mbrenda këtij vjetit  
Nji udhë hekrit fill me zanë

Ç' merr prej Durrsit der n'Tiranë.  
Prap ndër mënd ka Qeverija  
Me pré pare....

#### NJI DEPUTET QEVERTAR

Lum zotnija,  
Sa për pare kish me t'lutë,  
Tash për tash fort mos me u ngutë.

#### NJI DEPUTET TJETËR QEVERTAR (nën zâ)

Pse thue jo? Asht mirë qi shteti  
Pare t'presë, si gjithkund n'jëti.

#### DEPUTETI I PARË QEVERTAR (nën zâ)

Mirë, mor'burrë, por un po drue,  
Se mandej këm' me u pendue,  
Pse ka gjásë qi me ato pare  
Kjo Financa e jonë shqiptare  
Ka me lá rrogat për né  
E aq mënd n'krye, kujtoj, ti i ké,  
Sa me dijt se 'i "Lekë" i joni  
S'kapet kurr té "Napoljoni":  
A t'hinë n'krye kjo punë ndopak?

#### DEPUTETI I DYTË QEVERTAR (nën zâ)

Jo, po, ktu jé tue folë hàk.

#### KRYEMINISTRI

Tashti pra, zotni, po shihni  
Punën vetë edhe po e njihni,  
Se – me dashtë me folë me arsye –  
Qeverija mirë ka krye  
Njat detyrë që vû i ka kombi.  
Prandej tjetër s'kém' shka thomi,  
Veç se presim "vot-besimin"  
Pre'Asamblesë, edhe pelqimin  
Për ketë vepër t'Qeverisë;  
Pse edhe sod shteti i Shqipnisë,  
Npër veprim t'ksaj Qeverije,  
Ka shtërngûe néje miqsije

Me të tana shtetet tjera.  
Prap shpresojmë se, tue dalë vera,  
Kém' me marrë do pare uhá.

Deputetët qeveritarë rrahin shplakët si të tërbuem, ndërsa  
t'opozitës përplasnin kambët. Terrtabucleci, Kryekortolla,  
Kalangerrçi përgzohen me Kryeministrin, i cilli – mbasi vetë  
as i marrë as bihude s'asht – ua ep dorën disi përdhûni.

## KRYETARI

Ka fjalën Hundëleshi.

## HUNDËLESHI

Ngjá  
Kryeministri askund s'ia ká  
Me njato makllada t'mdhá,  
Që ktu mbrendë tash na i ka thá  
Mbi veprim të Qeverisë  
Për t'ia sjellë t'marën Shqipnisë,  
Tue na thanë jo ç'ka punue,  
Por shka n'mënd ká me veprue  
Për Shqipni, kushdi se kurë,  
Herë me 'i rrugë e herë me 'i urë,  
Tash me lumëj 'e tash me kneta,  
Tash me sa tjera fjalë t'shkreta,  
Me t'u bâ se asht fáll tue qitun,  
E jo mâ se do me shndritun  
Asamblenë mbi gjendje t'Shtetit  
E, mbi përdorim t'pushtetit,  
Që atij n'dorë kombi i ka lânë.  
Pse s'na thotë, se ç'i ka ngrânë  
Njatà 'izet milion frank ar,  
Që për vjetë Kombi shqiptar  
Qeverisë dorzue ia ká?...  
Ndo'i detyrë me tó a thue, u lá?  
A u çil shtek, a u thye kund vá?  
Punë a u kap, a u nis kund rângë?  
A por t'gjith ndër shqekë janë shmângë –  
Shmângë ndër shqekë té dó zyrtarve –  
T'dó zyrtarve – e kumarve  
Të Partisë – e t'Qeverisë,  
Që kanë hypë m'kurriz t'Shqipnisë?...

## KRYEMINISTRI

Protestoi rrebtë për kto fjalë.



## HUNDËLESHI

Lutem fjalën mos me m'ndalë.  
 Se na bár nuk hamë kurrnjani,  
 Edhe dijmë sa ban bostani  
 E sa kastraveci. Kombi  
 Ka dhanë pare ktu: Lë t'thomi  
 Ku kan shkue kto pare t'shkreta.

## KRYEMINISTRI

Kqyr budgetin, t'u ngjatët jeta,  
 E, atëherë fol.

## HUNDËLESHI

Dokrra! Pallavra!  
 Se un e dij ç'janë kto paçavra,  
 Kto shtupa letrash kote  
 Që na i qet zotnija jote  
 Ktu përpara. Në budget  
 -Për budget mbasi po flet –  
 Lum zotnija asht dhanë “kredija”  
 Rrumbull për pesë mij ushtarë,  
 Ndërsa sod nuk ké, gjithmarë,  
 As dymij ushtarë nën armë.  
 Si po shef, budgeti â i larmë.

## KRYEMINISTRI

Nuk asht e vërtetë.

## HUNDËLESHI

Zotni,  
 Asht e vërtetë. E, un e di,  
 Se me paré e gjak shqiptarit  
 Janë tue u mbajtë do qéj pazarit –  
 Do bihúde e derbedérë.  
 Të pa ród e nierz t'pa ndër,  
 Si edhe ndodhë ka tash n'e vona,  
 Me dhanë shteti napoljona  
 Për t'lá borxhe kumarxhish,  
 Borxhe t'turpshme batakçish.

## BABATASI

(me vedi)  
 Kshtu i dó mushka drutë....

## HUNDËLESHI

Mandej,  
 Jem' tue pá si andej e ktej  
 Jem' rrethue na me "afije"  
 Njerz të zot të çdo tradhtije.  
 E po: a Abdul Hamid ktu ká  
 Që m'iu dashtë shtetit me lá  
 Paré "afijesh"....

Ktu Kryeministri vrânë vetllat; Terrtabucleci përhapët;  
 Veshllapota kotet.  
 Kryekortolla flenë.

Ç'taksirat  
 Ka – pves un – Shqipnija e ngrâtë,  
 Ku s'ka populli bukë me ngrânë,  
 Qeverisë n'budget me i dhânë  
 "Fonde t'mshefta" për "afije"  
 E për "qejf" t'ndonjaj Partije?...  
 Se budgeti, or zotëni,  
 Në një shtet, ku, si n'Turki  
 E si ktu, po, në Shqipni,  
 Parlamenti as Qeverija  
 S'duen me dijt se shka asht "Vllaznija",  
 Shka "Lirija" – e "Barazija",  
 Tjetër s'asht veç një pelhurë  
 Marimanget endë tërthuer  
 Për me xânë me té ndo'i mizë....

## KRYETARI

(tue u çue me dalë)

Ktu bisedës po i hjekim vizë.  
 Beledija e Kryeqyteti  
 Na grishë n'darkë n'hotel t'Ismetit.  
 Prandej, lutem, n'orën tetë  
 Sonde t'gjith aty me u gjetë.  
 (Dalin).

## Rruga e Dibrës – Tiranë

BABATASI  
(me vedi)

Besà-bésë, si m’duket mue,  
N’shkojshin punët si kanë fillue,  
“Popullore” as “Opozitë”  
S’kan me qitë kurrnja në dritë;  
Mú po drue fort se njiditë  
N’bèlá shtetin kanë m’ë qitë  
Shoq me shoq tue u kacafitë.  
Dishka m’vjen se jam tue ndi  
Erë baroti për ajrí....

NJI POLIC

T’u ngjatët jeta! Zotëni,  
Komisari n’Polici  
Nesër t’pret, “ora më tetë”.

BABATASI

Po, për ç’punë? – A ban me t’pvetë?

POLICI

Sod kanë ardhë e bâ davá,  
Kin’ demek se ti i ké rá  
Kamxhik qafës nuk dij se kúj.

BABATASI

Kâm me ardhë, jo, po mos drúej  
(Polici shkon)  
A shef ti! Paska paditë  
Kambë- kujrrili i faqes ngritë....  
Gjá njimënd për t’u çuditë  
Puna e atij zogut gomarit  
Që páçë blé prej katundarit  
N’rrugë t’Kavajës. Asht nieri s’parí  
Mandej bahet zog gomarí;  
Atëherë nieri prap se prap,  
Edhe lshohet, madje vrap,  
Me paditë té komiseri.  
Si asht kjo punë: Gomar’ e nieri!

## AKT' I DYTË

## NEOSHQIPTARËT

## Hoteli "Internacional

Të gjith mbasditën vlon puna në "Restaurant" të "Internacionalit", për të bamë gati "sofrën" për ministra e deputetën. Ndihet krisma e tryezavet kah përbaren prej njanës anë m'tjetrën të "Restaurantit". Vetë Ismet Efendija drejton punën, tue i dhanë urdhna herë njanit herë tjetrit ndër sherbtorë. Edhe tryezat vehen ndër vende e mblohen me sofrabeza, aviten karrigat, bårën gotat, shishet, boskat, çinijat e gjithshka lypet për me shtrua një sofër për zotni. Ismet Efendija, tue pa se Koço, i pari i shërbëtorve, po shtronte mbi një tryezë një sofrabez që nuk ishte krejt i pastër, i thotë:

## ISMETI

Ç'bën, or' Koço?.... Tyke parë  
Se tavolja është e pa larë,  
Pse t'a shtrosh m'trapez s'e di?  
Shtro një tjetër. Pastërti  
Lypset për n'hotel!

## KOÇO

S'ka gajle,  
Zoti Ismet. Pse gjith kjo lajle  
Për ca dylme delenxhi,  
Që gjer ndër paçaxhi  
Kanë fâ barkun me mëlçi  
E me speca – e kastraveca,  
Pështetë për dy copa dërrasa  
Të tërë neje e të tërë plasa,  
Keq mbërthyer n'dy këmbaleca,  
Që londiten porsì shtrrjegullë,  
Njërën këmbë zerë me një tjegullë,  
Sofrabeza është mjaft e dliurë,  
Rrahë n'ujti e.... s'ka m'e mirë:  
Pse ta ndërroj, tash, kësh t'a dija?  
Për ata myshterit'e tija  
Haxhi Filja mbi trapeza  
S'e ka adet t'shtrojë sofrabeza  
As të lara – as të palara.

## ISMET EFENDIJA

Ç'janë, or' Koço, kto dumbara....  
 Se ata neve i kem'Ministra,  
 Direktora e Deputetën....

KOÇUA  
 (nën za)

Mirë do t'bëjnë të blenë kapistra,  
 Për t'a varur në to vehten.

## ISMETI

Janë oqiçat me kumbonë,  
 Të cillt kombi i zgjodh tash vonë:  
 Përandaj detyra t'onë  
 Është që neve t'i nderojmë,  
 -T'jenë si t'jenë, po – dhe t'i çmojmë  
 Gjer sa t'gjinden n'at detyrë.  
 (Ganiut, drejtorit të gjelltores së Hotelit)  
 Tani ti, Gani, a ké kqyrë  
 P'r ato pula e gjela deti  
 Në janë pjekë a jo. Pëveti  
 Shërbëtorët për “majonezën”  
 A është gati; përse trapezën  
 Un do t'shtroj. E, kqyr, Gani,  
 N'gjithshka t'ketë pastërti:  
 S'ka p'r 'i “rostarant” reklam  
 Më të mirë se gjellët pa vjam,  
 Vera – verë, raki – rakija,  
 Birra e ftohtë, hesapi i dliirët,  
 E mbi t'gjitha pastërtija,  
 Me fjalë t'ëmblla, erz e shpirt.

Prendon dielli. Tiranasi endën e shendën rrugave të qytetit, si të burgosunit n'oborr të burgut; merzitshëm. Nisë ndriçimi i qytetit. Aty – ktu nëpër dritare të do shpijave shifen kè xhixhillojnë do “stearinë”. M'minare të xhamisë kundruell “Internacionalit” në njan'anë hidhet një zhel kuq e zi, i dalun bojet: Flamuri kombtar; në tjetrën varet një fener, me një qiri vjami ndezun mbrendë. Nji fmij, me një vandak gazeta nën stjettull, gërthet: “Ora e Malevet”; një tjetër: “Republika”; ma përtej: “Dajti”, “Opinga”, “Kombi” etj.

Në kafehane t' “Internacionalit” do deputetën kan xanë vend ké 'i tryezë e veçume në një skutë të salonit. Tash e ma vonë ndihet shegerti tue bërtitë: Një kafé! Tri “mastika” me meze! Një çaj! Dy deputetën – njani “popullor” tjetri “opozitar” – kaherë ia kan nisë me luejt tavëll, e ndihen kè, herë njani herë tjetri, tue njeh “zaret”, thonë: shesh-besh, besh-dort, gjithar i se, se-jek, iqi-bir, hep-jek, dy-shesh etj. Nji deputet, që me dy a tre vetë tjerë rritë tue i shikjue, thotë si nëpër dhamë:

“Popullorja” brigje-brigje:  
 Digje, Bedri Peja, digje!  
 (Gaz në salon)

Rruga e Dibrës

Djelmnija e zyrevet të Tiranës, për rasë të hapunit t’Asamblesë, ka organizue një “fjakolata”. Do ksi djelmsh, janë para me flakadane në dorë, e shumë nxanëse e nxanësa shkollash, përcjellë prej mësuesvet, bijnë rrugave të qytetit tue këndue kangë kombtare. Kur mbrijnë para “Internacionalit”, gadi të gjith deputetët, ministrat e të tjerë të grishun, gjindenin kush në “kafe”, kush më “trottoire”, kush edhe në “restaurant” të hotelit. Ndijnë kangën e poterën edhe të gjith derdhën në rrugë të Dibrës, ku ndodhen disa të tjerë të pa punë e apatikë. Aty ndalet “fjakolata”. Atëherë një dallkauk hyp m’nji karrigë – samârë e ia nisë me folë me të madhe e me një zâ ushtori:

O ju hallk! O kallablek!  
 Efendëm....n’ktë ditë....demêk....  
 Asambleja e çel më së pari:  
 Dovlet m’vehte u bë Shqiptari....

NJI TJETËR DALLKAUK  
 PREJ POPULLIT

Sorrën m’ballë e kryqën m’krah....

DALLKAUKU  
 (me vedi)

Tobe estagi furullah!  
 (me të madhe)  
 Çynçi neve jém’ Shqiptarë,  
 E, jo grekë ose bullgarë,  
 S’jem’ kristjanë as muhamedanë  
 Se né “Ingjill” edhe “Kuranë”  
 Hjedhë i kemi mbi tavanë.  
 Besà t’ënë është Shqipërija  
 (me vedi)  
 Meazallah!  
 (me të madhe)  
 Se né kisha edhe xhamija  
 Na kanë darë – na kanë përçarë  
 Si mos t’i’m trima Shqiptarë:  
 Gegë me opinga.... e Toskë me çizma.  
 Poshtë dasija e fanatizma!

DO KASAPË  
 (gabimisht)  
 Poshtë Shqipnija!

## DO MUHAXHIRË

(tëk s'kuptojnë fjalët e oratorit bërtasin)

“Rroftë” Turkija!

## DALLKAUKU

Shqipërin' né e kemi bërë,  
 Me gjak larë e kemi të tërë.  
 Smajl Qemajli, një dëshmor  
 Me 'i guzim fare madhshtor  
 Erdh nga Beça me pampor  
 Ngriti flamurin në Vlorë,  
 Dhe muer qeverinë në dorë;  
 E, për Shqipërinë e gjorë  
 Bëri luftë me tradhëtorë:  
 Me Izet Pashajn....

## DIKUSH PREJ POPULLIT

Me Esat Pashajn....

## DALLKAUKU

Po, me Esadin – pastë rahmet –  
 Atdheun nxori n'selamet....  
 Rroftë Flamuri kombëtar!

## NXANSAT E SHKOLLAVE

Rroftë Flamuri kombëtar!

## DALLKAUKU

Se né jemi “oksidental”,  
 Kém' namuz e kém' moral.  
 Dhe jém njerz me karakterë  
 Fjalën fjalë punën me ndéré....

## BABATASI

(nën zâ)

Elè mâ, po ndër teftéré.

## DALLKAUKU

Për Shqipëri vdesim të tërë,  
 Se ktu s'ka, jo, më begllërë:

Neve jemi demokratë  
Me “kapello”, me “kravatë”,  
Edhe jemi liberala....

BABATASI  
(me vedi)

Me “tanuz”....

DALLKAUKU

....e intelektuala.  
Duhet mbyllë shkollat private,  
S’ka kush tanger edukate  
Përposë shtetit. Se edhe kleri  
Dasinë n’popull don ta shtjeri  
Me teorira dogmatike  
Për qellime politike,  
E, kështu që muhamedajtë  
Të martohnën me t’krishtera,  
E, as don që kalamajtë  
T’zënë në shkolla të përzjera  
Çupa e çuna, pa kqyrë fera  
Të zënë dije e marifet  
Për t’qitë kombin n’selamet:  
Për t’i sjellur lumtërinë  
Se kristjan – e muhamedan  
Sot, shyqyr, jem’bark e shpinë....

BABATASI  
(me vedi)

Njani sjellë e tjetri mbarë....

DALLKAUKU

Por kem’ vllazërit kosovarë,  
Kosovarë, po, edhe çamërit:  
Shqipëtarë shumë patriotë:  
Që po vuajnë nën zgjedhë të barbarit,  
Sëpse janë gjak Shqipëtarit.  
Është detyra t’ënë prandaj,  
Burrë e grua e kalamaj  
Që t’i fusim n’Shqipëri:  
Të mos i lëmë të heqin zi.  
Për nën Sllav’ e nën Greqi.  
Rroftë Kosova me Çamri!  
Rroftë Flamuri kuq e zi!



Rroftë sa malet Qeverija!

ZYRTARËT

(tue rrahë shuplakë e tue britë)

Rroftë sa malet Qeverija!

NXANËSAT E SHKOLLAVE

(tue britë të madhe)

Rroftë Flamuri! Rroftë Shqipnija!

DALLKAUKU

(tue vazhdue turbull)

Muhamedanët, pa këqyrë fera,  
Edhe s'don që në skoli  
Çupa e çuna bashkë përziera  
Të na rriten n'dituri  
Si ato lulet n'një saksi.  
Konferâsi i Lundrës bëri  
Shumë një gaffe kur prej një zëri,  
Po thua tërë Diplomacia  
Avropiane, Franca e Anglija  
Dhe Rusija vùn dorë  
Që nga Shqiptaria e gjorë  
Mbarë Kosova të shkëputesh  
Dhe, n'Çamri Greku të futesh.  
Rroftë Kosova me Çamri!  
Rroftë Flamuri kuq e zi!

Deputeti dallkauk ulet prej karriget.

Hyp Mati Logoreci

NJI NACJONALIST

(bërtet sa kurr ka në krye)

Rrnoftë! Rrnoftë veterani i Arsimit!

NXANËSAT E SHKOLLAVE

(në brohori)

Rrnoftë! Rrnoftë veterani i Arsimit!

Luigj Shala ul sytë, Ndue Paluca vrâhet, Aleksandër  
Xhuvani kthen në shpi, Hilë Mosi hin në kafe e lyp një "uzo",  
Gaspër Beltoja thotë "Oll rajt"!, Gaspër Mikeli ved me vedi  
thotë: do qitë edhe një mësues muhamedan me folë.

## MATI LOGORECI

(tue u falë nderës t'ulun të kresë)

Zotëni! – Pa histori,  
 S'ka jetë kombi, as s'ka gjallni.  
 Historija né ma s'miri  
 Na difton se n'shekull niri  
 Nuk do të shkojë hiri e pa hiri:  
 -Kudo rasha – mos u vrasha  
 E si thonë: hallakatum;  
 Por me mûnd e me mênd shum,  
 Si n'qytet ashtu n'katund,  
 Për n'mos dashtë që kulihum  
 T'bjerë e t'mbytet n'ujë t'pafund.  
 Edhe na, pra, sado vonë,  
 Do t'a kem'historin t'onë,  
 Pse ndryshe Shqipnija e shkretë  
 S'ka gjallni as nuk ka jetë.  
 Veç se shka? Se me reklame  
 E me rrëna e me kornâme  
 Nuk po shkruhej Historija.  
 Që, po zamë një ky zotnija,  
 Që ktu foli para méje  
 Shum do sênde fill prej kréje  
 Trillue i ka e qi n'Shqipni  
 Nuk kan ndollë – kè un mûnd t'a dij.  
 A se, ndoshta edhe kam ndollë,  
 Por jo kshtu si e túer ky hollë.  
 Thá, bjë fjala, ç'm'herë të parë:  
 “Çynçi neve jem' Shqiptarë  
 E, jo, grekë a se bullgarë”.  
 Bullgarë jo – por grekë tham po.  
 Grekë e turq e serb der m'sod,  
 Që n'Financë s'u bâmë na zot,  
 Ka pasë vendi, besà, plot:  
 Gadi t'gjith Shqiptarët e sotit  
 Serb a grek a turq kjenë motit;  
 Se Shqyptarë, fis i Kastriotit,  
 Kè e dij un, kurrkush s'ka kê në,  
 Për posë se një grusht të kshtënë,  
 Do malcorë e katundârë  
 Që n'Financë s'kân pasë kurr zár,  
 Shì për kta qi ishin Shqyptarë.  
 Prandej s'dij përse a ndopak  
 Me i zânë n'gojë kto fjalë n'sokàk:  
 Djé turq, serb e grekës ç'i bani  
 Sot Shqiptarë s'e dij....

## NJI GJIMNAZIST

Sahâni!  
(gaz ndër nxansa)

## MATI LOGORECI

Mandej prap, zotni, oratori  
 Po na thotë me zâ ushtóri,  
 Due me thânë me zâ të naltë,  
 Rrumbullak tue theksue fjalët  
 Porsi t'ishin të vërteta  
 E, jo dokrra e fjalë të shkreta:  
 "Shqipërin' né e kemi bërë  
 Me gjak larë e kem' të tërë".  
 E din vetë, kujtoj, zotnija  
 Se janë rrëna kto fjalë të tija,  
 Se ai Shqipninë nuk e ka bâ.  
 Ai ka ndëj n'borë e n'murrâ,  
 N'Tarabosh e kah Tetova,  
 Zi tue hjekun si sarova,  
 Edhe asht thá e bâ tërfurk  
 Veç për t'lânë Shqipninë nën Turk,  
 Për nën thundër të Sulltanit,  
 Ndërsa tjerë shqiptarë "sahânit" –  
 -Leprin n'bark e dreqin n'kokë –  
 Kjen kapë fyt-a për tokë  
 Kush Shqipninë Grekut m'ia shitë,  
 Kush n'Shqipni Serbin me qitë,  
 Por jo kurr Shqipni me mkâmë,  
 S'kjem prá nà Shqipninë q'e bâmë.  
 Tjetër kush Shqipninë ka bâ,  
 Se na vetë, haram!: Kurrgjâ!  
 Zâti gjâ kurr s'kem ndërtue  
 Veç shka prish e shka rrënue;  
 Na veç, po, kur kemi pá  
 Se kund shpnesë mâ nuk po ká  
 Për me e bâmë Shqipninë me kjá  
 Për nën Turk a Grek a Shkjá,  
 Atëherë ngrefë kem'Qeverinë  
 Sa për t'marrun n'dorë fuqinë,  
 Për me repë mandej Shqipninë.  
 Po, por tjetër âsht Shqipnija  
 E, prap tjetër Qeverija:  
 Për liri të Shqiptarisë,  
 Përposë burrave t'Malcisë,  
 Kurrkush nesh s'ka luejtë një gur,  
 Megjithëse kryq e tërthuer

Po derdhë pare sod Tirana  
 Për “patriot” e “veterana”,  
 Për “dëshmorë” edhe “therorë”,  
 Ktij mbaj çunin, atij çupën,  
 Asajë me pare mbushja kupën,  
 Kin’ demek për grue “deshmori”.

ÇAKO  
 (Babatasi)

Besà, pra, s’thotë keq Matija:  
 Sado qi kto fjalë të tija  
 Shum ndokujë, q’i kem’ për ngjat,  
 S’do t’u bijnë tham për shtat;  
 Pse e vërteta asht kjo, zotni,  
 Që për komb e për liri  
 E, për t’mjerën moj Shqipni  
 Kanë luftue malcorët e shkretë,  
 Ç’merr prej Krujet e përpjetë.  
 Se ortodoks, muhamedan  
 -Qi rrim sod me lugë n’sahan  
 Kush dëshmorë, kush veteran –  
 Për Shqipni kurrnja s’kem bâ  
 Më sa plàk e kalamá.  
 Çka â ortodoks, ka dashtë Grekinë,  
 Karadakun e Serbinë;  
 E shka â turk, ka dashtë Turkinë.  
 E vërtetë, se mâ se ‘i herë  
 Na ortodokst kem bâ poterë  
 Me turki, po ti e din vetë,  
 Jo për ketë Shqipninë e shkretë.  
 A po turqt? A për Shqipni  
 Sa herë grî janë me Turkí?  
 Po, tamam, pra! Për bidate,  
 Për ndo’i Pashë, ndo’i kallavrade,  
 A për t’rrasun ma mirë zhabën,  
 Por gjithmonë, po, për t’mbajtë “babën”  
 Në Shqipni....

BABATASI  
 (Çakos)

Jo, mirë po thue,  
 Kshtu m’dan puna edhe mue.  
 Megjithse ndoj Belkameno  
 Ase ndo’i Mihajl Grameno  
 Aty-ktu asht gjetë n’Toskni  
 Për me rrokë armët për Shqipni;

Si edhe ka zotni korçarë  
 T'cillt kanë kënë e mbetë Shqiptarë  
 Tue vue gjânë n'rrezik e jetën,  
 Edhe n'kohë n't'cillën të shkretën  
 Mori Korçë Greku e pat shtrue,  
 Prap se prap, drejt me kallxue  
 Malësori ka luftue  
 Kurdoherë për Shqiptari,  
 Për liri e për kombsi,  
 E, për Flamur kuq e zi.  
 Zâti s'ka Shqiptar t'vërtetë  
 Veç prej Krujet e përpjetë.

#### MATI LOGORECI

Për mâ tepër oratori  
 Kshtu bisedën gjatë e tori:  
 “S’jém kristjan as muhamedan;  
 Se né “Ingjill” edhe “Kuran”  
 Hjedhë i kemi mbi tavan;  
 Besà t’ënë është Shqipërija,  
 Se né kisha edhe xhamija  
 Na ká darë, na ká përçarë”.  
 Kinse kshtu se sod ndër né  
 S’kqyr mâ kush besim, as fé,  
 Veç kombsi, liri e Atdhé.  
 Edhe kjo, zotni, asht rrênë;  
 Pse si motit qi ka kënë  
 Kshtu edhe sod shka asht Shqiptar  
 Asht dintar a se fétar  
 E â der n’thundër fanatik,  
 Njeni tjetrit fjesht anmik;  
 E për kryq a për “jebrik”  
 Veç pse s’ka, ndoshta, kërçik,  
 Se për ndryshe “adalet”  
 Kisht’ me bâm mbi shokë të vet.  
 Jo, po, t’tana kto janë rrêna,  
 T’tana rrêna e kaçarrêna,  
 Edhe petlla qitun n’ujë,  
 Pluhën sysh për gjinde t’huejë:  
 Thue se t’huejtë janë teveqela,  
 E, jo mâ do biramela  
 Me t’dhânë voen, besà, pa t’kuq,  
 Me t’shitë gogla për kakruq.  
 Janë pallavra, zotëni,  
 Fjalët që t’madhe ktu n’çarshi,  
 Porsi t’ishte n’nji ùk shpati,  
 Petulloj tash deputati:

“Se kristjan e muhamedan  
 Janë, shyqyr, sod bark e shpínë”.  
 Ah, jo, n’thes minarja s’hínë!  
 Se kto fjalë stereotipike  
 Janë këlbaza e njaj “klike”,  
 Që, strukë mbrapa Qeverisë,  
 Do me sjellë punët e Shqipnisë  
 Mbas hesapit të Turkisë.  
 Ktu, po, asht “soni”. Nuk janë gjâ  
 Këto fjalë, jo. Për me bâ  
 Që Shqipnisë t’i epet e mâra,  
 Ktu njiherë e pikë ma e para  
 Doemos lypet, që n’mjet t’vetit  
 Të gjith qytetsat e ktij shtetit  
 Shoqi-shojnë t’a mbajnë për vlla;  
 Se për ndryshej Shqipni s’ka.  
 Mbasandej lypet drejtsija,  
 N’mos daçim që t’hupë Shqipnija;  
 Por drejtsi, jo hipokrizi  
 Për t’mos tjerrë punët tortë  
 E ujë për t’mos t’bartë me shportë,  
 Lypet, po, nji dorë e fortë,  
 Që, me t’butë ase me dhûnë,  
 Drejtësinë me qitë në punë.  
 Sa për fjalë qi ktu oratori  
 Varg për muhaxhirë na i tori  
 E vërtetë se na detyrë  
 Kém’ me pritë edhe me i kqyrë,  
 E për bukë mos me i lanë keq:  
 Por për bukë, jo për përpeq.  
 Pse edhe askund s’asht punë urtije  
 Me vú shteti zota shpije  
 Muhaxhirët ndër né. Nji nieri,  
 Që s’ma ká plâng as shpi, bâ zhiri,  
 Që prandej shka me djërrë s’ka,  
 Veç çka me fitue, bèlà  
 Manà, mund t’i gjindet shtetit  
 N’politikë a n’punë të budgetit;  
 Sidomos, po, n’punë t’budgetit;  
 Pse kollaj mund t’i hánë shpina  
 Me pasë vila e automobila,  
 Me mblue n’Bankë “Rushpa” e “Sterlina”;  
 E, aj që kjé der djé “teneqe”,  
 Me blé mylk edhe qiflleqe,  
 Edhe kshtu lânë me u rritë thojt,  
 Shqipnis s’mjerë edhe patkojt  
 Me ia hjekë, se mâ likurën  
 Po se po: Herë shto “faturën”,

Herë ngatrrro ndër “konçesione”,  
 Tash ndër “djeta” e ndër “pensione”  
 Tash.... eh ku t’a di un i mjëri!  
 Veç se e di, që larg tefteri  
 Mund ta qesë popllin e ngratë,  
 Qi s’po i del as buka thatë,  
 Për me mâtjë do zogj shqiptarit  
 Prej Sanxhak – Novi – Pazarit.  
 Prej Dobrugjet, prej Kosovet,  
 Prej Prishtinet e Tetovet  
 T’cillt po thonë janë Shqiptarë,  
 Brez mbas brezit m’gjët të parë:  
 Fjesht Shqiptarë, po të gjith kotrum,  
 “Të lumt na, se shum, se shum”!  
 -Për zogj t’rikës, të cillt ndoj kllukë  
 Me zogj t’vet nën fletë i strukë,  
 Klluka thotë se pula janë.  
 Por i zoti qi ka dhânë  
 Voet e rikës me çilun pula,  
 Aj e di – ia di edhe ksula –  
 Se s’janë pula. Veç, kè atij  
 Mishi i rikës i shtjë lakmi  
 E pse drò se rika vetë  
 Zogj nuk çilë, aj kllukës nën fletë  
 Voet e rikës n’furrik ia qet,  
 Që t’i çil e zogj’t’i rrisë,  
 Tue kujtue se janë të vett.  
 Edhe kshtu, po, i zoti i shpisë  
 Nèpër kllukë, qi zogjt s’dallitë  
 Po ka rika edhe me shitë  
 Sa me ngrânë edhe pa bukë.  
 Ndiç po thâm, për popllin kllukë  
 Muhaxhirët janë fjesht Shqiptarë  
 Brez mbas brezit n’gjët të parë:  
 Fjesht Shqiptarë, po, të gjith kotrum:  
 “Të lumt ná, se shum se shum”!  
 Por shka janë tamand, me thanë  
 Nuk po e dijte as birameli  
 Zotëni Pandel Vangjeli:  
 Veç se i njef zoti Salí  
 Vuçiterni: Biringjí  
 Ardhetar, besà, edhe kyt:  
 -N’dashtë se rima t’bâjë tehyt –  
 Atdhetar, po, e fjesht Shqiptar.  
 Jo, Shqiptarë me nandë likura,  
 Të trasha fort, edhe mendiz,  
 -Elè mâ mendiz për ura –  
 E mbi t’gjitha hoxhë telbiz:

Veç se hoxhë mjaft tekahyt,  
 Der sa kjé pa u bâ Shqipnija,  
 -Dikur Shqype, sod kjé qyqe –  
 E, endè bâ s'isht hoxhë modern,  
 Pa "çallmë" m'krye e mjekrrën shyt;  
 Pse aso kohe zotënija,  
 -"Çallmë" kur barte n'Vuçitern –  
 Po e kisht' pasë punën n'telhyqe. –  
 -Asht uzdajë se Asambleja,  
 Me statute e ligjë të réja,  
 Ka me dijtë me i dalun zot  
 Kësaj Shqipnije për shum do mot,  
 E, me pritë që ndo'i "patriot",  
 Ndo'i "dëshmor" a "veteran"  
 Mos t'a lshojë t'mjerën n'zalldan,  
 Veç për t'mbajtë lugën n'sahan.  
 Prandaj, t'thrrasim t'gjith një zâni:  
 Rrnoftë Shqipnija!

#### NJI GJIMNAZIST

Edhe sahani....

Nxanësat e shkollave nisin me këndue Hymnin e Flamurit  
 "Porsi fleta e Engjllit t'Zotit". Kur fillojnë përkthesën "Bini  
 Toskë, e bini, Gegë", Babatasi, tue përcjellë kangën,  
 këndon nën zâ:

Bini, Toskë, e bini, Gegë!  
 Shoqi-shojnë shkoni tue djegë!  
 Bini n'pshesh! Bini n'laknorë!  
 Trima, mbrendë! Me dorë! Me dorë!



## AKT' I TRETË

## NË RESTAURANT

Kryetari i Bashkisë së Tiranës e Kryetari i Asamblesë qendrojnë përballë e, me fesa të thijtë në krye, kanë xanë kryet e vendit. Mandej, Ministra e Deputetën e tjerë të grishun, ndër të cilët edhe BABATASI, janë ulë kush ndër vende t'caktueme, kush aty ku mbas gjaset i duket se asht té vendi. Disa shikojnë jo vendin që mund t'u takonte, por nierin ngjat të cillit dishrojnë me ndêjë. Kshtu:

KRYEKUNGULLI me TERRTABUCLECIN; VESHLLAPOTA me KRYEMATAREN, SURRATQEREPI me FTYRFUDULLIN, KRYETULI me GOJOPANGEN, HUNDSPECI me HUNDKASTRAVECIN e tjerë, sidomos dallkaukë aty-ktu, rreth e rrotull. Diku atje poshtë ka xanë vend edhe MIHAJL GRAMENO. Në fund të salonit një INSPEKTOR ARSIMI, që s'din shqip, pshty prej Turkijet në Shqipni. Në fillim mbi tryezë nuk ka pije, por Deputetënt lypin shumica birrë, ndokush edhe "mastikë", edhe menjherë u mblodhën tryezat me shishe birre, si lâmi i grunit me korba. Kush s'pifte, filloi me hangër minestrën që me kohë ka pasë kenë dikue(qitë) ndër çinija. Tue u çilë shishët e birrës, xen me u çilë edhe llapa e zotnive të grishun e nisin me bisedue, kush vesh m'vesh e kush t'madhe me shoqi-shojnë, tue thanë fjalë që me u ndie edhe skaj më skaj të salonit. Kah herë VESHLLAPOTA po flet dishka nën zâ me KRYEMATAREN.

## DIALOGU I

Veshllapota e Kryematarja

## VESHLLAPOTA

Si vjen devri edhe zamâni,  
 Me u seritë mbi vedi insâni!  
 Me u seritë me bâ çudi  
 Kë do punë mund t'bâjnë vaki,  
 Për të cilat kujton nieri  
 Se s'mund t'mbijnë hiri as pa hiri,  
 Por që rrotull tuj ardhë jeta,  
 Tue u endë moti ndër stinë t'veta,  
 Ato dalin fjesht t'vërteta,  
 Edhe bindet nieri i shkretë  
 Për shka mund të mbij n'ketë jetë.  
 Qué, po zamë, sot njizet vjet  
 Me pasë kapë kush muhabet  
 E me t'thanë se i'ditë m'mbretni  
 Do t'na mbahej kjo Shqipni,  
 Shqipni e keqe – e krejt teneqe –  
 Un, për vedi, do t'kish thânë  
 Se até mëndt krejt e kânë lânë,

Se trûtë m'qafë atij i kan rá  
 E asht krejt potkojsh ai lá,  
 Me u ruejt n'timarhane t'ndryeme.  
 Mirë, po, sod kjo â punë e kryeme,  
 E un, zavalli, me 'i kalë thîja,  
 Do t'vikas rrugve si fmîja:  
 Rrnoftë Flamuri e rrnoftë Shqipnija!

#### KRYEMATARJA

Meazallah! Se ç'kemi pritë,  
 Ç'kemi pritë – ma pá n'ketë ditë:  
 Me ia njitë vedit “Shqiptar”,  
 Arnaut – e npër pazár  
 Endu e shendu vi e vi  
 Përmbas Flamurit kuq e zi,  
 Tue britë t'madhe: Rrnoftë Shqipnija!

#### VEHLLAPOTA

E prá, e di, ti lum zotnija,  
 Se si vetë, po tash do mot,  
 -Kur ktu urdhnote tjetër zot –  
 E ná 'i m n' "fès" e n' "redingot" –  
 Kam lá lesh pa kqyrë shka â mshira,  
 Me t'gjith njata shqiptarë qafira  
 Që i kam gjetë se për Shqipni  
 Kan punue, e për liri  
 E për Flamur kuq e zi  
 I kam rrahë, i kam mundue,  
 Tokë e shpi u kam pushtue  
 Shnjertzue u kam un vajzë e grue,  
 E i kam kalbë, besà, n'hapsane,  
 E i kam tretë syrgjyn n'Adane,  
 U kam dhanun mal e shkrep,  
 I kam marrun për gazep,  
 Un, po, vetë, po, bendenyzi;  
 Pse mehmurët që çonte Yldyzi  
 Ishin t'butë e s'ki'n kyvet  
 Për me e bâ Shqipninë terbjat....  
 Si kjé puna, tash, s'po di,  
 Qi ná u bâ né kjo Shqipni,  
 Kshtu, pa pritë e pa kujtue:  
 Punë që kurr s'e kish mendue!

#### KRYEMATARJA

Eh Shqipnija – lum zotnija,

Ajo u bâ, pse kshtu desht fati:  
 Diku fati – diku Frati,  
 Diku miku – diku anmiku,  
 Ku letrari – ku atdhetari,  
 -Që pshtue patën nga litari –  
 Elë Austrija – me singija,  
 Dër që s'mbrami u bâ Shqipnija.

(Dikush gugson të madhe në salon.)

Mkamsit bijnë “pilafin” m'tryezë. Nji palë Deputetën nisin me u xanë për punë të “pilafit”: kinse “pilafi” ka kenë tash 500 vjet e tektej – ideali i shqiptarvet, për mbas të cillit motit nji palë shqiptarë s'kishin marrë e turp me pshty më Fé e Atdhé, më sa do tjerë s'kan turp sod me shkelë n'ertz e besë e burri.

## DIALOGU II

Kalangêrrçi e Kryekortolla

### KALANGÊRRÇI

Jo, po, vetë – e kam pa rrênë –  
 Kurr shqiptar – tobë! – s'kam kënë,  
 As s'kam dijt se shka â Shqipnija,  
 Shka Gegnija – e shka Tosknija,  
 Shka kombsija – e shka lirija,  
 As shka t'zijt asht Qeverija;  
 E as kam pasë un dijeni  
 Për at Flamur kuq e zi,  
 Që tue hjedhë rri për terthuer  
 Atje nalt mbi Prefekturë,  
 Ku pat kenë “hâna” dikur.  
 Se un tash vonë jam bâ Shqiptar,  
 Kur jam shkrue s'pari zyrtar  
 E mu lidh rroga n'frang ar.

### KRYEKORTOLLA

Po a 'imënd lypet që 'i zyrtar  
 Domosdo të jetë Shqiptar  
 Për me marrun rrogat n'ar?  
 Se, as un kurr Shqiptar s'kam kënë:  
 “Shqiptar” do me thanë i kshtënë!

### KALANGERRÇI

“Shqiptar” s'do me thanë asgjâ....

## KRYEKORTOLLA

E po atëherë? Si me ia bâ?

## KALANGERRÇI

Kollaj fort. Njiherë vën n'krye  
 Nji ksulë t'thijtë, disi m'njân' sye,  
 Për me dajtë dishka rrebël,  
 Edhe ngrihu kacagjël  
 Mbi shokë t'ue: P'r'i burrë Shqiptar  
 Asht si "shan", me kenë krenar,  
 Çehre-suz, brutal. Atbotë  
 Zën n'gojë Lékë e Kastriotë....

## KRYEKORTOLLA

Allahile! – Se t'rashë n'fjalë –  
 Disa herë kam dashtë me t'ndalë  
 E me t'pvetë, shka asht ky Kastrjota,  
 N'gojë që e zânka ktu mbarë bota?  
 Turk a i kshtënë – a shka ká kënë?

## KALANGERRÇI

Ky ká kênun nji krutânë:  
 Elez emnit i kan thânë  
 -Shqip, demék, Gjergj kisht' me 'i ardhë –  
 Edhe ky, moj faqja e bardhë,  
 Paska kênë, po thonë, nji zdap,  
 Hukubet i madh, sa 'i trap,  
 Me nji mjekërr për gazep,  
 Edhe kênë paska kasap,  
 Që nuk pritte veçse skjèp  
 Për "babajn" e teqes s'Krues,  
 (Kushrî i parë nga ana e grues....).  
 Qatje vonë – për ç'punë s'e di –  
 Paska rá Mbretit hasí  
 Edhe hikë e dalë kah Zhuba,  
 Ku na u bâkà me do cuba,  
 -Brac i keq – tue vjedhë ndo'i shtrrí,  
 Der' që e kapin dy zaptí,  
 Dy djelmoça – si kaproça,  
 Me mustaqe vesh e m'vesh,  
 Të cillt lidhë t'a çuen në Lesh  
 E, ta rrasën mbrendë n'hapsane.  
 Aty, atëherë, ky kopilane,  
 Tue ngranë kastraveca e fiq

Mori ethet edhe diq.  
 Diq e shkoi, si mos t'kisht' kënë  
 As turk dinit, as i kshtënë.

#### KRYEKORTOLLA

E, m'atëherë pse m'e përmëndë  
 A ndopak, thâm, ketë belá?

#### KALANGERRÇI

Po, por t'kshtënët e mbajnë "iljá".  
 Prandej ti, tue kënë zyrtar,  
 Për me u dukë se jë Shqiptar,  
 Njifarë vllaut me të krishtënë....

#### KRYEKORTOLLA

Meazallah!

#### KALANGERRÇI

Po ndonji herë  
 Kë nevojë – t'a zâshë me gojë  
 -Merret vesht: Kodër mbas bregut –  
 Emnin e Gjergj Skander-begut  
 -Sozyn ia bâmá! – Pse kshtu  
 E lypë puna sot ktu.

(Prap ndihet një goksim i fortë në salon.)

#### MONOLOG

#### DAUD EFENDËJA

Ish-mehmur i Turkisë, mbushë dy fulqitë, tue u përçapë e  
 me  
 një koshë bibe në dorë, vedi me vedi.

Po, po; sod Shqiptar un jam,  
 E Shqiptar për t'mbetun kam:  
 Fjesht Shqiptar e zog Shqiptarit,  
 Mjaft qi t'm'hecë mue rroga arit.  
 -Jo mâ, thonë një palë, nuk bân  
 Një turk dini, 'i mysliman,  
 Kënë dikur tebaja i Mbretit,  
 Sod, "Shqiptar" m'ia njitë aj vedit,  
 Me britë rrugave si fmija:  
 Rrnoftë Flamuri! E, rrnoftë Shqipnija!

E mehmuri i nji Turkisë  
 Me marrë rrogat e Shqipnisë! –  
 Khanëm, po, s'po them se jo:  
 Se mâ ná t'Dauletit jina,  
 As t'gjallë pa Daulet nuk kina,  
 Veç, p'r'i herë, Daulet s'po ká,  
 Mandej vetë, manà, n'belá  
 Kish' me rá, pa 'i mehmurjët,  
 Sado t'vogël, n'hyqymét  
 Të Shqipnisë, që, sado shkrét  
 T'mujë disi me gjeçenisë,  
 Mirë a keq, me u beshletisë.  
 Se manà, kaq qesatllék  
 Ka kapë vendin sa, demêk,  
 S'ké pse del n'pazar aspàk:  
 Veç me u êndë , po, npër sokàk,  
 Me pi kafe – me çá llafe;  
 Se, për punë me bismiláhi,  
 S'ké shka bán n'pazar, valláhi! –  
 Veç se as kjo Shqipnija e jonë  
 S'po ishte, besà, ashtu si thonë,  
 Krejt e keqe – edhe teneqe.  
 Që njiherë e pikë ma e pára,  
 Për me folë si e lypë e mâra –  
 Nji kjo e bardha Shqipni e jona,  
 Qi lánë rrogat n'napoljona –  
 S'po m'â vên mue gjunin n'bark  
 Që m'i a njitë un vedit "Mark":  
 Me prishë ditt e ramazânit  
 E me dalë dinit e imânit.  
 Bilë.... nejse. Mbasandej  
 E dijnë t'vogjël edhe t'mdhej  
 Se un për dije jam krejt bèrr,  
 Lé e rritë, si thonë, në térr,  
 E se asgjâ, harâm, nuk dij.  
 Jo, për dije, dij pak fort,  
 Pse, kur un kam pàs kënë fmij,  
 Në mejtëp m'çojshin me zòrt:  
 Kshtuqi sod un, për kah dija,  
 Jam – si me thànë – mjaft bagti,  
 Nji sênd që, po, vetë Turkija  
 Si këlbazë m'pshtyni n'Shqipni:  
 M'qiti jashtë, shkurt llakërdija,  
 Kë asaj gjâ s'isht tue iu dashtë  
 Pa gjâ n'xhep e me byk n'rrashtë.  
 Por, po e zâmë se un dishka dij,  
 -Se prap Turku ktu n'Shqipni  
 Po sundon, si pat sundûe

N'ato kohë qi kan kalue, -  
 Sa meash, thue, do t'm'kisht' dhânë?  
 Pesqind grosh n'muej, shum me thânë!  
 Po, por kjo Shqipni e jona  
 Rrësh njizet m'ep napoljona  
 Rrogë në muej, pósë se aq e mâ  
 Marr nën dorë. Eh!....shka me bâ....  
 Kshtu po e kishte kjo dynjâ:  
 Dy nën dorë e tri nën thue,  
 Un për vedi e ti për mue - ....  
 E pra vetë mezi me kndue  
 Që dij shqip: Se mâ me shkruë,  
 Pak e aspak. Do t'kuqem n'fytërë  
 Me pasë kush me ndejë tue m'kqyrë  
 Kur vé imzan. Prandej me mhyr  
 Un nënshkruej akte zyrtare,  
 Kah për shkrim dora s'm'bân pare.  
 Pse, prá, tash, përse un dikur  
 Pata kënë tebaja i Mbretit  
 Edhe kënë pata mehmur  
 Nën Turki, Shqiptar sod vedit  
 Mos t'ia një: Edhe, demek,  
 Prej Shqipnisë mos t'marr ajllék,  
 Mbasi sod un në Shqipni  
 Po i kam punët mjaft n'terezi?  
 Përposë ksaj – kam shum uzdajë,  
 Uzdajë t'ngulët e jo hava,  
 Mbasi kam un nji akraba  
 N'Ministri – ngjati, Zo'jetën! –  
 E kam miq do Deputetën,  
 Se do t'zgidhem veteran:  
 Kin', demek, se un nji zaman  
 Qindrue paskam për vatan,  
 A, si thonë sod, për Atdhé,  
 Tue bâ nâmin n'turq e m'shkjé:  
 Turqt tue i vrá e shkjet tue i pré!  
 Ani turqit!....Sa për shkjé,  
 Lè se vrá nuk kam kurrkënd,  
 Por, mos tjetër, nëpër mênd  
 Sa kjé Turku në ketë vënd,  
 Do t'm'ket shkue kjo punë, thâm, shpesh:  
 Si me i bâ, demek, t'gjith pshësh.  
 Por për turq....a bân vâki?!....  
 Si m'kan shpifë ketë punë, s'e di!  
 Un kam plasë me i ndalë n'Shqipni,  
 Jo mâ, tash, shì vetë m'ia hí  
 E, kshtu m'turq me bâ kerdí!....  
 Ah pà! Pà! Pà! Rrêna! Rrêna!,

Xhânëm! Rrêna e kaçarrêna!  
 Un vetë turk, paskam pàs vrá  
 Turqit? Meazallah! Hatá!....  
 Diku veç ndoj Deputat  
 E ka hjedhë ketë fjalë për shpat,  
 Sa me e qitë punën në kllef,  
 Se, manà, mue gjithkush m'njef  
 Edhe e din se për Shqipni  
 S'kam bâ tjetër – kè un e di –  
 Der më sod, veç se ndo'i fmij.  
 Prandej fjala veteran,  
 Që kjo po ishte 'i fjalë taljan,  
 Shqip mund t'thohet për taman:  
 Kastraveca për bastan....  
 Sido kjoftë, si veteran  
 Kam me pasë një rrogë mujore  
 Prej Financavet shtetnore.  
 Prap Shqipnija – berqavers! –  
 Dy djelm t'mi, me t'cillt mjaft ters  
 Kam pasë punën, pse harâma,  
 Faqezet e dy kryeshtëma,  
 Zhytë ndër vese e ndër flligshti,  
 Sa as s'kam mujtë me i pá mâ n'shpi  
 E i kam pasë primënd havale,  
 M'i ka marrë e çue n'Itale,  
 Tue m'u dhânë bursa shkollore  
 Prej Financave shtetnore.  
 Edhe kshtu, n'saje t'Shqipnisë,  
 Ata tallen e gërvallen  
 Npër sokaqet t'Italisë,  
 Kin', demek, po xamë terbjët,  
 Po xamë dije e marifet:  
 Endu e shendu poshtë-përpjetë,  
 Si ata mázat nëpër knetë!  
 (Ktu gukson njëherë të madhe)  
 Por kam pasë edhe një cucë,  
 Një gojëshkarpë, një sybirucë:  
 Sa kam drashtë se ká me u plakë  
 Mbrendë në shpi, pa gjetë nafakë,  
 Pa gjetë kënd që m'ia ngâtrrue,  
 Tue ia dhânë, belanë, për grue:  
 Vajza rritë e bâ hargele.  
 Kur, qé, 'i ditë Ministri i Arsimit  
 Çon e m'thret me shumë exhéle  
 -Porsi t'ishite shtet rrethimit –  
 E me mue, ashtu krye për krye,  
 M'ban rixhá qi t'éme-bij  
 Ta dërgojshë der n'Austri



Për me xánë vajza me kcyë,  
 Me m'xánë dájre edhe çapáre,  
 Që kur t'kthete n'tokë shqiptare,  
 Pipin n'gojë, synin kakruk,  
 Për mbas vedi ndoj qén-uk,  
 Zhaburetën ulë m'njanë sye:  
 Buzët në t'kuq, marshalla, zhye,  
 Si t'kisht' ngrânë fiq kakarëça,  
 Vetllash repë si peshqt lakéça,  
 Dy kapakësh setrën shpërthye:  
 Përmbi gjû kotllën shkurtue,  
 Krahët der m'stjetlla picakue,  
 Vesh e m'vesh flokët rrumullue,  
 Dishka djalë e dishka grue,  
 T'dijte ajo rrugës me u përkûndë,  
 Kodër vithet me i lëkûndë,  
 Me hjedhë kamën, me dredhë belin,  
 Me këcye "kamsharavelin",  
 Kamë për kamë e duer për duer  
 Me oficera e me mehmurë  
 Me Njizetetetë Nanduer;  
 Pse po thonë, ka thanë Luigj Shala,  
 Gjergj Kokoshi e Qamil Bala, -  
 Zgjedhun teste mbas besimit –  
 Se t'gjith vrapi i qytetnisë  
 E i lulzimit të Shqipnisë,  
 -Posë se nëpër brýna t'skjavit –  
 Aj po matej për mbas hapit  
 Që po bajshin varzat t'ona  
 Tue kcyë ballo npër salona:  
 Edhe grat – veç jo fort t'vjetra.  
 Kshtu që sa mâ haptë t'jetë "sétra",  
 Edhe kamët e ndoj marroqes  
 Sa mâ larg t'rrijn prej shoshoqes,  
 Kur t'kcejë ballo e t'hidhet lepër,  
 Duen me thanë se njáq mâ tepër  
 Hapet dija – e qytetnija,  
 E, aq mâ fort lulzon Shqipnija.  
 Edhe rrashtat arsimore  
 I caktuen nji "bursë" shkollore  
 Prej Financave shtetnore,  
 "Si mbas ligjit në fuqi".  
 Napoljona ar flori,  
 Për njiherë, mâ mirë nuk ká!  
 Mue Shqipnija m'doli vllá,  
 Mâ dahà se vetë Turkija:  
 Bân fmij grueja e mbâjë Qevrija.  
 Ku kjo punë mund t'bâjë vakí?

Kurrkund n'jeti veç n'Shqipni!  
 Jo, p'r'i herë jam n'terezí;  
 Kurr mâ mirë vedin s'e di!  
 -Dersa t'm'hecë, prá, puna mârë,  
 E t'm'hecë rroga në frank ar,  
 Kam për t'kënë gjithmonë Shqiptar.  
 Veç jam n'hall me t'ême-bij,  
 Që sa kthej, belaja, n'shpi,  
 Ia ka nisë kjo me u zgërdhî  
 Me harâma djelm të ri,  
 -Do kodosha batakçi, -  
 Hà-hà-hà! E hì-hì-hì!  
 Hì-hì-hì! E hà-hà-hà!  
 Tobe stagi furullah!  
 Por pse vetë, ashtu tue e pá,  
 Shpërvjelë shtatit për hatá,  
 -Me t'u xânë, vallâhi, syet! –  
 E, se askund s'po çáte kryet  
 As për t'âmën as për mue,  
 As me mshie as me gatue,  
 As pse digjej tava n'furrë,  
 Thashë me vedi: Diku burrë  
 Veç lypë kjo, po, edhe ia fola  
 Njaj zotnije, djalë esnâfë,  
 Mjaft i zoti edhe kah shkolla:  
 Muej për muej ky shtëk tue rráfë  
 N'at Evropë për reshperí;  
 Serë s'mirë, taman zotní.  
 S'dij kù t'zijt paska pasë ndie,  
 Edhe 'i ditë vjen tue turfillue,  
 E po m'thotë me sherbesllek:  
 A imënd, babë, don me m'martue?  
 -Hik, mò, i thashë! Maskarallek!  
 Nuk t'vjen marre, vajzë tue kënë,  
 Punë martese me përmëndë?!  
 Un nuk dij se ku e ké kryet  
 E, sa mirë të bâjnë ty syet,  
 Babë e nanë tue i pasë sod gjallë,  
 Me m'xânë mue n'gojë ketë fjalë?! –  
 Mirë, po kuçka ç'merr e ç'm'thotë:  
 Ti, mor'babë, jé njeri idjotë,  
 Injorant e fanatik,  
 Me tesbih e me jibrik:  
 Gukson t'madhe mbi sahán,  
 Rri tue u falë sabàh e akshám,  
 Lut bajram, mbân ramazán,  
 Edhe bân natën harám,  
 Se nanës sorra mëndt m'ia pivi

E, mâ s'din shk'â imperativi  
 Që po i thonë kamlikaçik....  
 Jo me gjásë, kategorik  
 Se un, po, burrin e gjêjë vetë,  
 "Si mbas ligjit në fuqi",  
 Se un kam zanë, manà, nji ashik,  
 Djalë të bukur-karajfil:  
 Se as lazëm nuk kam pvetë  
 Nanë, a babë, Hysejn, Tafil,  
 As me pritë m'bajram m'bajram,  
 Se un pa e marrë çajre nuk kam,  
 "Si mbas ligjit në fuqi":  
 Se s'ka Allah as Perëndi:  
 Nuk ka Krisht as Muhamet,  
 Se gjithshkafja asht nji shauret  
 Që përfton nieri n'rrashtë t'vet;  
 Se jashtë nesh nuk ka kurrjâ:  
 Na jém "Zot", na jém "dynjâ"!  
 Edhe del, si cùb haram,  
 Derën tue përplasun brrâm:  
 Kaq, naleti, isht' çue at ditë peshë!  
 (Ndër kaq i kcen mica n'tryezë.)  
 -Pis! Pis! Pis!....Pis! Hè kaurreshë! –  
 Taksirat, por shka me bâ!  
 Kush laneti pat dijtë gjâ,  
 Kur e nisa për Evropë,  
 Se mëndt do t'i darte n'shkjopë  
 E, se mue do t'm'kthete n'shpi  
 Me 'i qërr huj e 'i kal hakri  
 Tue m'a qitë gjithë ketë travajë!  
 Se, t'mos isht' po, shërri i sajë,  
 Un,vallahi, npër Shqipni  
 Kjeshë tue e vue krejt n'terezi,  
 Pse po m'thonë qi atje ma vonë  
 Nji pension Shqipnija e jonë  
 Edhe grues ka për t'm'ia dhanë:  
 Si shum kujë atje në Vlonë,  
 Durrës, Berat, Korçë e Tiranë.  
 E ma tepër kam uzdajë  
 Se kjo e bukra moj Shqipni  
 Edhe ajlleqet do t'm'i lajë,  
 Që m'kan mbetë pa nxjerrë n'Turki.  
 Un, qi motit nën Turki  
 Kam kenë rrëshkë e bâ sylash,  
 Edhe mrudhë si spec turshi,  
 E, me të thanë shum, nji zollotë  
 S'kam pasë n'qese, npër Shqipni  
 Po i kam prap sod m'katër rrotë:

Rrí e bâj pállë me grue e fmij,  
 Diku rroga, diku “thoni”,  
 Kodër qesja m’rri në gji,  
 Këndej thûmi, andej patkoni,  
 NËpër t’bukrën ketë Shqipni,  
 Kaq t’jam vû sod n’terezi,  
 Me m’a pasë një Páshë lakmi.  
 Veçse prap mue, si Shqiptar  
 Që jam sod, edhe zyrtar,  
 Kollaj fort mund t’m’qesë ndështrâsha,  
 Prap do drêdha – pak si t’trâsha –  
 Me ia hjekë Shqipnisë n’lëkurë:  
 Sa t’ketë gjâsë për një mehmur,  
 Merret vesht. Po zâmë: Një vilë,  
 Edhe t’vogël, ndoj qifllek;  
 Një pesë mij sterlina pilë  
 Kûnd n’ndo’i Bankë; ndo’i ortakllek  
 Me shoqin “Ragazzi” n’ura,  
 N’rruga, n’vija e ndër fatura  
 Ministrinash, nuk janë shumë.  
 S’shkoj un, jo, hallakatum,  
 Se as me fikë nuk due un shtetin.  
 Meazallah! Un due veç vedin,  
 Pak a shumë, me ndreqë. Sa páre  
 Bâjnë për shtet, disa cingâre  
 Sa t’marr n’ “Stamles”? Në Financë  
 Prap ndoj púllë? Një udhëtim der n’Francë?  
 N’Semmering, mbasi pak n’zgrip  
 Jam me shndet? Prap pse n’ “Agip”  
 Mangut t’dalë ndoj but benzinë?  
 N’petka ushtarësh pse ndoj sterlinë,  
 Si pa dashtë, t’m’rrshasë në xhep,  
 S’asht, kujtoj, gjithë aj gazep,  
 Si po e zâmë – e ktu po e lâmë,  
 Do kallâmkusure tjera  
 Që mehmurit hera-hera,  
 Si pa ‘hiri, i jesin n’thue,  
 Jo harám, harám nuk due  
 Një dy paresh.... Ah pá! Pà! Pà!  
 Tobé stagi furullâh!  
 Se harami asht një gjynah!  
 Jo qi as hajrin s’ia shef shpija.  
 Ndiç, po thâm prá, se Shqipnija  
 S’po ishte, besà, jo, aq e keqe,  
 As nuk po ishte krejt teneqe,  
 Si një palë shkojnë tue trillue.  
 Veç me ‘i punë thâm, kán gabue:  
 Që ia kán një emnin “Shqipni”.

Do t'kisht ardhë mâ n'terezi  
 M'ia pasë njitun "Hajmalí".  
 Se kjo kênka 'i bukuri:  
 Mue m'ka dalë, manà, Misir!  
 Do t'm'kisht' dalë, por, tham, mâ e mirë,  
 Po t'kish' ndollë un muhaxhir,  
 Me do krye tanë kodra-kodra:  
 Nji krye-grreç a krye-matáre,  
 Lkurën trâshë taman për lodra:  
 Si kál shtrigash npër xhaváre,  
 Ftyrfudull e terbjetsuz,  
 A për dylme – tobe stàg! –  
 Alà franka me tanuz,  
 Mjekrrën ndûkë, çallmën n'sokak,  
 Prift, as hoxhë, as pop për sy:  
 Zyft në shpirt, flori ndër dhamë;  
 Në kalem, në dije n'krye  
 Taman shtâsë me katër kamë,  
 Edhe vetë garuzhdë e djallit,  
 Çilipir tue i rá kavallit,  
 Pse ká gjásë, që do t'kish' hí  
 Edh' un, po, dikur në vistër  
 T'njertzve t'mdhej të ksaj Shqipni,  
 E me u bâ, ndoshta, Minister:  
 Edhe m'shpinë t'automobilit  
 Me 'i rá surles e bylbylit  
 Npër Tiranë, Korçë, Durrës e Shkodër;  
 Barkun fâ – marshalla! – kodër  
 Në "sutljásh" e "kabuni",  
 Gjela deti pjekë n'tepsi  
 N'shpinë të t'bukrës moj Shqipni.  
 M'pasët m'qafë baba – kjoftë i zi! –  
 Që gaboj e léu n'Shqipni  
 E, jo kund n'Greqi, n'Turki,  
 N' Rumani, n' Jugosllavi!  
 Mjaft me lshue nji sy n'Arsim  
 Për me pá, po, se ç'gëzim  
 Asht me kênë muhaxherim  
 Jugosllav sod në Shqipni!  
 Po, pra, dèh! Ktu në Shqipni,  
 Hè ksa'i raftë.... nuk dij se shka!  
 Se kjo kenka – marshallà! –  
 Përnjimënd nji bukuri,  
 Me t'vojtë mëndja, për Allah!  
 Se po asht harrna 'i gurabi:  
 Gurabi e vogël-gogël;  
 Prap, gjenë, ketë gurabi:  
 Kaq t'a vukân n'terezi

Muhaxhirët saloniklí,  
 Gogë, rumun, serb, stambollí,  
 Kush barí, kush djathaxhí,  
 Kush bakall, kush bozaxhí,  
 Paçaxhí – mejhanexhí:  
 Njani piq kshtëja n'çarshí,  
 Tjetri n'krye vú kamilaf,  
 Dikush hoxhë, dikush myftí:  
 Kush n'jorgan e kush n'plaf  
 Kush zhelan – kush sallahan,  
 Por yrýsh Ishue t'gjith m'pilaf,  
 Ta kanë qitë, po, Shqipnin' n'grusht,  
 E tóçë brryl n'mastikë e n'musht,  
 T'kanë bâ zyret monopol  
 Ç'prej Koplikut m'Konispol,  
 Franka ar tue grrye me spòl,  
 Do Ministra – e Kryeministra,  
 Tjerët prefekta – e nënprefekta,  
 Ktá n'Botore ata n'Foshnjore,  
 Disa antárë – disa gjyqtárë:  
 Kush me dá tokët e Shqipnisë  
 Ndër t'Dobruhas t'Rumelisë,  
 Megjithse aj vetë ktu ndën né  
 Mos t'i ketë kûnd shtatë pllâmë dhé  
 T'vetat, me hí n'vorr për s'dekuni –  
 E shko e eja npër Avropë,  
 -N' "wagon-lit" pështetë si lopë –  
 Ktu Bajloza, atje Sefira:  
 Krushq ndër Krajla e mysafira,  
 Me ja u pasë, manà, lakmi  
 Deri lordat n'at Angli!  
 Megjithkta, prap'mirë se mirë,  
 Jam sod Páshë, në mòs Vezír.  
 Nuk asht keq, jo, për Allah!  
 Prandej, prá, edhe un si fmija  
 Do t'vrras t'madhe: Rroftë Shqipnija!  
 (Tue pshtye dy a tri herë m'anësh)  
 Tobe stagi furullah!

## SHENIME:

Prof. Dr. Aurel Plasari

Dy fjalë për “GOMARIN” dhe “VISKUN”

Fatkeqësia më e madhe e një populli janë demagogët që pjell ai. Demagogët kanë vetinë të jenë jo veç rrënues kombesh, po edhe shkatërrues qytetërimesh; edhe qytetërimi grek edhe ai romak e morën teposhtë prej kësaj frote, që e bënte Macaulay-n të shfrynte: “Në të gjithë shekujt, shembujt më të ulët të natyrës njerëzore mes demagogëve janë gjendur”. Ata ndër shqiptarë që mund të duan të sigurohen për vetitë e kësaj frote, lé t’i lexojnë sot “Gomarin” dhe “Viskun”, sikur të kenë lexuar dje “Përrallat nga Zululandi” apo “Shqipëria si m’u duk” të një tjetër shkrimtari të mallkuar, Faik Konicës.

“Gomari i Babatasit” dhe “Visku i Babatasit” bëjnë pjesë në satirën politike të Fishtës në të cilën demagogu shqiptar është pikëzuar në tërë tipologjinë e vet: Si vagabond, si rrugaç që në Shqipëri nuk ka se ç’humb përveçse të fitojë, si shqiptar i shpifur apo gjysmë – shqiptar, si turk që e quan veten shqiptar, po dhe si shqiptar që e quan veten turk, si rriqën i pushtetit politik, si hajn e brac me thua të rritur në financë, si dylme e faqezi, si batakçi e rrushfetçi, si oksidental me veshët ende të padëlirur nga hallva e Orientit, po edhe si oriental në cilindër e redingot, si sallahan e zabërhan, si zagat elektoral i shpërthyer zinxhirash, si parlamentar kafenesh e mejhanesh, si filozof me trû të kaçurreluar ndër hambarët e gjymrykët e porteve, si politikan i bixhozit e i mastikës, si mercenar etnik shqiptaromadhi, si klikar irredentist që pështyn mbi atdhe për hir të dinit, si nëpunës i pacipë, si veteran i meashit, si sherrxhi të djalli, si pinjoll krenar gjaksish e katilësh, si hasëm kulture e qytetërimi, si neoshqiptar efendi, si qelepirxhi e xhagajdur, si shkrimtar armik me gramatikën, si matrahul e dallaveraxhi, si leader karavidhe që bën thirrje për Perëndim dhe tërheq për Lindje, si sociolog i formuar nëpër kafe-shantane të Evropës a i rysur ndër paçaxhiane të Tiranës, si xhambaz i ngrehur gjel mbi pasuri të shtetit, si autodidakt i arsimuar në tavull e zare, si konstitucionalist në gjak me ligjet, si nacionalist me lugë në brez e sy në pilaf e kështu vazhdimisht, pafundësisht, amshueshmërisht.

Nga ana e saj, e denoncuar, e gjitha kjo tipologji nuk mund t’i krijojë një shkrimtari, cilido qoftë ai, veçse armiq. Kësi armiqsh Gjergj Fishta ia krijoi vetes qysh në të gjallë; mbas vdekjes, sikurse ndodh rëndom, ata do të vinin duke iu shtuar. Sot, mbas gati pesë dhjetëvjetëshash mënjanimi të veprës së tij, doemos nuk ka për të qenë vetëm entuziazmi që do ta shoqërojë botimin apo ribotimin e veprës, të satirave politike posaçërisht. Mirëpo, nga sa ia kam dalë t’ia njoh psikologjinë si krijues, do ta thosha me bindje se Fishta është nga ata shkrimtarë të cilët e lëshojnë vetë brezin përtokë e, gjithsesi, trishtohen shumë kur nuk u shtohen armiqtë....

Thuhet se në zanafillë të “Gomarit” qëndron mundja në një lojë dominosh prej Z.Dhimitër Beratti, ministër i qeverisë shqiptare. Gjergj Fishta atë kohë ishte anëtar i Parlamentit dhe Z. Beratti, për t’ia bërë edhe më të rëndë mundjen, i shkruan një poezi humoristike, ia fut në një zarf me mbishkrim ministerial, i vë vulën zyrtare dhe ia dërgon në Parlament me anë të korrierit të dikasterit. Duke menduar se ka të bëjë me ndonjë njoftim të rëndësishëm e urgjent, Fishta e hap aty për aty dhe mbetet i çmeritur. Me t’u bërë një pushim, lë Parlamentin, shkon të ministri dhe e kërcënon duke qeshur: “Hë Toskë! Hé Toskë! Ti ké marrë pendën për të shpotitë një Gegë; tashti prite se kush asht Gega! Kam për ta kallzue vetë!”.

Pjesa e parë e “Gomarit”, ajo që u botua, nënshkruhej përnjëmend me pseudonimin Gegë Toska. Doemos, ndodhi të tilla mund të shërbejnë si anekdota për të ndihmuar në shtjellimin e ndonjë shkasi të krijimit të veprës. Shkaqet e mirëfillta të zënies së veprave të artit kërkohen e gjenden shumë më thellë. Në rastin e një satire politike si “Gomari” ato mund të zbresin të rropullitë e kombit ku, si në çdo organizëm të gjallë, së toku me qarkullimin e gjakut, qëlon edhe qelb, shumë qelb. Janë shkaqe që kanë të bëjnë me zhgënjimin e Fishtës prej jetës politike shqiptare në përgjithësi dhe prej parlamentarizmit shqiptar veçanërisht, jo thjesht si shkrimtar, por si një ndër pjesëmarrësit më të zellshëm në këtë jetë politike dhe si anëtar e nënkryetar i Parlamentit shqiptar të sapo krijuar. Me 1922, ndërkohë që ndodhej në Paris, ai e njofton sivëllain e vet At Pal Dodajn: “Jam tue shkruar një poemë satirike fort me randësi, në tetërokësha të rimueme, dy kangët e para të së cillës, shpnesoj, kanë me kenë gadi para se të lã Parisin. Do të flitet në këtë poemë për jetën politike shqiptare, si até të kaluemen, të tashmen edhe të ardhmen.”

Por, nëse hulumtojmë më përthellë, mund t'i gjejmë rrënjët e zhgënjimit fishtjan edhe më herët, qysh në vitet kur romantikët nacionalistë luftonin për krijimin e një shteti të shqiptarëve. Po Dodajt ai i shfrehej më 1907: “....I lumi ti, qi nuk i ké kalue të tridhetat e mund të késh ende ndjesi patetike! Sa për mue , me të thanë të vërtetën, sot kishe me dashtë me i mbytë mendimet e ktilla, mos tjetër....se kishte me kenë njisoj si me andërrue të pamujtunën. Sepse, e pamujtun asht për né me e pasun një Atdhé simbas Idealit t'onë.

Kush do ta trajtote këte Atdhé? Të marrët, apo kulimët e terbjetsuzat, njerëzit pa pikë karakteri të qyteteve tona, të poshtnuem edhe mâ prej dredhinave të mbrapaskenës së mirëbâsave të tyne t'interesuem e të bâmë edhe mâ të ligj prej mbrojtjes së dobët t'ustallarëve të tyne?... Të jesh prandej i sigurt se nuk do ta trajtojnë jo Atdheun tonë burrat mikroskopikë të Shqipnisë, të cillët, tue sha shoqi-shoqin e tue i bâ grindjet e vogla vetjake çashtje kombtare, sikurse kjé ajo e alfabetit, janë mikrobët e vërtetë të kombit qi po ia brejnë mushknitë, në mënyrë qi nuk ka me kalue shumë e Shqipnia ka me mbetë një coftinë e qelbun për me shue ûnë(urinë)bijtë çakaj t'Ausonisë ase zhgabat grabitqare të Danubit a por, çka asht edhe mâ zi, ujqit e arijtë e Ballkanit!”. Duke qenë se shfryrje të tilla, në të cilat radhitën varg e vistër shëmti, marri e ndotësi të shqiptarëve, i hasim gjithnjë më të shpeshta në letërkëmbimin e tij privat. Né sot e kemi të drejtën të përfytyrojmë se sa duhet të ketë hequr e vuajtur një shkrimtar si Fishta tëk ka qenë i shtrënguar të kridhej thellë e më thellë përçudnimit të një Shqipërie rënë në dorë të demagogëve, të një shteti që, më të mëdha se shpenzimet për arsimin kombëtar, i ka në buxhet shpenzimet për “hafije”. Për më tepër, të mos mund të zgjidhte për kryeveprën e vet satirike hero me të dënjë se një.... gomar! Ai çka tash na befason është fakti se pikërisht gjatë atyre viteve ky i Zhgënjyer i Madh, me kokëngjeshjen e një gjeniu ose të një të çmenduri, gdhend për dyzet vjet rresht epopenë e “Lahutës”, atë monument mastodontik “burrënie” e “trimnie”, “bese” e “qindrese”, “vllaznimi” e “bashkimi”. Ky shpërfytyrim prej demiurgu, i ngritur mbi një dekalazh tragjik shpirtëror, duket se ishte gjoba më e madhe që Poeti ia paguante Atdheut.

Me ç'dhimbe të thekshme duhet t'i ketë dashur Shqipërinë dhe shqiptarët një shkrimtar i tillë?

Këtë të fshehtë e paskan ditur do burra mendjehollë, të cilët na kishin paralajmëruar për fuqinë e pazakontë të satirës së tij politike: Benedikt Dema kur për këto satira shkruante se “mue më duken copa të një arti qi s'e ka shoqin në letërsinë botnore”. Lasgush Poradeci kur shpallte se “Fishta është njëri ndër shkrimtarët satirikë më të mëdhenj”. Pashko Gjeçi kur e cilësonte si “kirurg mefistofelik i jetës shqiptare”, apo Pal Dukagjini



(At Danjel Gjeçaj), i cili duke folur për satirën fishtjane, pohonte se “në këtë gjini pak kushi, besoj, mund t’i rrijë krahas ndër shkrimtarë të huej”.

Tingëllojnë si ekzagjerime? Këtë nuk mund ta themi aprioristikisht. Për t’ia peshuar vërtetësinë këtyre vlerësimeve, e shumë të tjerave si këto, t’i lexojmë njëherë “Gomarin” dhe “Viskun”, mandej lé t’ia nënshtrijmë ato gjykimit tonë; ky gjykim, sado i rrebtë qoftë, nuk mund të jetë me i vrazhdë nga ai i popujve të qytetëruar për veprat e satirikëve të tyre të mëdhenj prej të cilëve po me konop të lagur qenë rrahur. Sepse, nëse britanikët i meritonin “Udhëtimet e Guliverit”, rusët “Shpirtërat e vdekur” apo gjermanët “Përrallën e dimnit”, shqiptarët duhet t’i kenë pasur hæk jo më pak hëm “Gomarin”, hëm “Zogun e Gomarit”.

Shpjegime shprehjesh dhe fjalësh:

1. Parnas-mitologji: Mal që ngrihej mbi Delf, ku ndodhej vendi i shenjtë kushtue Apolit; për këtë arsye mendohej edhe si seli e Muzave (Zanave).
2. Pegas-mit.: Kalë me flatra i mitologjisë greke; nga Olimpi pat zbritë në Helikonë; aty me një shkelm çili një gur magjik që frymëzonte poetët të cilët pinin në atë burim.
3. Kvirinal-hist.: Një nga shtatë kodrat mbi të cilat asht ndertue Roma. Sot aty asht Selia e Presidentit të Republikës Italiane.
4. Bismark-hist.: Burrë i shtetit gjerman (1815-1898), asht futë në histori me nofkën e njohtun “Kancelari i hekurt”. Asht farkëtuesi i madh i unitetit gjermanik; ishte ndër autorët e “Aleancës Tripalëshe”(Gjermani-Austri-Itali), e cila ka luejt rol të rëndësishem në daljen e Ballkanit nga Perandoria Turke.
5. Dityramb-poet : Hartim i lashtë poetik; té grekët e vjetër vinte prej kultit të Dionizit prandej, lidhej me dehjen dhe euforinë.
6. Kaliopë-mit.: Muza (Zana) e elegjisë; paraqitej me një rrotull në dorën e majtë.
7. Aelius – personazh bihud, si duket deformat emnin e shkrimtarit dhe filozofit latin Lacijs Apuleus (rreth 150 –180), autor i veprës së bujshme “Metamofozja ose Gomari i Artë”, ku shkruhet për aventurat e një djalit të rij të shndërruem në gomar nëpërmjet të magjisë dhe i kthyer përsëri në njeri.
8. Pallas Athina-mit.: Një nga Hyjnitë ma të rëndësishme të Panteonit grek; asht vizatue në dy mënyra, si Athinë dhe si Pallas Athinë. Hyjnesha e luftës, këshilltare e afërt e heronjve ma të mëdhaj; ma vonë edhe mbrojtëse e arteve, shkencave etj.
9. Lassen Sie nuri- gjerman.- lene mâ!, mos e ço mâ gjatë!
10. Neni gordian- hist.: Kur ndodhej në Gordium, Aleksandri i Maqedonisë mori vesht punën e një njeje të ngatrueme në një mënyrë të pazgjdhëshme nga asnjë njeri, tue marrë vesht legjendën simbas së cilës ai që e zgjidhë atë njeje do të pushtonte botën, Aleksandri nxori shpatën dhe e këputi nyjen dysh.
11. Var, efendëm, var!-turq.: Fol, zotni, se flitke bukur!
12. Pravo, zdravo-sllav.: Mirë e bukur.
13. Laholevelá!-turq.:Ruejna, Zot!
14. Tobe estagi furullah!-turq.: Na ruej, Zot, nga ky mëkat!
15. Allahile!-turq.: Pashë Zotin!
16. Sozyn la bamá-turq.: Me nder’e me thanë....

Shenim: Shpjegojmë disa fjalë të vjetra, si dhe turqizma e italianizma të përdoruna nga autori si ngjyra stilistike kesësuese, ironizuese etj.

Adalet-ndf.: Shumë, tejmase, e teprueme.

Ajllek-em.: Rrogë, pension.

Akraba-ef. per.: Rreth familjar, farefis.

Angllisht-ndf.: Tjetër për tjetër, mbrapsht.

Avrom-em.: Gjindje, njerëz.

Bat-em.: Rrasë ose trinë që vëhët për grackë me kapë zogj, për kurthë.

Beledije-ef.: Bashkia në organizimin osman.

Bendenyz-em.: Sherbëtori i juaj – formë ironike.

Besh-dort-shpr.: Pesë-katër (në lojën e tavllës).

Me u beshletis-fol.: Rregullohem disi (nga ana ekonomike).

Bihude-mb.: Pa vlerë, i zbrazët, njeri kot.

Binish-em.: Mantel grash.

Botë-ef.: Baltë.

Crule-shq.: Cule, zhele.

Çarje-ef.: Mjeti ose mënyra me zgjidhë punë, me sherue.

Çangall-em.: Çakall.

Çyçek-em.: Hollak, i gjatë, njeri i lehtë.

Çynqi-ndf.: Të gjithë.

Dahá-ndf.: Ma tepër, aq ma shumë, asht shumë e me shtue prap.

Derbeder-em.: Vagabond, faqezi.

Dergjë-ef.: Tuberkuloz.

Devër (saber)-ef.: Durim.

Dishditës-ndf.: Një ditë, një herë, dikur.

Dogonis-fk.: Ngacmoj, lëndoj dike.

Dumbara-ef.: Hilé, rrëng.

Dy-shesh-shpr.: Dy-gjashtë (në lojna zares).

Dylme-em.: Dredharak, hileqar, njeri që të lahet e të lyhet – servil.

Eshek-em.: Gomar.

Eshendibilah-shpr.: Dishmoj me Perëndinë, me Zotin.

Exhele-ef.: Ngut, këtu: urgjent, gjá e shpejt.

Me u fâ-fk.: Me u ngopë, me u ajë tue hangër.

Ferk-em.: Dallohet mirë, shquhet për diçka.

Filuzë-ef.: Falimentim, bankrrotë, pa kurgja mbas shpirtit.

Fistan-em.: Fustan, fustanelë (veshja e burrave të jugut).

Gaç-em.: Kërriç, zog gomarit.

Garramet-em.: Punë e ngatrueme, me pengesa.

Gerhanë-em.: Krahën që Inuret leshi ose lini, krehet para tjerres.

Gopedër-ef.: Top i llojit të vjetër.

Gjët-em.: Këtu: afër, në cak, në fis.

Gjygyem-em.: Gjym, enë për ujë prej bakri.

Gjytrym-em.: Galamsh, ulok, i mbetun, i paaftë.

Hallakotrum-ndf.: Kot së koti, kudo rasha e mos u vrasha.

Hallbu-lidh.: Por, ama.

Handrak-em.: Pisllek, vend i ndytë.

Haps'hane-em.: Burg.

Hergjele (hergele)-em.: Tufë kafshësh e lanun lirë në kullosë. Pélë e zgjidhun.  
 Hasi-em.: Kryengritës, i pabindun.  
 Hep-jek,-shpr.: Një e një (dy njisha në zare).  
 Me hukatë-fk.: Me të shitue zana, me të lëshue frymen në fëtyrë.  
 Hukubet-em.: Diçka e shemtue, e keqe në pamje.  
 Hyqymet-em.: Qeveri.  
 Insan-em.: Njeri.  
 Imza-ef.: Nënshkrim, firmë.  
 Iptadije-ef.: Shkollë plotore (turke).  
 Iqi-bir.-shpr.: Po njësoj, po atë mënyrë, Po ashtu. (në tavëll).  
 Ishkile-ef.: Dëshirë e madhe, merak i fortë.  
 Ixhiram-em.: E metë, cen, e mangët.  
 Më jèt-fol.: Më mbeti, mbes pa e krye.  
 Jullar-em.: Ullar, kapistër.  
 Kabull-em.: Pelqim, pranoj, e begenis ket gja.  
 Kacabet (kaçybet),-em.: Skifter.  
 Kafaz-em.: Roje personale në sherbim të konsullit.  
 Kakruk-em.: Kokërr (një frut), me ndëjë në një qoshe pa tu ndi zani.  
 Kalangerrç-em.: Ecë si i mpimë, kur të kap ngerrçi. I sëmurë epileptik.  
 Kallamkusur-em.: Ajo që ka mbetë, teprica.  
 Kanavetë-ef.: Sënduk, arkë e vogël me dry, arkë ku ruhej diçka e veçantë.  
 Kardash-em.: Qehaja, pasvani, njeri i besimit.  
 Me kargatis-fk.: Shtrij, tendos, shtrimje mbas mpimjes.  
 Kartel-em.: Fletore, rradhuer.  
 Kashë-ef.: Arkë ku ruhen paret.  
 Kezë-em.: Kunorë.  
 Kermez-em.: Ngjyrë allë e mbylltë.  
 Kin' (kindemek)-pj.: Kinse, me bâ sikur, demek.  
 Kokòt-em.: Njeri që ngrehet si gjel, fryhet si pâci, torollak.  
 Korcull-em.: Korsuj, korcullarë, konsull i konsullatës.  
 Korname-sh.: Pohe, krenari me shumë kërkesa.  
 Kotrum-ndf.: Kot më kot, kudo rasha e mos u vrasha.  
 Me kreckue-fk.: Krasis, me krasitë barin.  
 Kulihum-ndf.: Kryengulthi, me u rrëzue (me rá) nga pakujdesia.  
 Kulim-em.: Mistrec, përqeshës.  
 Lazëm-ef.: Bân lazëm, hyn në punë, duhet për ....  
 Lbozë-ef.: Blozë, çagjë oxhakut.  
 Llakordi-ef.: Llafë, thashetheme, shumë fjalë.  
 Maklladë-ef.: Dokërr, profkë.  
 Mallá-pj.: Mos vallë, ndoshta.  
 Mallimét-em.: Veshje e të vdekunit, rroba vdekjet.  
 Maná-ndf.: Besà, kështu prá.  
 Meash-em.: Pagesë, rrogë, pagëtyrë.  
 Mehmur-em.: Nëpunës.  
 Mehmuriet-em.: Nëpunësi, punë në zyre.  
 Mendiz-em.: Specialist, ekspert, i aftë.  
 Mereqep-em.: Mellan, bojë shkrimi.  
 Metelik-em.: Monedhë turke, e dhetë e pares, një qindarkë me vlerë pak.

Mexhelé-ef.: Kodi civil (i vjetër i Turqisë).  
 Mhyr,(myhyr)-em.: Vulë, unazë që përdorej edhe për dyllosje.  
 Mylk, (mylqe)-em.: Pronë e madhe, tokë, kullosa, vneshta, pyll etj.  
 Nafakë-ef.: Fat, baft, shans.  
 Piç-em.: Njeri pa vlerë, batall, burrë me mendje fëmije.  
 Plish-em.: Bûcë, copë dhëu.  
 Portare-em.: Trinë e thurun me thupra, që sot asht dera e oborrit.  
 Qesatllëk-em.: Mungesë pune, kriza ekonomike.  
 Rrangë-ef.: Punë e përditëshme, barrë, ngarkesë.  
 Rreshper-em.: Tregtar, qarkullues paresh me sasi të madhe.  
 Ruzhdije-ef.: Shkollë fillore turke.  
 Rriqën-ef.: Parazit që thithë gjak në veshtë e qenit, njiçtë si rrodhe.  
 Sallahani-em.: Rrugaç, vagabond, kasap në kuptimin fyes.  
 Samadak-em.: Djalë i ri dhe i aftë në punë.  
 Sandalije-ef.: Poltron, karrigë e rahatëshme.  
 Se-jek,-shpr.: Tre dhe një (në lojë zareshe).  
 Sebet-em.: I afërm, kushrini, farefis.  
 Sefir-em.: Ambasador.  
 Singi (syngji)-ef.: Bajonetë arme.  
 Son-em.: Fundi i lojës, përfundimi, letra e fundit në lojë.  
 Spathok-em.: Lapër, leckaman, i lanun, pa vlerë në shoqni.  
 Spik-em.: Gajtan leshi zbukurues. I heq spik jetës-ban jetë të mirë e me kërkesa.  
 Stom-em.: Pjesë toke e çueme rreth arave, tokë mbi nivel të brigjeve të lumit.  
 Stramastik-em.: Pjellë e përfueme nga prind llojesh të ndryshme, p.sh. qen me ujë.  
 Sylah-em.: Brez armësh.  
 Syret-em.: Fëtyrë, ka syret e t'et...ngjason me babën e vet.  
 Syretá-em.: Për pamje, për dukje, për fëtyrë.  
 Syrgjyn-em.: Internim. I dëbuem.  
 Shah-ndf.: Kur kali çon dy kambët e para dhe rri madhshtor mbi dy të mbrapmet.  
 Shakllaban-em.: Llapazan që kërkon me përqeshë të tjerët.  
 Shan-em.: Dinjitet, nderë.  
 Sheste-ef.: Busull, nuk di me mbajtë shesten – nuk di me mbajtë drejtimin.  
 Shesh-besh-shpr.: Gjashtë e pesë (në lojë zareshe).  
 Shkorret-em.: Vend me shkurre, ai i shkorretit-euf. Ai i djallit..., vendi i dreqit.  
 Shmertis-fk.: Zbloj fëtyren nga perçja ose napa.  
 Shnjalli-em.: Djalli, asht si shnjall – asht si dreq.  
 Shqek, shqekë-em.: Xhep, xhepa.  
 Tanuz-em.: Fes i zi alla turka, tanuz – model nga Tunizia.  
 Tarbjetsuz-em.: Nuk shtrohet, nuk bahet tarbjet, nuk bindet.  
 Tarabë-em.: Drrasat që hapin e mbyllin pamjen e dyqanit.  
 Tebá (tebaje)-ef.: Nënsh tetas.  
 Tekahyt-em.: Gjysëm njeriu, i sëmure nga mendtë.  
 Telbiz-em.: Dinak, i rrafinuem, dhelpnak.  
 Me ternue-fk.: Shndrojt, metamorfojt.  
 Terrçuk-em.: Lëkurë e bame thës.

Teste-ef.: Dhetëshe, zgjedh teste –“ma të mirat”.  
Tevabi-ef.: Përcjellë, me çue.  
Topanxhë-ef.: Pishqollë, kobure me strall.  
Vár-em.: Fjalë, fjalim, ligjërim.  
Vergi (vergji)-ef.: Taksë shtëpije, dyqani, toke, etj.  
Xhepi e lep-shp.: Paguej e të shërbejë; xhepi plot, gati për shërbim.  
Zaranë-ef.: Lloj shelqje, tip mrinash.  
Ylldyz-em.: Ylli.  
Ymer-em.: Jetë; për ymer – për jetë, për amshim.  
Zollude (zollotë)- ef.: Monedhë turke tridhetë paresh.  
Shenime për botimin:

Për përgatitjen e këtij botimi të plotë u përdorën, për pjesën e parë Gegë Toska:  
Gomari i Babatasit, shtypë në Shtypshkronjën Françeskane, 1923, tue u këshillue  
edhe me botimin e III (1942); për pjesën e dytë dorëshkrimet e autorit: Visku i  
Babatasit, të gjetuna në tri duer, tue u mbështetë kryesisht në dorën e fundit.  
Nga ana gjuhësore, në të cilën vehen ré inkonsekuenca si mes botimeve të ndryshme  
të pjesës së parë, ashtu edhe mes varianteve në dorëshkrim të pjesës së dytë, janë  
ba disa ndërhyrje të lehta.  
Fundi i librit të botuem në Tiranë, viti 1994.

Omazh Per "Homerin" Shqiptar

Veriu Portal

[www.veriu.com](http://www.veriu.com)